

Djuão memã Jeju'ã ujarênh rax ne ja.

Djuão ne Jeju'ã ajarê. Jeju kute amijo ï ne rwýk kêtri Bämmë ro'ã kàjkwakam ar bari kumrêx memã arê. Ne kam atãri Jeju kute amijo amirît ne kute meo mex ne kute memã amikabên jarênh ja'ã ujarênh tẽn àbir djãmã kumê. Nãm prïne gwaj bamã Jeju kabên jarê. Jeju kute kukràdjã'ã mýjja jakre kunĩ ne arê. Me kute tu amim Jeju kamnhĩxkumrêx ne kam tĩn rã'ã rã'ãmã ne gwaj bamã arê.

Djuãomê kamybê Xijagu ne Ar kubê tep pynênh djwýnh nhym Jeju arkum kabên nhym ar tu mýjja kunĩmã iren Jeju kôt môn kôt bikamênh rã'ã nhym Jeju wabi. Nhym memã Jeju jarê nhym me kôt kum kurên pa 'ãbyn apêxtimã kumê. Kamã ne ajte memã *Mýjja Apôx Kêtri Kukãm 'ã Ujarênh* jadjwý'ã pi'ók no'ók ne.

Me'õ nhidjibê kabên'ã ujarênh kadjy ne ja.

Kar 10.36; Pir 2.6; Kor 2.9; Idja 1.2

1 ¹Mýjja kunĩ kêtri ne arým me'õ nhidjibê Kabên. Me'õ nhidjibê Kabên kàjkwakam Metĩndjwýnhmê ro'ã nhýn adjwýnhdjwý kubê Metĩndjwýnh. ²Ta ne mýjja kunĩ kêtri Metĩndjwýnhmê ro'ã nhý.

³Kubê ne mýjja kunĩ nhipêx djwýnh. Ne ren kêt nhym ren mýjja katorjadjwý kunĩ ren kêtumrêx. ⁴Me'õ nhidjibê Kabênjabê ne mýjja kunĩ tĩn djwýnhkumrêx. Ne kam kôt kute mrãmri ne me kurwý djã pyræk. Ga, ngônhpók kute akamát kô tyk kurwý nhym me kute akamátkam mýjja kunĩ pumũnh ne katát mrãnhja pumũ. Me jadjwý ne me axwen kam mrãnh punu. Nhym kam me memã me'õ nhidjibê Kabênja'ã ajarê nhym me kwý arým amim tu markumrêx. Kubê mýjja kunĩ tĩn djwýnhkam ne me kwý amim tu markumrêx ne kam arým axwe kêt ne katát amijo ba. ⁵Ga, akamát kô tykkam me kute mýjja pumũnh kêt ne ba punuja pumũ. Me kwý jadjwý ne me axwen ba punu. Nhym kam me memã me'õ nhidjibê Kabênja'ã ajarê. Memã 'ã ajarê nhym me axweja kute akamát kô tykkam baja pyræk ne me amim mar kêt.

⁶Be, atemã me'õbê ne Djuão. Ngômã me angjênh djwýnhja. Metĩndjwýnh ne Djuão jano nhym arým kukwakam ujarênh tẽ.

⁷Me'õ nhidjibê Kabênja kute mrãmri ne me kurwý djã pyræk nhym Djuão arým 'ã ujarênh tẽ. Kôt me kunĩ kute tu amim me'õbê Kabênja markumrêx kadjy ne 'ã ujarênh tẽ. ⁸Be, djãm Djuão ta kute me kurwý djãja pyræk? Kati. Kukãm

kute 'lã ujarēnh kadjy ne tē. ⁹Me'ō nhidjibê Kabēnja ne mrāmri kute amijo ba mexkumrēx ne katāt kute memā kabēn jarēnhkumrēx. Nām me kunīmā arēnhkumrēx. Kute mrāmri ne me kurwỳ djà kute memā pry kurwỳ pyrāk.

¹⁰Me'ō nhidjibê Kabēnja ne amikadjy me kunī nhipēx ne tūmrām me'ỳr bōx ne me ro'ã ar ba. Ta ne amikadjy me kunī nhipēx. Nām te me ipēx ne te me ro'ã ar ba nhym me kute amim mar kêt. ¹¹Ō me wỳnh'ỳr ne bōx nhym ō me wỳnh kute o aminhō bēnjadjwỳr kêt. ¹²Nhym be, me kwỳ ne me apỳnh ĩ djàri arỳm o aminhō bēnjadjwỳrkumrēx. Me ja ne me me'ō nhidjibê Kabēnja'ã amim,

—Mrāmri ne kubê Metĩndjwỳnh Krakumrēx, ane. Nām me amim anen arỳm o aminhōkumrēx. Nhym kam arỳm apỳnh me ĩ djàri memā kum,

—Mrāmri ne arỳm abê Metĩndjwỳnh krakumrēx, ane. ¹³Mebê Metĩndjwỳnh krakam arỳm umar djà ny. Umar djà nyo kute mrāmri ne me prĩre bixadjwỳr nykam umar djà ny pyrāk. Djām me my kute me niremā kra jadjwỳrkôt me umar djà ny? Kati. Nàr, djām me my kute me nireo ikwã prām kôt ne me umar djà ny? Kati. Nàr, djām me kute kra'ã amim karōkôt me umar djà ny? Kati. Metĩndjwỳnh kute memā amak bōnhkôt me umar djà ny.

¹⁴Be, me'ō nhidjibê Kabēnja ne arỳm amijo ĩ ne me baro'ã ar ba. Nām mexo uman ar ba. Ar ba ne bar prĩne mexo umakôt omũnho iba. Bām pyma o ne uma. Kubê Metĩndjwỳnh Kra djwỳnh. Pydji. Kam ne prĩne mexo uma. Ta ne tu kum me kaprĩ:kumrēx^a ne kabēn pỳnh ne arēn me baro'ã ar ba.

¹⁵Be, ngômā me angĩēnh djwỳnhbê Djuão ne kàj bē 'lã ajarēn memā kum,

—Arỳm ne ba ar amā me'ō ja'ã ajarēn 'ã ar amā, “Me'ō dja ikôt bōx. Nām raxo katāt ijakre. Be, mỳkam? Bir, amrēbê: ikētri ne ar ba tũm. Kam ne raxo katāt ijakre”, ane. Arỳm ne ba ã ar amā ane. Nām ã Djuão memā ane. ¹⁶Be, mỳjja kunĩ ne ō. Ta ne ukaprĩo ukaprĩn ō mỳjja kunĩmē me bakunĩo djuw mexo nhỹ. ¹⁷Môjdjê ne Metĩndjwỳnh kukwakam me kute katāt amijo ba'ã memā karō. Me axwe kêt kadjy memā karō. Nhym be, Jeju Kritu ta ne tu kum me kaprĩn kabēn pỳnh ne arē. ¹⁸Be, djām me'ō ne kute Metĩndjwỳnh pumũnh got? Arkati. Kra djwỳnh pydjibit ne kute omũnh. Bām mē ro'ã ne nhỹ. Krabit kute omũnh ne arỳm memā 'lã ajarē.

Djuão kute memā amijarēnh kadjy ne ja.

Mat 3.1; Mak 1.1; Ruk 3.1

¹⁹Be, Djeruxarēkam mebê idjaer rũnhja ne me Djuão mē me kwỳ jano. Ne me kadjy Metĩndjwỳnh mar djwỳnh kwỳ jano. Ne mebê Rewidjwỳ kwỳ jano. Me kute abej Djuão kukjêr kadjy ne me me kwỳja jano nhym me arỳm 'ỳr mō. 'Ỳr mō:n kam arỳm 'ỳr bōx ne kum,

—Mỳj me ajō ga nã? Djām abê me inhō Bēnjadjwỳrbê kumkatibê Kritu? ane.

²⁰Nhym Djuão memā 'ēx kêt ne mrāmri tu memā arēnhkumrēx ne memā kum,

^a 1.14 Djām me ta ne me axwe kêt nhym pānh kum me kaprĩ Kati. Me ta te axwe kētmā nhym ta arỳm tu kum me kaprĩ.

—Ba ibê Kritu kêt. Metĩndjwỳnh kute ijã me õ Bẽnjadjwỳrbê kumkati mẽn̄h kêt, ane.

²¹Nhym me kum,

—Be, abê Kritu kêt kam mỳj me ajõ ga nã? Djãm abê Metĩndjwỳnh kukwakam kabẽn jarẽn̄h djwỳnh? Djãm abê Erij? ane.

Nhym memã kum, “Kati”, ane.

Nhym me kum,

—Metĩndjwỳnh kute me imã kukwakam kabẽn jarẽn̄h djwỳnh'õ janormã. Djãm ga? ane.

Nhym memã kum, “Kati”, ane.

²²Nhym me kum,

—Bir, dja ga me imã amijarẽ. Me ije memã akabẽn jarẽn̄h kadjy. Me kute awỳr me ijanor ba me ije memã akabẽn jarẽn̄h nhym me kute amar kadjy on me imã amijarẽ, ane.

²³Nhym memã kum,

—Be, amrêbê: ne Metĩndjwỳnh kukwakam kabẽn jarẽn̄h djwỳnhbê Idjaij ijã kabẽn jarẽn̄h me bakukãmãremã kum,

“Kapôt kukritkam dja me'õ kàj bẽ me akren memã kum,

‘Bẽnjadjwỳr djwỳnh kutêp wãn̄h ajaxwemã anhiren kum amex. Kute mrãmri ne me kute me bẽnjadjwỳr rũnhmã katàt pry jadjwỳr nhym mexja pyræk. Dja gar ã kutêp amexo ane’, ane.”

Ba ijã ne Idjaij memã ane, ane. Djuão ã memã ane.

²⁴Be, mebê idjaer rũnh kute Djuão'ỳr me kwỳ janorja, kute kukjêrjabê ne mebê pardjêu. ²⁵Djuão amijã memã ane nhym me kum,

—Be, abê Bẽnjadjwỳrbê kumkatibê Kritu kêt ne abê Erij kêt ne abê Metĩndjwỳnh kukwakam kabẽn jarẽn̄h djwỳnh'õ kêt ne kam Metĩndjwỳnhmã ngômã me angjênho aba. Mỳkam? ane.

²⁶Nhym memã kum,

—Bir, ba ikajgo me:xi. Ije Metĩndjwỳnhmã me arẽn̄h kadjy ba ngômãbit me angjênho iba. Ikajgo nhym be, me'õ ra:x arỳm bõx. Ne kam ar me banhipôkri ba ga me aje mar kêt. ²⁷Tãmwa 'ã ne ba me amã, “Me'õ gêdja ikôt bõx. Nãm raxo katàt ijakre”, ane. Bãm te irax ne 'ã inhĩbõn ije kum parkà 'ãpre bõnh ne o itẽm prãmje. Be, ãm irax ba ren arỳm kum apê. Nhym be, kati. ãm ingrire. Nãm raxo ijakren̄h mex ne. Nãm ã Djuão memã ane.

²⁸Ngô raxbê Djodão nhikjê'ã krĩbê Betanhakam ne ã memã ane. Ngômã kute me angjên̄h djækam ne ã memã ane. Djeruxarẽ kurũm me bõxjamã ã ane.

Djuão kute arkum Metĩndjwỳnh Kra jakre kadjy ne ja.

Mat 3.11; Mak 1.10; Ruk 3.22

²⁹Nhym kam arỳm akamàt ne akati. Nhym Djuão ar jãnh dja nhym nĩnh Jeju Djuão kutã tẽ. Nhym omũn 'ã memã kum,

—Ota, Metĩndjwýnh nhõ Mrykĩ'átomti jabatàn ny tẽ. Tãm ne Metĩndjwýnh me bawýr ano nhym me kute bĩn nhym kute me kunĩ jaxweo pãnhmã.

³⁰Tãmwã 'ã ne ba ar amã, “Me'õ dja ikõt bõx. Nãm raxo katàt ijakre. Be, mýkam? Bir, amrêbê: ikêtri ar ba tũm. Kam ne raxo katàt ijakre”, ane. ³¹Be, djãm ba ne ba amrêbê nokre pumũ? Kati. Ije amrêbê omũnh kêt. Metĩndjwýnh kabẽnkõt ije me abê idjaermã Kritu'ã idjujarẽnh ga me aje marmã. Jabit ne ba kuma. Me aje Kritu marmã ne ba ngõmã me ajangjẽnhõ iba, ane.

³²⁻³³Ne kam Djuão ajte memã kum,

—Djãm amrêbê ije nokre pumũnh got? Kati. Metĩndjwýnh amrêbê ngõmã me angjẽnh'ã imã karõ. Ne kam ije Kritu nokre pumũnh kadjy ta ajte imã, “Be, me'õ'ã dja Ikarõ ruw ne arek kam nhỹ ga omũ. Tãmja ta gêdja memã Ikarõ jano nhym arým meo ba”, ane. Kute imã anhýr kõt ne ba kam arým nokre pumũ. Metĩndjwýnh Karõ kute tut pyrãk arým Jeju'ã ruw ne arek kam nhỹ ba arým omũn kam nokre pumũ. ³⁴Ije nokre pumũnhkam ba arým memã arẽnhkumrẽx ne memã kum, “Be, mrãmri tãmwbê Metĩndjwýnh Krakumrẽx”, ane. Jeju kutã tẽmkam Djuão ã memã ane.

Ar kumrẽx kute Jeju kõt amijo bikamẽnh'ã ujarẽnh.

³⁵⁻³⁶Nhym kam ajte akati nhym Djuãomẽ kõt ba djwýnh amãnhkrut ar Jeju tẽmkõt omũnhõ dja nhym arým arkum,

—Ota, Metĩndjwýnh nhõ Mrykĩ'átomti jabatàn ny tẽ, ane. ³⁷Nhym Djuãokõt ba djwýnh ar kuman mã Jeju kõt ajkamẽ. ³⁸Nhym Jeju ar'ýr akẽx nhym ar kõt tẽ nhym ar omũn arkum,

—Mýj nã? Mýj ne gar amã kĩnh ne ikõt tẽ? ane.

Nhym ar kum,

—Rabi, nhýnh ne ga anhũrkwãja? ane. Ujarẽnh djwýnh'ã ne ar kum, “Rabi”, ane.

³⁹Nãm ar ũrkwã jabej kukij nhym arkum,

—Amrẽ ar ikõt tẽn omũ, ane.

Nhym ar arým kõt tẽ. Kõt tẽn arým ũrkwã'ýr bõx ne arým omũ. Ne kam arek kam nhỹ. Arým ar'ã amykrykam ar arek kam nhỹ. Nhỹ: nhym ar'ã akati.

⁴⁰Be, ar amãnhkrut kute Djuão kabẽn mar ne mã Jeju kõt bikamẽnhja nhikjê nhidjibê ne Ængre. Ængremẽ Ximão Pedru ar axikõt apõx. ⁴¹Nãm ar ýr'ã akati nhym Ængre kamy Ximão kumrẽx jabej tẽn arým kum katon kum,

—Arým ne bar Mexijmã ikato, ane. Me õ Bẽnjadjwýrbê kumkatibê Kritu'ã ne me kum Mexij jarẽ.

⁴²Nãm Ximãomã anen arým Jeju'ýr o tẽn 'ýr o bõx ne kum akre. Nhym kam Jeju arek omũnhõ djan kum,

—Ga abê Ximão. Djõnaj ne adji. Dja ba jakam amã Xepa jarẽ, ane. Be, kẽn'ã ne kum Xepa jarẽ. Me bakabẽnkam ne kum Pedru jarẽ.

⁴³Nhym ajte ar'ã akati nhym Jeju pykabê Garrêja'ýr tẽmmã. Ne 'ýr tẽn kêttri Piripi kumrẽxmã katon kum,

—Amrê mã ikôt ajkamê, ane.

⁴⁴KrîrAXBê Bexadakam ne Piripi nhûrkwã. Kamdjwý ne Ăngremê Pedru ar ũrkwã. ⁴⁵Nãm Jeju Piripimã kabên nhym kam arým tẽn Natanajeumã kum,

—Arým ne bar kum ikato. Me bakukãmäre Môjdjê kute me bakukràdjã'ã pi'òk no'òkkam kute tãmwã'ã pi'òk no'òk. Metĩndjwýnh kukwakam kabên jarênh djwýnh 'òdjwý ar kute tãmwã'ã pi'òk no'òk. Bar pi'òk kôt kum ikato. Kubê ne Nadjarekam Jeju, ane.

⁴⁶Nhym Natanajeu kum,

—Tô nhýnh, djãm Nadjare kurũm mýjja mex'õ kator prãm got? ane.

Nhym kum, “Amrê ikôt tẽn omũ”, ane.

⁴⁷Ne kam arým 'ýr o tẽ. 'Ýr o tẽ:n 'ýr o bõx. Nhym Jeju arým Natanajeu tẽmkôt omũn kum,

—Be, ga abê idjaerkumrêx. Ajêxnhĩ kêtikumrêx, ane.

⁴⁸Nhym Natanajeu kum,

—Je, nhýnh ne ga arým ima? ane.

Nhym kum,

—Be, Piripi kute iwýr ajwýr kêtri ne ba arým apumũ. Pĩbê pigêre parbê anhýrri ne ba arým apumũ, ane.

⁴⁹Nhym kum,

—Ujarênh djwýnh, mrãmri ne abê Metĩndjwýnh Krakumrêx. Abê mebê idjaer nhõ bẽnjadjwýr rax, ane.

⁵⁰Nhym Jeju kum,

—Ba ije amã, “Pigêre parbê anhýrri ba arým apumũ”, anhýrbit. Ga kam arým tu amim imarkumrêx. Adjým, dja ba ajte mýjja pumũnh kêt kwý nhípê:x ga omũ. Mýjja raxo kute ajbir ije amã arênhja jakrenh mex dja ga omũ, ane. ⁵¹Ne kam ajte kum,

—Ba ije amijo inhĩ dja ĩ ijã kàjkwa abenbê ajkij nhym Metĩndjwýnh kadjy mrãnh djwýnh arým ikurũm wabin ijã axidjuw gar arým omũ. Mrãmri ne ba ar amã ja jarênhkumrêx, ane.

Kute ngôo pidjô kangô.

2 ¹Nhym akatin akatin akati nhym onĩj Garrêjakam krîrAXBê Kanakam me'õ myja me'õ nire'ýr mormã. Nhym me me kukràdjã kôt arým ar'ã akuprôn kute abenã ar mênhmã o dja. Nhym Jeju nã me kôt kam ar ba.

²Nhym me Jejumê kôt ba djwýnh arkum krà nhym ar arým me'ýr bõx.

³Me'ýr bõx nhym uba kangô arým mebê apêx. Nhym nãja Jejumã kum,

—Uba kangô ne arým mebê apêx, ane. ⁴Nhym kum,

—Adjým me'õ nire. Djãm arým idjãpênh'ã myt bõx got ga imã arê? ane.

⁵Nhym kam nã kikrekam me õ àpênhmã kum,

—Gêdja ar amã arê gar kabên kôt apê. Nãm ã nã arkum ane.

⁶Nhym kam kẽno ngõnhbê 6 ne ku'ê. Me kute amiku'õnh djã kadjy ne ngõnhja. Mebê idjaer kute Metĩndjwýnhmã amiku'õnh djã kadjy. Ngõnh

kre rũnh kute ngônhti pyràk. Kěno ngônht pydji kre'ã akrekam ne kute ngônhtkrôkrôkti ipuo amãnhkrut ne amãnhkrut pyràk.

⁷Nã me àpěnh djwỳnhmã kaběnh nhym kam Jeju arkum, “Ar ngôo ipu”, ane. Nhym kam ar ngô runho tẽn o ipu mex ne.

⁸Nhym arkum,

—Ar kwỳ run memã ỳr djwỳnhmã o tẽn, ane.

⁹Nhym arỳm ar kwỳ run memã ỳr djwỳnhmã o tẽn nhym arỳm kakin amim, —Je tở, nhỹnh ne uba kangôja? ane. Ne kam amiwỳr me'ỏ my kute ni'ỳr mỏrja 'uw nhym 'ỳr bỏx nhym kum,

¹⁰—E kum, uba kangỏ mexkumrẻx ne ga o apdjun ajbir o akato. Djãm me kute ỏ o anhỹr got? Kati. Me kute abenã me rẻnhkam ne me kute memã kangỏ djẻnhkumrẻxja kumrẻxo apỏx. Ne me kute o kỏm kumexkambit kute memã kỏjbẻ kangỏ djẻnhỏ apỏx. Be, ga ne ga atemã ne ajbir kangỏ djẻnhkumrẻx jao akato, ane.

¹¹Be, me kute raxmã kator kadjy mỳjja pumũnh kẻt nhipẻx krax ne ja. Garrẻjakam krẻraxbẻ Kanakam ne ngỏ kajgoo uba kangỏ nhipẻx ne o memã amiraxo amirẻt. Nhym kam kỏt ba djwỳnh ar kute omũnhkam tu amim markumrẻx.

¹²Nhym kam Jeju krẻraxbẻ Kapana'ỳr rwỳk tẻ. Nẵmẻ kamymẻ kỏt ba djwỳnhmẻ ne ar kỏt mỏ. Ar 'ỳr rwỳk mỏ:n arỳm 'ỳr bỏx. Ne Kapanakam ar ba: nhym ar'ỏ akati ngrẻrebit apẻx. Nhym kam ar ajte mỏ.

Kute Metĩndjwỳnh nhỏ kikreti nẻje me anor.

Mat 21.12; Mak 11.15; Ruk 19.45

¹³Djeruxarẻkam mebẻ idjaer kute aben pydji 'ỳr. Me kute aben kajmã'ỏ Metĩndjwỳnh me bẻ idjaer kukãmẻ nhirỏbẻ mrẻnhja mar kadjy ne me aben pydji 'ỳr. Nhym Jeju arỳm mekỏt 'ỳr tẻ. 'Ỗr tẻ:n kam arỳm 'ỳr bỏx. ¹⁴Ne kam Metĩndjwỳnh nhỏ kikretimã wadjỏ. Nhym me kumex. Me kute pi'ỏk kaprẻ pẻnh memã mry nhỏr djwỳnh kumex. Mry bẻari, mrykẻ'ỏtomtỉ, tut nhỏr djwỳnh kumex. Nhym me kute me ỏ pi'ỏk kaprẻ pẻnh memã kikreti nhỏ pi'ỏk kaprẻja nhỏr kadjy me kumex. Nhym arỳm me omũ. ¹⁵Ne kam me kadjy arỳm djudjẻdjẻo me kaprẻprẻk djỏ nhipẻx ne arỳm me aẻo tẻn bỏm me kurẻ. Nẵm me kunẻmẻ me ỏ mrykẻ'ỏtomtỉmẻ me ỏ mry bẻari jano. Nẵm me kute me ỏ pi'ỏk kaprẻ pẻnh memã kikreti nhỏ pi'ỏk kaprẻ nhỏr djwỳnhjabẻ pi'ỏk kaprẻ ngrẻn mebẻ pẻponh ikẻỏ rẻnhỏ tẻ. ¹⁶Ne tut nhỏr djwỳnhmã kum,

—Mũm me mỳjjao akato. Djãm Ibẵm nhỏ kikreo bikẻnh got ga me kikre kreỏ àpnu? Kwẻrẻk wẻnh Ibẵm nhỏ kikrekam mỳjja pẻnh abenmã pi'ỏk kaprẻ nhỏr kẻt, ane.

¹⁷Nhym kỏt ba djwỳnh omũn arỳm pi'ỏkkam Metĩndjwỳnh kabẻnh ma. Amrẻbẻ: Kra kute Bẵmmã kum,

“Dja ba anhỏ kikre'ỏ ino tỳx nhym me arỳm ibẻ”, anhỹr ja ne ar arỳm kuma.

¹⁸Nhym kam mebẻ idjaer rũnh Jejumã kum,



(Djuão rax 2:15)

—Goja on mỳjja pumũnh kêt'õ nhipêx bar omũ. Ne kam arỳm abẽnjadwỳr rax ma. Aje mỳj me'õ kabẽnkõt kikretikam me anoro abaja ma, ane.

¹⁹Nhym memã kum,

—Ã. Dja ba ĩ me amã mỳjja pumũnh kêt'õ nhipêx. Dja me Metĩndwỳnh nhõ kikretija ngrà ba kam akubyn ipêx. Ije ipêxo idjãm'ã gêdja akati amãnhkrut ne ikjêkêt apêx ba arỳm ipêx pa, ane.

²⁰Nhym me kum,

—Tõ nhỹnh? Djãm kikre ja nhipêx'ã akati amãnhkrut ne ikjêkêt apêx got? Kati. Be, me kute kikreti ja nhipêxo ku'ê'ã amex krãptĩ:bê 46 apêx nhym me arỳm ipêx pa, ane. ²¹Be, djãm Metĩndwỳnh nhõ kikreti wã'ã ne memã kabẽn jarê? Kati. Aminhĩ'ã ne Metĩndwỳnh nhõ kikreti jakren memã arê. Be, Jeju nhĩ kute mrãmri ne Metĩndwỳnh nhõ kikre pyrãk. Dja ty nhym me adjã. ²²Nhym kam arỳm akubyn tĩn. Nhym kôt ba djwỳnh akubyn tĩnkôt omũn akubyn amijo tẽn arỳm Jeju kabẽn ja ma. Kute aminhĩ'ã kikreti jakreja man amim,

—Be, mrãmri ne Metĩndwỳnh amrêbê: pi'òkkam Jeju kônkh kabẽn dji. Mrãmri ne Jeju kabẽnkumrêx, ane. Dja kôt ba djwỳnh ar kikreti'ã kabẽn man ã amim ane.


²³Me krãptĩ kute aben pydji djã nhõ akatikam ne Jeju Djeruxarêkam ar ba. Me kute aben kajmã'ã Metĩndwỳnh me bê idjaer kukãmãre nhirôbê mrãnhja mar kadji ne me aben pydji. Nhym Jeju mekam ar ban arỳm mỳjja pumũnh kêt kwỳ nhipê:x. Nãm me punu krãptĩ:o mex nhym me arỳm omũ. Me krãptĩ ne me omũn arỳm amim,

—Be, mrāmri ne Jejubê Metĩndjwỳnh Krakumrêx. Mrāmri kubê me banhô Bẽnjadjwỳrbê kumkatibê Kritukumrêx, ane. ²⁴Nhym Jeju arỳm me kabên man amim,

—Be, djām mrāmri me krāptĩja kute tu amim imarkumrêx got, ba on meo iba? Kati. Me krāptĩ kabên kajgo, ane. Be, djām Jeju kute me mar kêt got? Nām kute me kunĩ mar. ²⁵Djām kute me'ômã, “Mỳj ne me kuma”? anhyr prām got? Kati. Kute prĩne me ôkre kadjwỳnhbê me kabên mar. Kute me kwỳ kabên kajgo mar.

Nikodemumã umar djà ny'ã ujarênh.

3 ¹Be, me'ô, idjibê Nikodemu. Kubê pardjêu'ô. Me rűnhmê ro'ã ne mebê idjaer kunĩmã nhỹ. ²Akamàtkam ne Jeju'yr tẽn 'yr bôx ne kum, —Ujarênh djwỳnh, mrāmri ne Metĩndjwỳnh ajano. Aje memã kukràdjà'ã adjujarênh kadjy ajano ga bôx. Arỳm ba me ije amar. Ga ne ga aje mỳjja pumũnh kêt kwỳ nhipê:x, me punu krāptĩ:o mex. Kam ne ba me arỳm kôt ije amar. Djām me'ô kajgo kute ã meo anhyrmã got? Kati. Be, Metĩndjwỳnh amê amijo kajkep. Kam ne ga ã meo ane. Nām ã Nikodemu Jejumã ane.



(Djuão rax 3.1-16)

³Nhym kum,

—Ë, djãm aje Metĩndjwỳnh rax ne kute meo bajamã akator ne aje marmã ne ga tẽ? Be, ga ne ga te aje kum akatormã. Adjumar djà nykambit. Adjumar djà ny kute me prĩre bixadjwỳr nykam umar djà ny pyræk. Kambit dja ga kum akaton ama. Mrãmri ne ba amã ja jarẽnhkumrẽx, ane.

⁴Nhym kum,

—Je, mỳj dja ba idjumar djà ny kadjy on? Djãm arỳm ijabatànhkam ije inã tikkremã idjār ne ajte ikator got ba idjumar djà nymã? ane.

⁵Nhym kum,

—Djãm ja ne ba amã arẽ? Kati. Dja me amim Metĩndjwỳnh kabẽn ma. Metĩndjwỳnh kabẽn ne kute ngô pyræk. Dja me amim kabẽn ma nhym Karõ arỳm memã amak bô nhym me arỳm umar djà ny kute me prĩre bixadjwỳr nykam umar djà ny pyræk. Nhym kam Metĩndjwỳnh arỳm amim me utàn ar meo ba. Mrãmri ne ba amã ja jarẽnhkumrẽx.

⁶Djãm me my kute memã kra jadjwỳr nhym me bixadjwỳrkam Metĩndjwỳnh kôt umar? Kati. Me kôt umar kêtikumrẽx. Nhym be, Metĩndjwỳnh Karõ kute meo ny kôt ne me mrãmri umar djà nykumrẽx ne arỳm kôt umar. ⁷Ba amã, “Dja ga adjumar djà ny kute mrãmri ne me prĩre bixadjwỳr nykam umar djà ny pyræk”, ane. Ije amã anhỳrkam kwārĩk wānh te aje marmã ikam ano tyk ne anhỳr kêt. ⁸Be, ga, kôkreja pumũ. Djãm ga aje àbêrja kraxkôt omũnh ne nhĩ'ām prôtĩkôt aje omũnh? Kati. Metĩndjwỳnh Karõdjwỳ djãm aje omũnh? Kati. Kute memã umar djà ny jangjẽhdjwỳ djãm aje kôt omũnh? Kati. Aje kôt omũnh ne mar kêtikumrẽx, ane.

⁹Nhym Nikodemu kum,

—Kon. Bir, mỳj dja kute memã umar djà ny jangjẽnh on? ane.

¹⁰Nhym kum,

—Be, ga ne ga mebê idjaerkam me kukràdjà'ã adjujarẽnh djwỳnh ne ren aje ikabẽn mar. Nhym be, kati. Aje imar kêt, ane. ¹¹Mrãmri amrẽbê ar ije mỳjja mar ne omũnhkumrẽx. Ne kam arỳm me amã arẽ ga me kam aje amim ar imar kêt rã'ã. ¹²Pykakam me kukràdjà kôt ba arỳm amã ikabẽn jarẽ ga aje amim imar kêt. Ne ba ren kàjkwakam ikukràdjà kôt amã ikabẽn jarẽ. Djãm kam ga ren tu amim imarkumrẽx? Kati. Ga ren kamdjwỳ aje amim imar kêtikumrẽx.

¹³Be, nhỹnh ne me'õ kute kàjkwakam kukràdjà marmã 'ỳr wabin 'ỳr bôx? Ne kuman akubyn ruwn arỳm memã arẽ. Kati. Pykakam me'õ kute kadjy àbir kêtikumrẽx. Ba ije amijo inhĩbit ne ba arỳm kàjkwa kurũm ruw. Ba ne ba kam inhỳr tũm. Ne kam arỳm me amã arẽ.

¹⁴Be, me bakukāmāre Mõjdjê kapôt kukritkam kryto kangã karõ nhipêx. Ipêx ne pĩ'ã kunhôn arỳm kàjmã kudja. Kudja nhym kangã karõ kỳjrũm pĩ'ã wajêt. Badjwỳ, ije amijo inhĩdjwỳ, dja me pĩ'ã inhô ba arỳm kỳjrũm ã ijêto ane. ¹⁵Mỳj kadjy dja ba kỳjrũm wajêt? Bir, dja me kwỳ ĩ pỹnhkôt tu amim imarkumrẽx ne arỳm Metĩndjwỳnh kôt tĩn ne ar ba rã'ã: rã'ã ne. Ja kadjy dja ba kỳjrũm wajêt. Nãm ã Jeju Nikodemumã ane.

¹⁶Metĩndjwỳnh ne kum pykakam me kunĩ jabê:. Mỳj ne kum me abê on? Bir, nãm me kadjy Kra djwỳnh jano. Kra pydji jano nhym arỳm pykamã bôx ne me kadjy ty. Mỳj kadjy ne ty? Bir, dja me kwỳ ĩ pỳnhkôt tu amim Kra markumrêx nhym arỳm me utà. Dja me biknor tokry djàkam me biknorbê me utà nhym kam me Metĩndjwỳnhkôt tĩn ne ar ba rã'ã: rã'ã ne. Ja kadjy ne ty. Nãm ã Metĩndjwỳnh kum me kunĩ jabêo ane.

¹⁷Mỳj kadjy ne Metĩndjwỳnh pykamã Kra jano? Djãm kute memã axwe pãnh jarênh nhym me me biknor tokry djàkam biknor kadjy? Kati. Kute kubê me kunĩ pytarmã ne ano. ¹⁸Be, me kute arỳm tu amim Kra markumrêxa Metĩndjwỳnh kute memã axwe pãnh jarênh kêtumrêx nhym me biknor kadjy kêtumrêx. Nhym be, me kute amim mar prãm kêtjamã ne arỳm kute memã axwe pãnh jarênhkumrêx. Arỳm kute me'ã amim,

—Tãmwã dja axwe pãnh me biknor tokry djàkam akuno, anhỹrkumrêx. Mỳkam? Bir, Metĩndjwỳnh Kra djwỳnh me kute amim mar prãm kêtka dja me arỳm akuno.

¹⁹Mỳj ne Metĩndjwỳnh amim arên kam arỳm memã me biknor tokry djàkam biknor jarê? Bir, nãm amim,

—Ba arỳm pykakam memã Jeju jano nhym bôx. Jeju ne kute memã pry kurwỳ djà pyràk. Jejukôt me katàt amijo ban tĩnkumrêx. Nã bãm memã ano nhym me kum kĩnh kêt. Ga, akamàt kô tykkam me kute mỳjja pumũnh kêt ne ba punuja pumũ. Me jadjwỳ ne me kum arĩk ar baja kĩnh. Mỳkam? Bir, me axwe'ã maje kum katàt amijo ba kĩnh kêt. Nãm ã me'ã amim ane.

²⁰Ga, me kunĩ arĩk ar baja kum Jeju kurê ja pumũ. Jeju kute memã pry kurwỳ djà pyràk me kum kurê. Djãm me kute amim Jeju mar ne kôt kute amijo ba prãm? Kati. Ren me amim Jeju ma nhym ren arỳm memã apỳnh axwe jarê. Axwe pãnh kute memã bẽn tỳx pymaje ne me kute amim mar prãm kêt. ²¹Nhym be, me katàt kute amijo baja ne me kute Jeju kôt amijo ba prãm. Jeju kute memã pry kurwỳ djà pyràk ja ne me kute kôt amijo ba prãm. Mỳj kadjy? Bir, dja me kôt ar amijo ba nhym me arỳm omũ. Kôt me ukapřja pumũ. Metĩndjwỳnh djukapřĩ kôt me ukapřĩ dja memã amirĩtkumrêx nhym me arỳm omũ. Ja kadjy ne me kute Jeju kôt amijo ba prãm.

Djuão Jeju'ã ujarênh.

²²Jeju Nikodemumã kabên pan kam kôt ba djwỳnhmê arỳm ar tẽ. Tẽ:n kam arỳm pykabê Djudêjakam bôx. Bôx ne arek ar kam ba. Metĩndjwỳnhmã ngômã me angjênh ba. ²³Nhym Djuãodjwỳ amũ ngômã me angjênh ba. Amũ krĩraxbê Xarĩ kuri pykabê Inôkam ne ngômã me angjênh ba. Kam ngô kumexkam ne meo ba. Nhym me 'ỳr bôxo ku'ê nhym ngômã me angjênh ku'ê. ²⁴Me kute Djuãobê ijê kêttri ne meo ku'ê.

²⁵Nhym kam Djuãokôt ba djwỳnhmê mebê idjaermẽ ar arỳm aktã kabêno aben japanho dja. Nãm ar abenmã kum,

—Mỳj godja me ngôo me on nhym Metĩndjwỳnh memã mex jarẽ? anen
²⁶arỳm Djuão'ỳr tẽn 'ỳr bõx ne Jeju'ã kum,

—Ē, ujarẽnh djwỳnh, aje ngôbê Djodão nhijukri me'ômẽ ro'ã aban
 aje 'ã adjujarẽnh ar aba. Be, adjwỳnhdjwỳ arỳm ngômã me angjẽnho ba
 nhym me kunĩ arỳm mũm abê tẽn 'ã kume:x, ane.

²⁷Nhym Djuão memã kum,

—Kwārĩk wánh rã'ã. Metĩndjwỳnh kute me'ã kum karõja ne me arỳm mũm
 'ỳr bõx. ²⁸Ba arỳm me amã amijarẽ ga me ikabẽn ma. Ba me amã, “Djãm ibê
 me banhõ Bẽnjadjwỳrbê kumkati got? Djãm ibê Kritu got? Kati. Kukãm ne
 Metĩndjwỳnh ijano ba tẽn”, ane. Ba arỳm me amã ja jarẽ ga me arỳm ama.

²⁹Djãm me wã ne inhõ me? Kati. Me wã ne Jeju nhõ me. Ga, me mjẽnbit kute
 prõo baja pumũ. Jeju kute prõo ba măn prãbê me wão ba. Jejubit ne me wão
 aminhõn meo ba. Ba ne inhõ me kêt. Be, ba ne ba amybỳm kam ikĩnhkumrẽx.
 Ga, me mjẽn prõ'ỳr baja pumũ. Nhym amybỳm mjẽn nhõbikwa kajgo arỳm mjẽn
 kabẽn ma. Kabẽn man kam arỳm kĩnhkumrẽx ne. Jeju'ã me krãptĩkam ne ba
 arỳm ã ikĩnh ane. ³⁰Mrãmri dja raxo amũ ijakrenho tẽn. Nãm ã Djuão memã ane.

³¹Kàjkwa kurũm rwỳkja ne raxo kute me kunĩ jakrenh. Nhym be,
 pykabê me bixadjwỳrja ne me pykabê ar ba. Pykabê ar ban pykabê mỳjjabit
 jarẽ. Nhym be, kàjkwa kurũm rwỳkja raxo kute me kunĩ jakrenh. ³²Kute
 kàjkwakam mỳjja pumũnh ne mar ne memã 'ã amijarẽnho ba. Nhym me
 krãpti: kute amim kabẽn mar kêt. ³³Nhym be, me kwỳ kute amim,

—Mrãmri ne Jeju kabẽn katàtkumrẽx, anhỳrkam djãm Jejubit ne me amim
 kuma? Kati. Kàjkwakam Metĩndjwỳnhdjwỳ ne me amim kuma. Nãm me amim,

—Mrãmri ne Metĩndjwỳnh kabẽn katàtkumrẽx, ane.

³⁴Metĩndjwỳnh kute anorkam ne Kra arỳm Metĩndjwỳnh kukwakam
 kabẽn jarẽnho ba. Kute kubê Karõ nê kêtumrẽx nhym kute 'amỳnh tỳx ne
 o ba. ³⁵Kàjkwakam Bãm kum Kra jabê. Ne kam arỳm Kramã õ mỳjja'ã kum
 karõn kam kum kunĩ kanga nhym ar o ba. ³⁶Kra Bãm nhõ mỳjja kunĩ
 ba nhym kam me kute tu amim Kra markumrẽxja arỳm Metĩndjwỳnhkõt
 tĩn ne ar ba rã'ã: rã'ã ne. Nhym be, me kute amim Kra mar kêtja dja me
 tĩnkumrẽx'ỳr bõx kêtumrẽx. Metĩndjwỳnh dja mekam ngryk rã'ã ne.

Xamarijkam me'õ nire ja'ã ujarẽn.

4 ¹⁻³Nhym kam Bẽnjadjwỳr djwỳnh Jeju arỳm pykabê Djudêja kurũm
 tẽn. Mỳkam ne tẽn? Bir, arỳm kute õ me jao Djuão jakrenhkam. Jeju
 amikõt me kamẽn ngômã me angij nhym me arỳm kume:x. Nhym mebê
 pardjêu arỳm me kumex jarẽn ma. Nhym kam arỳm amim,

—Be, me arỳm kute ijã me kumex jarẽn mar. Ba on, ane. Ne kam arỳm mebê
 tẽn. Djãm Jeju ta ne ngômã me angjẽnho ba? Kati. Kõt ba djwỳnh ne ar ngômã me
 angjẽnho ba. Nãm Jeju Djudêja kurũm tẽn kam ajte pykabê Garrêja'ỳr tẽnma.

⁴Ne kam arỳm tu Garrêja'ỳr pykabê Xamarijkõt tẽn prãm. ⁵Nãm Xamarijkõt
 tẽn: kam arỳm krĩrax'õ'ỳr bõx. Idjibê ne Xika. Kuri ne Jõdje nhõ pyka. Amrêbê: me

bakukãmäre Djako kra Jôdjemã pyka kwỳ tan kum kungã. ⁶Õ pykakam ne Djako nhõ ngômkwati. Nãm Jeju krĩrax'ỳr bõx ne arỳm pykakõt tẽm kurėje katy. Ne kam tẽn arỳm ngômkwati jakà'ã nhỹ. Arỳm kàjkwa nhipôkri myt nhỹrkam ne 'ã nhỹ.

⁷Nhỹ: nhym nĩnh Xamarijkam me'õ nire arỳm 'ỳr tẽ. Kute kam ngô kwỳ jadjarmã ne 'ỳr tẽn 'ỳr bõx. Nhym kam kum, “Ba ikõ”, ane. ⁸Be, arỳm kõt ba djwỳnh mã krĩraxmã morkam. Kute ar õ kwỳ krẽn djà byrmã ne ar tẽ.

⁹Nãm kum, “Ba ikõ”, ane.

Nhym kum,

—E 'õ. Mỳkam ne ga me ajõbê idjaerkam ngô'ã ijuw? Ba ibê pykabê Xamarijkam me'õ nire ne ga ngô'ã ijuw, ane. Be, mebê idjaer ne me kum mebê Xamarij kĩnh kêt.

¹⁰Nãm nireja ã kum ane nhym Jeju kum,

—Ga aje Metĩndjwỳnh kute meo kĩnh djà mar kêt ne ba ije ngô'ã ajwỳr djwỳnh aje imar kêt. Ne ga ren iman ren ba ngô'ã ijuw ba ren amã me tĩnkumrẽx kadj ngô ren amã kungã, ane.

¹¹Nhym kum,

—Ô kum bẽnjadjwỳr, anhõ ngôo àbir djà kêt nhym ngômkwati kre ry:. Nhỹnh ne me tĩnkumrẽx kadj anhõ ngôja? ¹²Me banhingêt kukãmäre Djako kukwakam ne ngômkwatija. Ta ne kute kam o kômo ku'ê nhym kramẽ õ mrymẽ kute kam o kômo ku'ê. Djãm araxo aje me banhingêt Djako jakrenh? ane.

¹³Nhym kum,

—Gêdja me ngô kajgo jao ikõn akubyn kum kôr. ¹⁴Nhym be, ba ije amã ngô jarẽnhja gêdja me kwỳ ã pỹnhkõt o ikõn akubyn kum kôr kêtumrẽx. Ije amã ngô jarẽnh ja gêdja me o ikõ nhym mã mekam apõx kute mrãmri ne ngômkwatikam ngô mã apõx pyræk. Nhym kam me arỳm Metĩndjwỳnhkõt tĩn ne ar ba rã'ã: rã'ã ne, ane.

¹⁵Nhym kam kum,

—Bẽnjadjwỳr goja amrẽ imã aje ngô jarẽnhwã ngã ba o ikõn goja imã kôr kêt ne amrẽ ngôo imrãnh kêt, ane. Djãm ngôkumrẽx'ã ne kute kum me tĩnkumrẽx kadj ngô 'ã ajarẽ? Kati. Metĩndjwỳnh Karõ'ã ne ngô jakren kum 'ã ajarẽ. Nãm ã nire ngô'ã Jeju 'wỳro ane. ¹⁶Nhym kum,

—Tẽn amjẽn mã arẽ gê amrẽ tẽ, ane.


¹⁷Nhym kum, “Imjẽn kêt”, ane.

Nhym kum,

—Nã. Mrãmri amjẽn kumrẽx kêt. ¹⁸Amrêbê ne aben totokmã amjẽn amãnhkrut ne amãnhkrut ne ikjêkêt ga kanga. Ne kam ajbir awỳr bao ku'êja ne kubê amjẽn kêt. 'Ã ne aje mrãmri imã, “Imjẽn kêt”, anhỹrja.

¹⁹Nhym kum,

—Bẽnjadjwỳr, ga abê Metĩndjwỳnh kukwakam kabẽn jarẽnh djwỳnh'õ ba arỳm ama. ²⁰Krãnh wã'ã ne me ikukãmäre kute Metĩndjwỳnhmã rax jarẽnh djà. Nhym me abê idjaer ne ga me atemã ne aje memã kum,



(Djoão rax 4.19)

—Krĩraxbê Djeruxarêkambit ne me kute Metĩndjwỳnhmã amijarênh djà, anhỹro aba, ane.

²¹ Nhym Jeju kum,

—Djãm me aje krãnh wã'ã me Bãm djwỳnhmã rax jarênh rã'ãmã? Nàr djãm me aje Djeruxarêkam kum amijarênh rã'ãmã? Kati. Gêdja ga me ï kam kum amijarênh kêt. Kam kum amijarênh kêt'ã ne amrê akati mör rã'ã. Mrãmri ne ba ije amã arênhkumrêx. Dja ga tu amim ikabênja markumrêx. ²² Me abê pykabê Xamarijka me kra ne ga me aje we apytàr djwỳnhja, aje kum rax jarênhja aje mar kêt. Nhym be, me ibê idjaerkam ne ba me ije Metĩndjwỳnhmã amijarênhja arỳm ije mar. Ije me utàr djwỳnhkumrêx mar. Me ibê idjaerkam ne me utàr djwỳnh kato. Kam ne ba me ije mar.

²³ Me kute markumrêx dja me ï me Bãm djwỳnhmã rax jarênhkumrêx ne 'êx kêtumrêx. Me kadjwỳnhbê Metĩndjwỳnh Karô kôt dja me mrãmri amijo ngriren raxmã katorkumrêx ne kum rax jarênhkumrêx. 'Ã akati amrê mör rã'an arỳm bôx 'ỳr. Me Bãm djwỳnh kum me ja kĩnh. ²⁴ Djãm kàjkwakam Metĩndjwỳnh kute me bapyràk? Djãm ìmê 'ìmê kute me bapyràk? Kati. Karôbit. Nhym me kute omũnh kêtumrêx. Me kute omũnh kêtka dja me tu amikadjwỳnhbê karô kôt mrãmri amijo ngriren raxmã katorkumrêx. Kum katorkumrêx ne kum rax jarênhkumrêx. Nãm Jeju ã me'õ niremã ane.

²⁵ Jejubê ne Bẽnjadjwỳrbê kumkatibê Kritu nhym kute mar kêt. Kritu nhidji 'ôdjwỳbê ne Mexij. Me'õ nire kute mar kêt ne kum,

—Tukwa, gêdja Mexij bôx ne me imã mỳjja kunĩ jarẽ ba me kuma. Ja ne ba arỳm ije mar, ane.

²⁶Nhym kum,

—E kum, ba ne ba arỳm amã ikabêno nhỹ. Ibê ne Mexij, ane.

²⁷Nãm nirejamã ja jarêno nhỹ nhym kôt ba djwỳnh arỳm 'ỳr bôx ne ar omũ. Jeju kute kum kabêno ỳrkôt arỳm ar omũ. Ne te kute ar marmã arkam no tyn dja. Ne bit kute nija'ã kukjêr ne kute kum,

—Mỳj ne ga kum arêno nhỹ? Mỳkam ne ga kum akabêno nhỹ? anhỹrmã ne arkum uman arek ku'ê.

²⁸Nãm kôt ba djwỳnh Jeju'ỳr bôx nhym nire arỳm ỏ ngoy ngônhamã iren mã: krĩraxbê Xikamã tẽn wadjà. Ne kam memã kum,

²⁹—Ô kum onĩj me'ỏ. Ije amijo ibaja kunĩkôt ipumũn imã arẽ. Bãrãm mrãmri kubê me banhõ Bẽnjadjwỳrbê kumkatibê Kritukumrêx. Gwaj 'ỳr gar omũ, ane. ³⁰Nhym me arỳm krĩrax kurũm katon 'ỳr tẽn arỳm 'ỳr bôx.

³¹Me 'ỳr bôx kêtri ne kôt ba djwỳnh arỳm kum,

—Ujarênh djwỳnh, gop anhõ kwỳ krê, ane.

³²Nhym arkum,

—Be, atemã inhõ kwỳ krên djàja ar aje mar kêt, ane. Be, djãm mrãmri ỏ kwỳ krên'ã ne arkum ane? Kati. Nãm Metĩndjwỳnhmã àpênho ỏ kwỳ krên djà. Metĩndjwỳnhmã àpênh ar ba'ã ne arkum ane. ³³Nãm arkum ane nhym ar arỳm abenmã kum,

—Djã ne me'ỏ arỳm kum mỳjja'ỏ ngã nhym kukrê? ane.

³⁴Nhym arkum,

—Be, kàjkwakam Metĩndjwỳnh kute amrê pykamã ijanor arỳm ijã amim karõ. Kute idjàpênh djà'ã amim karõ kôt dja ba amijo iban arỳm inomã kumê. Be, idjàpênh jakam ikĩnh inhõ kwỳ krênkam ikĩnh jakrenh mex ne. 'Ã ne ba ije ar amã, “Atemã inhõ kwỳ krên djà”, anhỹrja. Nãm ã Jeju arkum ane.

³⁵Ne kam ajte arkum,

—Kwãrĩk wãnh gar amim, “Dja bãygogo'ã mytyrwỳ amãnhkrut ne amãnhkrut apêx bar kam êo mỗ”, anhỹr kêt. Be, ba ne ba ar amã, “Ar kàjmã akrãn me kute ikabên mar prãmja pumũ. Me krãptĩ kute bãygogo pyrãk wã pumũ. Dja gar memã ijã ajarê nhym me arỳm tu amim imarkumrêx. Ja kadjy ne me mexkumrêx. Me mexkumrêx kute mrãmri ne bãygogo prỳ ngràn akakam ê kadjy mexja pyrãk.

³⁶Dja gar on jakam memã arê nhym me amim ima ba arỳm ar amã o pãnh. Nhym kam me ikôt tĩn ne ar ba rã'ã: rã'ã ne. Ba ar amã o pãnh gar arỳm akĩnh rã'ã: rã'ã ne. Djãm ar gajbit dja gar akĩnh? Kati. Me kute amrêbê memã arênhdjwỳ dja me ar aro'ã kĩnh. Ga, me kumrêx kute bãygogo kre nhym ate me ja kute tũmrãm bãygogo djêja pumũ. Me kute ê parkam me ro'ã kĩnhkumrêx. Inhõ àpênh tũmmê dja gar aro'ã akĩnhkumrêx.

³⁷Be, me memã kum, ‘Gêdja me'ỏ 'y kre nhym me'ỏ arỳm ê’, anhỹro ba. Be, ikabênja kônne ne me kabên ja dji. ³⁸Ar aje o atom ne êmã ne ba 'ỳr ar ajano. Amrêbê ne gar bãygogokam adjàpênh kêt. Me'ỏ kumrêx

ne arým kam apên kam 'y krebato ba. Gar inhô me àpênh tûm kôt ajbir adjâpênh 'amý", ane. Ar kute memã 'ã ujarênhmã nhym me kute tu amim markumrêxmã ne Jeju ã kôt ba djwýnhmã ane.

³⁹Nãm me'ô nire krîraxbê Xikakam Xamarij kramã kum,

—Nãm prîne ije amijo iba kunîkôt imã arênh mex, anhyro tẽ. Nhym me krãptĩ kuman arým tu amim Jeju markumrêx. ⁴⁰Ne kam Jeju'ýr tẽn 'ýr bôx ne kum,

—Gop arek me iro'a ar aba, ane. Nhym arým arek mekam ar ba. Ar ba nhym arým 'ã akati amãnhkrut apêx. ⁴¹Nhym kam me kute Jeju ta kabên markam ne krãptĩ tu amim markumrêx.

⁴²Ne kam nijamã kum,

—Jakam bar tu amim Jeju markumrêx. Djã ne bar akabênbit man amim tu markumrêx? Kati. Arým ne bar Jeju ta kabên kôt amim kuman amim, “Be, mrãmri ne Jejubê Bênjadjwýrbê kumkatibê Kritukumrêx. Mrãmri kubê pykakam me axwe kunĩ pytàr djwýnhkumrêx.” Nã bãm ar ã amim ane. Nãm me ã nire jamã ane.

Kute me'ô bēnjadjwýr krao mex.

⁴³Be, Jeju'a akati amãnhkrut apêx nhym arým amũ ajte tẽ. Tẽn arým abatàn djã, ô pykabê Garrêjakam bôx. ⁴⁴Jeju ta ne amrêbê memã kum,

—Djãm Metindjwýnh kukwakam kabên jarênh djwýnh'ô ne abatàn djakam bôx nhym me kum rax jarênh got? Kati. Nãm me aprý, ane.

⁴⁵Jeju abatàn djãbê Garrêja jakam bôx.

Nhym kam me kum kabên mex jarê. Me kute amrêbê amũ Djeruxarêkam Jeju pumũnhkam ne me kum kabên mex jarê. Me krãptĩ kute amikukràdjã tûm mar kadjy aben pydji djã nhô akatikam ne me Djeruxarê'ýr tẽn 'ýr bôx. 'Ýr bôx ne arým kam mekôt Jeju pumũ. Nhym mýjja pumũnh kêt krãptĩ nhípêx nhym me arým omũ. Omũn kam akubyn Garrêjakam bôx. Nhym Jejudjwý kam bôx ne me'ýr bôx. Nhym me kam kum kabên mex jarê.

⁴⁶Jeju Garrêjakam bôx ne ajte krîraxbê Kanakam bôx. Kam ne amrêbê kute ngô kajgoo uba kangô nhípêx. Jeju bôx nhym onij Kapanakam me'ô bēnjadjwýr kra arým kanê. ⁴⁷Nhym me arým bēnjadjwýrmã arên kum,

—Onij, Jeju arým Djudêja kurũm katon Garrêjakam bôx, ane.

Nhym kuman arým Kana'ýr tẽn kam Jeju'ýr bôx. 'Ýr bôx ne kum,

—Ê, gu 'ýr ga imã ikrao mex gê kanê kum ire, ane. Nãm mã 'ýr kum krã. Arým kra tyk 'ýrkam ne mã 'ýr kum krã.

⁴⁸Nhym Jeju kum,

—Ga me aje amim imar kêtumrêx. Ije mýjja pumũnh kêt nhípêx ga me aje omũnhkambit ne amim ima. Mýkam? ane. ⁴⁹Nhym bēnjadjwýr Jejumã kum,

—Bēnjadjwýr, amibêx, tyk kêttri gu 'ýr tẽ, ane.

⁵⁰Nhym kum,

—Aj mã. Arým ne akra tĩn ne, ane. Nhym arým tu amim kabên markumrêx ne arým 'ýr tẽ. Amim kamnhixo tẽ. ⁵¹Tẽ: nhym kam arým 'ã

akamàt. Nhym akati nhym ajte tẽ: nhym ò àpênh ar arým kutã tẽn kajpa. Ne kum, “Arým ne akra tĩn ne”, ane.

⁵²Nhym arkum,

—Nhỹnh ne myt nhỹ nhym mexmo krax ne? ane.

Nhym kum,

—Amũja'ã myt akẽxkam ne arým kanê kum ire, ane.

⁵³Nhym amim,

—Be, Jeju kute imã, “Arým ne akra tĩn”, anhỹr majmã ne arým kanê kum ire, ane. Ne arým tu amim Jeju markumrẽx. Õ kikrekam ar kunĩdjwỳ tu amim markumrẽx.

⁵⁴Jeju Djudêja kurũm tẽn Garrêjakam bõxkam ne ajte mỳjja pumũnh kêt ja nhipêx. Me kute raxmã kator kadjy ne arým bẽnjadjwỳr krao mex.

Ngô mỳrri me'õ punu nõi.

5 ¹Jeju bẽnjadjwỳr krao mex. Nhym kam onĩj krĩraxbê Djeruxarêkam arým mebê idjaer kute aben pydji djà nhõ akati 'ỳr. Nhym Jeju arým 'ỳr tẽ. 'Ỗr tẽn kam arým 'ỳr bõx.

²Be, Djeruxarêkam ne ngõ'õ nõi. Me kute krĩraxmã mrykĩ'átomtio ngjêx djà kuri ne ngõ'õ nõi. Mebê idjaer kabẽnkam ne me ngõmã Bexeda jarẽ. Ngõ bu'ã ne kikre kre kênh amãnhkrut ne amãnhkrut ne ikjêkêt. ³Kikrekam ne me punu krãptĩ ikwã. Me no rãmẽ me mrãnh punumẽ me akrymẽ ikwã. Ngõ kute amingrêk ne me kam amako ikwã. ⁴Mỳjkõt ne ngõ amingrêk? Bir, Metĩndjwỳnh kadjy mrãnh djwỳnh ne ngõ'ỳr ban me aêrbê ngõmã wangij, ngõmã ngjêx pỳnh. Nhym arým kõt ngõ amingrêk ne. Amingrêk nhym me'õ punu kumrẽx kute memã wan noxja ne arým mex ne. Pydjibit mex.

⁵Be, Jeju Djeruxarê'ỳr bõx ne ngõ ja'ỳr bõx. Nhym me'õja me punu kõt nõi. Punu'ã ne amex krãptĩ:bê 38 apêx. ⁶Nhym arým omũn amim,

—Be, amrêbê ne me'õwã punu, ane. Ne kam kum, “Djãm amã amex prãm”? ane.

⁷Nhym punuja kum,

—Be, ngõ kute amingrêkkam djãm inhõbikwa'õ got ijo tẽn ngõmã imẽ ba on imex ne? Kati. Nã bãm te ngõ'ỳr amibêx ne nhym arým me'õ imã wan nox ne. Ba kam imex prãm kêt ne, ane.

⁸Nhym kum,

—Be, kàjmã djan anhiqwã djà krãn amỳn o tẽ, ane. ⁹Nhym arým kabẽnmẽ ro'ã mex ne ikwã djà krãn kumỳn o tẽ. Pi'òk ràràrkam, me tyk djà kêt djà nhõ akatikam ne mex ne.

¹⁰Nhym mebê idjaer rũnh omũn kum kabẽn ne kum,

—E kum pi'òk ràràr ne ja. Djãm aje kam kukràdjà mar kêt ne ate anhiqwã djà mỳn o tẽ? ane.

¹¹Nhym aminêje memã kum,

—Me'õ kute ijo mex ne imã, “Anhikwã djã krãn amỳn o tẽ”, anhỹr kôt ne ba arỳm inhikwã djã mỳn o tẽ, ane.

¹²Nhym me kum,

—Mỳj me'õ ne amã, “Anhikwã djã krãn amỳn o tẽ”, ane ga kam o tẽ? ane. ¹³Nhym, “Kon, ije mar kêt”, ane. Be, ar bu'ã ne me krãptĩ: ajkarê. Nhym Jeju arỳm me katikôt mã tẽ nhym arỳm omũnh kêt ne.

¹⁴Nhym kam Jeju Metĩndjwỳnh nhõ kikretikam kum katon kum,

—Ê, arỳm amexkam on ajaxwe krãta. Dja ga ajte ajaxwe nhym mỳjja'õ ajte ajo ajkê. Mỳjja punu kute apunu tũm jakrenh mex dja ajte ajo ajkê, ane. ¹⁵Nhym arỳm mebê idjaer rũnh'ỳr tẽn memã arẽn memã kum,

—Be, Jeju ne ijo mex, ane.

Kute me rũnhmã amikôt amijarẽnh.

Dju r 10.30

¹⁶Jeju kute pi'ók rårarkam meo mexo bakam ne mebê idjaer rũnh kum kurêo ba. Ne kam arỳm abenmã kum, “Gwaj on kubĩ”, anhỹro ba.

¹⁷Nhym Jeju arỳm memã kum,

—Be, Ibãm ne pi'ók rårarkam àpẽn ar ba. Ba kudjwa kam idjapẽn ar iba, ane. ¹⁸Nhym me arỳm abenmã kum,

—Be, Jeju gwaj bapãnh pi'ók rårarkam àpẽn ba. Djãm jabit? Kati. Tãmwã ta ne amijo 'êx ne Metĩndjwỳnh bãm ne raxo amiptãro ba, ane. Me abenmã anen arỳm we Metĩndjwỳnh ngryk ne kute Jeju bĩnmã kangrõnh tỳx ne.

¹⁹Nhym kam Jeju amipãnh memã kum,

—E kum, mrãmri ne ba ibê Metĩndjwỳnh Krakumrêx. Djãm ba ipydji ne ba idjapẽn got? Kati. Ibãmmê ne bar idjapẽn'h'ã ajkrut. Ne ba ren ipydjin ren ije meo mex kêt. Ibãm djapẽn ne ba omũn arỳm àpẽn o idjapẽn. Ibãm djapẽn kunikôt ne ba kudjwa ã idjapẽnho ane. ²⁰Be, mỳkam? Bir, Ibãm kum ijabêkam. Ne kam arỳm imã amidjapẽn kunĩ jakre ba kôt ipêx. Dja ã imã mỳjja pumũnh kêt ra:x kwỳ jakre ba arỳm ipêx ne. Dja mỳjja raxo ajbir ije ipêxa jakrenh mex ne. Dja ba ipêx ga me te aje marmã kam ano tyn aku'ê. ²¹Ba Ibãm kôt akubyn me tyko tĩn. Kute Ibãm ta kute akubyn me tyko tĩn pyrãk ne ba ã meo ane. Dja ba imã me tyk akubyn o tĩn kĩnh ne arỳm ã meo ane nhym me arỳm akubyn tĩn. ²²Dja ba me axwe kukjan memã ikaton kam memã axwe pãnh jarẽnhdjwỳ. Ibãm kute me'omã axwe pãnh jarẽnh kêt. Ta ne imã,

“Ga dja ga me kunĩmã axwe pãnh jarẽ”, ane.

²³Be, mỳj kadjy ne ijã memã axwe pãnh jarẽnh djwỳnh mẽ? Bir, dja ba memã axwe pãnh jarẽ nhym me arỳm ijo bẽnjadjwỳr ra:x ne. Dja me ijo bẽnjadjwỳr ra:x mrãmri me kute Ibãmo bẽnjadjwỳr rax pyrãk. Ja kadjy ne ijã memã axwe pãnh jarẽnh djwỳnh mẽ. Be, djãm me kute imã ikajgo jarẽnhkam kute Ibãmmã rax jarẽnh got? Kati. Dja me imã irax jarẽnh kêt ne arỳm Ibãmdjwỳmã rax jarẽnh kêt. Ta ne ijano ba tẽ.

²⁴Dja me tu amim ikabên markumrêx ne tu amim kute ijanor djwýnh markumrêx ne arým kunĩ Metĩndjwýnhkôt tĩn ne ar ba rã'ã: rã'ã ne. Dja ba me jamã axwe jarênh kêtumrêx. Amrêbê ne me ja Metĩndjwýnhbê amakkre kêt kute mrãmri ne me tyk amakkre kêt pyrãk. Ne kam arým jakam Metĩndjwýnhkôt tĩn ne ar ba rã'ã: rã'ã ne. Mrãmri ne ba me amã ja jarênhkumrêx. ²⁵Dja me tyk ĩ ikabên ma. Ibê Metĩndjwýnh Kraja ikabên ma. Ne kam me kute ikabên mar kunĩ dja me akubyn tĩn. 'Á akati arým me bajo rãm ne ja. Arým ije kum o kraxmã. Mrãmri ne ba me amã ja jarênhkumrêx.

²⁶Be, mỳj ne ikam kute ba memã ikabên nhym me akubyn tĩn? Bir Ibãmmê ije aben pyrãk. Kam ne ba memã ikabên nhym me akubyn tĩn. Ibãm ta ne tĩn ne ta kute mỳjja kunĩmã tĩn jangjêho ba. Ibãm kabên kôt ne ba kudjwa itĩn ne ije mỳjja kunĩmã tĩn jangjêho iba. ²⁷Ne Ibãm kabênkôt dja ba memã axwe pãnh jarênhdjwý. Arým ije amijo inhĩkam dja ba ã meo ane.

²⁸Be, ije me amã, “Dja me tyk ikabên man akubyn tĩn”, anhỹrkam kwãrĩk wãnh te aje marmã ikam ano tyk kêt. Mrãmri dja pyka krãkam me tyk kunĩ ikabên man akubyn kato. ²⁹Me mex ne ukaprĩ dja me akubyn tĩn. Dja me Metĩndjwýnhkôt tĩn ne ar ba rã'ã: rã'ã ne. Nhym me axwedjwý dja me akubyn tĩn. Ije memã axwe pãnh jarênh kadjy dja me akubyn tĩn.

³⁰Be, djãm ipydji ne ba ar iba? Kati. Ba ipydji, idjãpênh ne ikabên kêt. Ibãm kabên o ne ba ikabên. Ibãm ne imã me axwe jakre ba kôt me axwemã ikaton kam memã pãnh jarê. Djãm ije amidjwýnhbito kĩnhmã? Kati. Ibãm kute ijanor ne ba ije o kĩnhmã. Kabênkôt ije katãt me axwemã ikatorn kam pãnh jarênhkumrêx.

³¹Be, djãm ipydji ne ba me amã amijarê? Kati. Ba ren ipydjin me amã amijarê ga me ren mrãmri ijã, “Kati. Kabên kajgo”, ane. ³²Nhym be, kati. Me'ôdjwý ne ikukãm ijã me amã ujarênhkumrêx. Katãt me amã ijã ujarênhkumrêx. Ja ne ba arým ije mar.

³³Be, me ga ne ga me amrêbê Djuão'ỳr me akwý jano. Nhym me Djuão'ỳr bôx ne kukij. Nhym arým katãt me amã ijã ujarênhkumrêx ga me arým ama. ³⁴Be, djãm kute kabêno Ibãm jakrenh got ba me amã Djuão jarê? Kati. Pykakam me'ô kute kabêno Ibãm jakrenh kêt. Be, mỳj kadjy ne ba me amã Djuão jarê? Bir, me aje amijã Djuão kabên markumrêx nhym Metĩndjwýnh kute me ajaxwebê me apytãrmã ne ba me amã arê. ³⁵Djuão ne kute mrãmri ne ngônhpók nhirã pyrãk ne ar ba. Nãm me amã kabên mex jarêho ba. Ga me ren tu amim kabên markumrêx ne ren amijo aba mex rã'ã. Nhym be, kati. Djuão kute me amã arêho bakam ga me aje mar 'ikrãn ne akĩnh 'ikrãn ne.

³⁶Be, Ibãmdjwý ne kute imã,

“Ije amã adjãpênh djã jarênhja dja ga inomã amê”, anhỹr ne kute prĩne imã 'ã karô ba arým kôt idjãpênh iba. Ba mỳjja pumũnh kêt nhipêxo iba ga me arým omũ. Idjãpênh ja kute iraxo amirĩto Djuão jakrenh mex. Ga me ren aje idjãpênh pumũnhkam ren arým mrãmri iraxmã akatorkumrêx. Ibãm kute ijanorkôt ne ga me ren imã akatorkumrêx.

³⁷Ibām ta kute ijanor ne arým ijā ajarē. Djām me aje ôkre mar ne ĩ pumũnh got? Arkati. ³⁸Ga me ren aje amim Ibām kabēn mar prām ne ren tu amim imarkumrēx. Nhym be, kati. Ibām kute ijanor djwýnh ta ne arým mã amā ijā ajarē ga me aje amim kabēn 'amýnh kêt ne mar prām kêt. ³⁹Goja prĩne Metĩndjwýnh kabēn'ā pi'ók no'ók pumũ. Me ga ne ga me 'ā amim, “Dja ba arēnho iban Metĩndjwýnhkôt itĩn ne ar iba rā'ā: rā'ā ne”, anhỹro aba. Me aje amim anhỹrkam goja prĩne amim omũn ama. Pi'ók tāmkam ne Metĩndjwýnh ba ijā ajarē. ⁴⁰Nām te pi'ókkam ijā ajarē ga me ikôt abikamēnh kêt. Ga me ren Metĩndjwýnhkôt atĩn kadjy ren ikôt ajkamē. Nhym be, kati. Me aje ikôt abikamēnh prām kêtumrēx.

⁴¹Djām me aje imā, “Araxkumrēx”, anhỹrmā? Djām irax ja ne ba abej? Kati. ⁴²Be, mýkam? Bir, me amā kàjkwakam Metĩndjwýnh jabē kêtumrēx ije irax ja jabej kêt. Arým ije me amar. ⁴³Ibām kukwakam ba tēn me awýr bôx ga me aje amim imar kêt. Me'ô kâtām ta dja tēn me awýr bôx ne ta amiraxo àmra ar ba ga me arým tu amim markumrēx.

⁴⁴Be, me ga ne ga me amirax jabej mã amim, “Ba gêt ba amibēn gē me imā irax jarē”, anhỹro aba. Ne kam aje amim, “Ba Metĩndjwýnhmābit amijarē gē ta ijo rax”, anhỹr kêtumrēx. Aje amim, “Ba gêt irax. Ba gêt irax”, anhỹro abakam aje amim Metĩndjwýnh mar prām kêtumrēx.

⁴⁵Djām ba dja ba Ibāmmā me ajaxwe jarē? Kati. Ga me akukāmāre Môjdjē kanàrrām ar amijo aba. Ta ne arým Metĩndjwýnhmā me ajaxwe jarēnho dja. ⁴⁶Djām mrāmri ne ga me aje tu amim akukāmāre Môjdjē kabēn markumrēx? Kati. Ga me ren tu amim Môjdjē kabēn markumrēx ne ren badjwý tu amim imarkumrēx. Ta ne ikukām ijā ajarēn ijā pi'ók no'ók. Kam ga me ren amim kabēn jarēn ren tu amim imarkumrēx.

⁴⁷Nhym be, kati. Me aje amim Môjdjē kabēn mar kêt ne aje kôt amim badjwý ikabēn mar kêt. Nām ā Jeju pi'ók rārārkam kute me'ô punuo mexkam mebē idjaer rũnhmā ane.

Kute djwýo mebē 5.000o djuw mex.

Mat 14.13; Mak 6.30; Ruk 9.10

6 ¹Nām memā anen kam arým amũ tē. Tē:n kam arým imôtibē Garrêja nhikjēmā rê. Imôti nhidji 'ôdjwýbē Xiberij. ²Nhym kam me krāptĩ kôt mō. Ôbē Jeju kute mýjja pumũnh kêt kwý nhipêx nhym me kute omũnhkam ne me kôt mō. Nām me punu krāptĩo mex nhym me omũn arým kôt mō. ³Kôt mō nhym Jejumē kôt ba djwýnh ar me kukām mō. Mō:n krānh'ā wabi. Ābir tē:n arým kam nhỹ. ⁴Be, arým ne Djeruxarēkam mebē idjaer kute aben pydji djā nhō akatija bôx 'ýr. Me kute Metĩndjwýnh me kukāmāre nhirôbē mrānhja mar kadjy ne arým ô akati 'ýr.

⁵Ar krānh'ā nhỹ nhym kam Jeju amipānh rĩt. Nhym nĩnh me krāptĩ: kôt mō nhym me omũ. Ne kam Piripimā kum,

—Jām dja gwaj tēn me kadjy djwý kwý by? ane. ⁶Be, djām kute amikukām amimar kêt ne Piripi kukij? Kati. Kute prĩne amikukām

amimar. Be, mỳkam ne kukij? Bir, Piripi kute mrãmri amim tu markumrẽx jabej ne kukij. ⁷Nãm kukij nhym Piripi kum,

—Tô gêt kon. Gwaj banhõ pi'òk kaprĩ'ã akrekam kubê denarjuo 200bit. Ne gwaj ren pi'òk kaprĩ jao ren me kadjy djwỳ by nhym ren me krãptĩ abenmã kokjêr kryre nhym ren me krãptĩ:'ã djwỳ kêt, ane.

⁸Nhym Jejukôt ba djwỳnh 'òdjwỳja nhidjibê Ängre. Ximão Pedrumê ar axikôt apõx. Ängreja kum,

⁹—Ota jakam me'õ bõktire nhõ djwỳmẽ tepprãremẽ. Xewadao djwỳ nhipêx amãnhkrut ne amãnhkrut ne ikjêkêt. Ne tepprãre amãnhkrut. Nhym be, me krãptĩ:. Mỳj dja gwaj djwỳ ngrirejao me on? ane.

¹⁰Nhym Jeju arkum,

—Ar memã arê gê me nhỹ, ane. Be, bõre ne pyka wãkam kumex ne. Jeju arkum ane nhym ar arỳm memã arê. Nhym me arỳm bõrekam nhỹ. Me krãptĩ: kubê 5.000 ne me nhỹ. ¹¹Nhym kam Jeju arỳm djwỳ jamỹ. Ne kam arỳm o Metĩndjwỳnhmã amikĩnh jarê. O kum amikĩnh jarên arỳm kôt ba djwỳnhmã kungã. Nhym ar me krãptĩmã kungã. Nãm ã tepprãredjwỳo ane.

¹²Nhym me õ kwỳ krê:n arỳm ajne. Nhym Jeju kôt ba djwỳnhmã kum,

—Dja gar djwỳ janhy karwà. O bikênh kêt kadjy, ane. ¹³Nhym kam ar karwàn kaxnokai pỳnh djàri kam kungij. Nhym kam kaxnokaibê 12 ipu. Be, xewadao djwỳ amãnhkrut ne amãnhkrut ne ikjêkêt janhy 'ã kàtàm ne ja.

¹⁴Nhym me arỳm kute mỳjja pumũnh kêtja pumũnhkam abenmã kum,

—Be, Metĩndjwỳnh kukwakam kabên jarênh djwỳnh ja ne me amrêbê arê. Me memã kum, “Dja pykamã bõx”, anhỹro ba. Be, kôt ne Jeju arỳm jakam bõxkumrẽx, ane.

¹⁵Nhym Jeju arỳm me kuman amim,

—Got ba ren arek dja nhym ren me tu ijo tỳm ne ijã bẽnjadjwỳr rax mẽ. Djãm on pykakam memã inhỹr prãm got? ane. Ne kam arỳm mebê tẽn amũ krãnh'ã wabin ate ar ba.

¹⁶Nhym kam arỳm para. Nhym kôt ba djwỳnh tẽn arỳm imõtĩ'ỳr ruw.

¹⁷Ne kam arỳm kà'òkam wadjàn nox ne. Amũ akàx nhikjê mã krĩraxbê Kapana'ỳr mORMã ar arỳm nox ne. 'Ỳr mORM: nhym ar'ã arỳm akamàt ne. Nhym kraxje Jeju ar'ỳr bõx kêt rã'ã.

¹⁸Ar mORM: nhym arỳm kôk 'itỳx wabê nhym kam ngô amijapĩn tỳx ne. ¹⁹Nhym ar ngô rênho mORM arỳm ajbubê tỳm ne. Ar mORM'ã arỳm kirometubê 5 apêx. Nhym Jeju nĩnh arkôt tu ngô'ã tẽn nhym ar omũ.

Nhym arỳm aro rãm ne ja nhym ar arỳm tĩn prãm ne. ²⁰Nhym arkum,

—Ar atĩn prãm kêt. Ba ne ba ar akôt tẽn, ane. ²¹Nhym ar kabên man arỳm kĩnh ne. Ne kum,

—Amrê ar ikôt kãmã wadjà, ane. Nhym arỳm wadjàn nhỹ. Nhym ỳrmẽ ro'ã ar arỳm akàx nhikjê'ỳr bõx. Kapanakam ar bõx.

²²Jeju ar akàx nhikjêkam bôx nhym ar'ã akati. Nhym kam amũ akàx nhikjêbê me te ar ô kà jabej. Me krãptĩ kute amũja'ã djwỳ krênja ne te ar ô kà jabej ne abenmã kum,

—Be, amũja'ã kà pydjibit nõ nhym ar o mō. Kôt ba djwỳnhbit mã o mō nhym Jeju arkôt kàkam ýr kêt. Nãm me krãptĩ te ar ô kà jabejn kam ã abenmã ane.

²³⁻²⁴Ne kam me kute Jeju ar omũnh kêt kam ar'ýr mō. Me kà kwỳkam wadjàn akàx nhikjêMã Kapana'ýr nox ne mō. Be, nhỹnh kà ja'ókam ne me mō? Bir, krĩraxbê Xiberijkam kà 'ókam ne me mō. Xiberijkam kà kwỳ arým me ku'ê djà'ãnh mō. Bẽnjadwỳr djwỳnh kute Metĩndjwỳnhmã amikĩnh jarẽnh nhym me kute djwỳ krẽn djà'ãnh ne arým kà mō. Kà kwỳ jamã ne me wadjàn amũ kôt mō. Me kute Jeju jabej kadjy ne me Kapana'ýr mō.

Kute amijã djwỳ jakren 'ã ujarẽnh.

²⁵'Ýr mō:n kam imôti nhikjêMã bôx. Bôx ne abej ne arým kum kato. Jejumã katon arým kum,

—Ujarẽnh djwỳnh, tô nhỹnh ne myt nhỹ ga jakam bôx? ane.

²⁶Nhym memã kum,

—Be, mỳkam ne ga me ijabej mō? Djãm amũja'ã ije mỳjja pumũnh kêt kwỳ nhipêx ga me aje omũnhkam? Djãm arým me aje kôt iraxmã akatorkam? Djãm me aje ajte irax marmã ne ga me ijabej mō? Arkati. Be, me ajajnekam. Me aje djwỳ krẽn ne me ajajnekam ne ga me ijabej mō. Mrãmri ne ba me amã ja jarẽnhkumrêx.

²⁷Kwãrĩk wãnh djwỳkôtbit ajamak bẽn kêt. Tãm dja akuno. Nhym be, atemã mỳjja kute djwỳ pyræk. Jakôt dja ga me ajamak bẽn. Tãm ne mex rã'ã nhym ô'ã me Metĩndjwỳnhkôt tĩn ne ar ba rã'ã: rã'ã ne. Ba ije amijo inhĩ dja ba me amã kungã ga me atĩn ne ar aba rã'ã: rã'ã ne. Bir, Ibãm kute imã 'ã karõ. Kabẽnkôt dja ba me amã kungã. Kàjkwakam Ibãm, Metĩndjwỳnh ta ne mrãmri kute 'ã imã karõ mãmdji, ane.

²⁸Nhym me kum,

—Be, mỳj dja ba me Metĩndjwỳnhmã idjapênh o nhym arým kum me ikĩnh? ane.

²⁹Nhym,

—Metĩndjwỳnh ne ijano ba tẽ. Kôt dja ga tu amim imarkumrêx. Kum adjapênh ne ja. Dja ga me ã ane nhym arým kum me akĩnh, ane.

³⁰Nhym me kum,

—Goja mỳjja pumũnh kêt'õ nhipêx ba me omũ. Ba me ije araxmã ikator kadjy omũn kam goja tu amim amarkumrêx. ³¹Be, me bakukãmãre ne me kapôt kukritkam djwỳbê mỳj ne ja krẽ. Me bakukãmãre ne me 'ã pi'òk no'òk ne kamã memã kum,

“Me kute krẽn kadjy ne memã kàjkwa kurũm djwỳ ngã”, ane. Goja kudjwa ã me imã o ane ba me omũ, ane.

³²⁻³³Nhym amijã djwỳkumrêx jakren memã kum,

—Be, Môjdjê kute me akukãmãremã kàjkwa kurũm djwỳ nhõr kêt. Nhyim be, Ibãm kute me amã kàjkwa kurũm atemã djwỳkumrêx nhõr. Me'õ ne arỳm kàjkwa kurũm ruw ne kute me kunĩmã tĩn jangjênh. Kute memã tĩn jangjênh nhyim me tĩn ne ar ba rã'ã: rã'ã ne. 'Ã ne ije me amã,

—Metĩndjwỳnh kute me amã atemã djwỳkumrêx nhõr, anhỳr. Mrãmri ne ba me amã ja jarênhkumrêx. Nãm Jeju ã memã ane.

³⁴Nhyim me kum,

—Bênjadjwỳr djwỳnh, goja mã me imã djwỳ ja nhõro nhỹ, ane.

³⁵Nhyim Jeju memã kum,

—E kum, ba. Ba ne ba ije atemã djwỳ pyræk. Ba ne ba ije memã tĩn jangjênh nhyim me tĩn ne ar ba rã'ã: rã'ã ne. Dja me mã ikõt ajkamên arỳm kĩnhkumrêx rã'ã kute mrãmri ne me arỳm kum prãm kêt kam kĩnh pyræk. Dja me tu amim imarkumrêx ne arỳm kĩnhkumrêx rã'ã kute mrãmri ne me arỳm kum kôr kêt kam kĩnh pyræk. ³⁶Be, djãm me aje tu amim imarkumrêx got? Kati. Ba ne ba arỳm me amã, “Nã gãm me te ipumũn amim imar kêt”, ane.

³⁷Be, Ibãm kute ikadjy memã amak bõnhja kunĩ dja me tu amim imarkumrêx ne arỳm mã ikõt ajkamê. Ba kam me'õ kanga kêt kumrêx.

³⁸Mỳkam dja ba me'õ kanga kêt kumrêx? Bir, Ibãm kute me'ã imã karõ kõt dja ba me'õ kanga kêt. Be, djãm ba ije amijã amim karõ kõt ne ba kàjkwa kurũm ruw ne ar iba? Kati. Ibãm kute ijanor djwỳnh kabên kõt ne ba ruw ne ar iba.

³⁹Ibãm kute ijanor djwỳnh ta ne ijã amim karõn amim, “Be, ije kadjy memã amak bõnhja dja ikra mã meo ban 'õo biknor kêt nhyim me akubyn tĩn ne. Pykakam me kunĩ kute aminhinomã amimênh djã nhõ akatikam dja ikra akubyn õ me jao tĩn”, ane. ⁴⁰Ibãm kute ijanor djwỳnh ajte ijã amim karõn amim, “Me kute ikra pumũnh ne tu amim markumrêxja dja me kunĩ ikõt tĩn ne ar ba rã'ã: rã'ã ne”, ane. Ibãm kute ijã amim karõ ne ja. Pykakam me kunĩ kute aminhinomã amimênh djã nhõ akatikam dja ba akubyn inhõ me jao tĩn, ane.

⁴¹Nhyim kam mebê idjaer rũnh arỳm kàxã kabên kumex ne arê. Kute memã, “Ba ibê kàjkwa kurũm djwỳ”, anhỳrkam ne me kabên kumex jarê.

⁴²Ne abenmã kum,

—Be, djãm kubê Metĩndjwỳnh Kra got? Kati. Jõdje ne kudji. Idjibê ne Jeju. Ba me ije nãmê bãm pumũnh tũm. Nhyim amijo 'êx ne gwaj bamã,

—Kàjkwa kurũm ne ba ruw, anhỳro ba. Kati. Nãm 'êx. Nãm me ã abenmã ane.

⁴³Nhyim Jeju me kabên man memã kum,

—Kwãrĩk wãnh ikàxã akabên kumex ne arênh kêt. ⁴⁴Be, djãm me ga dja ga me ikõt ajkamê? Kati. Ibãm kute ijanor djwỳnh kute memã amak bõnhkambit ne me mã ikõt ajkamê. Mã ikõt ajkamê ba arỳm akubyn meo tĩn. Pykakam me kunĩ kute aminhinomã amimênh djã nhõ akatikam dja ba akubyn meo tĩn.

⁴⁵Amrêbê: ne me bakukãmãre Metĩndjwỳnh kukwakam kabên jarên memã kum,

“Metĩndjwỳnh ta dja memã amikabên jarê nhyim me arỳm kabên markumrêx”, ane.

Be, me bakukãmäre kute memã anhỹr ne 'ã pi'ók no'ók kôt mỳj xê dja mã ikôt ajkamẽ? Bir, Ibãm kute memã kabẽn jarẽnh nhym me arỳm kute kabẽn markumrẽx. Me kute mỳjja'ã kute kabẽn jarẽnhja markumrẽx. Me ja dja me mã ikôt amijo bikamẽnhkumrẽx. Nãm ã Jeju memã ane.

⁴⁶Ne kam ajte memã kum,

—Be, djãm me'õ ne arỳm Ibãm pumũ got? Kati. Bajbit ne ba arỳm kàjkwakam Metĩndjwỳnh pumũn arỳm kurũm tẽn bõx. Bajbit ne ba arỳm Ibãm pumũ.

⁴⁷Me kute tu amim imarkumrẽx arỳm Metĩndjwỳnhkôt tĩn ne ar ba rã'ã rã'ã ne. Mrãmri ne ba me amã ja jarẽnhkumrẽx. ⁴⁸Ba ne ba ije atemã djwỳ pyræk. Ba ne ba memã tĩn jangij nhym me Metĩndjwỳnhkôt tĩn ne ar ba rã'ã rã'ã ne.

⁴⁹Be, me bakukãmäre ne me kapõt kukritkam djwỳbê mỳj ne ja ku nhym mebêngêt tũmràm me kupa. ⁵⁰Ije me amã atemã djwỳ jarẽnhja ne kubê kàjkwa kurũm djwỳ. Dja me kukun tyk kêt. ⁵¹Ba ne ba ije atemã djwỳ pyræk. Ba ne ba memã tĩn jangij. Dja me djwỳ ja krẽn Metĩndjwỳnhkôt tĩn ne ar ba rã'ã: rã'ã ne. Djwỳ ije memã òrja ne kubê inhĩ. Me kunĩ tĩn kadjy dja ba memã kungã, ane.

⁵²Nhym kam mebê idjaer rũnh arỳm kabẽno aben japan abenmã kum, —Je tô, mỳj dja memã aminhĩ nhõr on nhym me ajmã krẽnja on? ane.

⁵³Be, djãm mrãmri ne me kute ikumrẽx krẽnãm? Kati. Atemã. Be, mrãmri me kute tu amim Jeju markumrẽxo bamã. 'Ã ne Jeju me kute ã krẽn jakren 'ã me kute kamrõo kôm jakre. 'Ã ne memã kum,

—Be, ba ije amijo inhĩ dja ga me inhĩ krẽn kêt ne ikamrõo akôm kêt ne kam atĩnkumrẽx prãm kêt. Mrãmri ne ba me amã ja jarẽnhkumrẽx. ⁵⁴Me kute inhĩ krẽn ne ikamrõo kôm ne me mrãmri Metĩndjwỳnhkôt tĩn ne ar ba rã'ã: rã'ã ne. Pykakam me kunĩ kute aminhinomã amimẽnh djã nhõ akatikam dja ba akubyn meo tĩn. ⁵⁵Mrãmri ne inhĩbê djwỳ ne ikamrõbê me kôm djã. ⁵⁶Me kute inhĩ kur ne ikamrõo kômja, me jamẽ ne ba me ije aben mar tỳx ne ije aben jamỳnh tỳx ne abenã idjukanga kêt ne ar abeno iba. ⁵⁷Mrãmri Ibãm tĩnkumrẽx ne ijano ba tẽ. Kam ne ba Ibãm tĩn o itĩnkumrẽx. Nhym me kute inhĩ kurdjwỳ dja me ba itĩn jao tĩnkumrẽx.

⁵⁸Ije amã atemã djwỳ jarẽnh ja ne kàjkwa kurũm ruw. Djãm kute djwỳbê mỳj ne ja pyræk? Kati. Nãm me te mỳj ne ja ku nhym mebêngêt arỳm me kupa. Nhym be, ate dja me atemã djwỳ ja kun arỳm Metĩndjwỳnhkôt tĩn ne ar ba rã'ã: rã'ã ne. Nãm ã Jeju memã ane.

⁵⁹Mebê idjaer bikprõnh djàkam ne Jeju memã ja jarẽ. Kapanakam me bikprõnh djàkam. ⁶⁰Kute memã aminhĩ'ã djwỳ jarẽnh ne memã 'ã ujarẽnhkam ne me kôt baja krãptĩ arỳm amim,

—Je, djãm me ije kabẽn wã mar got? ane.

Me krãptĩ kute Jeju kanga.

⁶¹Nhym Jeju ta arỳm me kuman memã kum,

—Ba arỳm me amã atemã djwỳ jarẽ ga me aje amim imar kêt ne arỳm apijãm ne. ⁶²Dja ba ã ikrĩ djã tũmmã wabi ga me idjãbirkôt ipumũ. Mỳj dja

ga me arým kam nê? ⁶³Be, atemã kàjkwakam ikabên kukràdjà ne ba me amã arê. Metíndjwýnh Karô kute meo bakambit ne me kute ikabên mar. Me ga ne ga me aje amidjwýnho kînh prãm. Kam me aje imar kêtumrêx. Nã bãm me amã ikabên jarê, me amã Metíndjwýnh Karô jarê. Tãm ne kute meo ban memã tîn jangij nhym me Metíndjwýnhkôt tîn ne ar ba rã'ã: rã'ã ne.

⁶⁴Be, djãm me akunĩ ne ga me aje tu amim imarkumrêx? Kati. Me akwý ne ga me aje amim imar kêt, ane. Nãm Jeju ã memã ane. Be, mýj ne me mar on kam ã memã ane? Bir, amrêbê mýjja kunĩ kêttri ne Jeju kute amikukãm me mar. Apýnh me ĩ djãri kute amim mar kêtja arým kute me mar. Djudadjwý dja ĩ kurê djwýnhmã Jeju kanga. Nhym arým kute adjwýnhdjwý mar. Kukãm kute mar. ⁶⁵Ne kam memã kum,

—Me akwý ne ga me aje amim imar kêt. Ba kam arým me amã, “Djãm me ga dja ga me ikôt ajkamê? Kati. Ibãm kute memã amak bônkhambit dja me mã ikôt ajkamê.” Nãm ã Jeju memã ane.

⁶⁶Nhym kam me kôt baja krãptĩ arým kubê amijo akêx ne ajte kôt ba kêt.

⁶⁷Nhym kam Jeju kute ar anorjabê 12mã kum,

—Djãm ar gadjwý dja gar ikanga? ane. ⁶⁸Nhym ar 'ôbê Ximão Pedru kum,

—Kati. Bênjadjwýr djwýnh, mýj me'ôkôt dja bar ar iba? Arkati. Gajbit ne ga akabêno meo tîn ne 'ã ar imã adjujarênh ar aba. Metíndjwýnhkôt me tîn ne ar ba rã'ã: rã'ãja'ã ar imã adjujarênh ar aba. ⁶⁹Ar ba ne bar tu amim amarkumrêx. Mrãmri abê me inhô Bênjadjwýrbê kumkatibê Kritu. Mrãmri abê Metíndjwýnh Kra. Metíndjwýnh tînkumrêx Kra. Ar ba ne bar tu amim amarkumrêx.

⁷⁰Nhym Jeju arkum,

—Be, mrãmri ne ba amijo ar apytàrkumrêx. Ije ar ajanorbê 12 ne ba amijo ar apytàrkumrêx. Be, djãm ar akunĩ ne gar amex? Kati. Ar ajô apydji ne abê Xatanaj nhô àpênh, ane. ⁷¹Djuda'ã ne kabên. Djuda Ikadji. Ximão 'ôdjwý kute irja. Dja ĩ kurê djwýnhmã Jeju kanga. Kute ar anorjabê 12'ô ja dja kanga.

Djeruxarêkam me krãptĩmã 'ã ujarênh.

7 ¹Jeju memã anen kam arek Garrêjakambit ar ba. Be, mýkam ne Djudêjakam arek ar ba kêt? Bir, mebê idjaer kute kam bînmã ar abej bakam. ²Nhym kam arým Djeruxarêkam mebê idjaer krãptĩ kute aben pydji djã nhô akati 'ýr. Me kute aben kajmã'ã me bakukãmãre kukràdjã mar kadji bô mjýrkam krĩ djã nhô akati 'ýr.

³Nhym kam Jeju kamy ar axikôt apôxja kum,

—E kum, goja amũ pykabê Djudêja'ýr tẽ. Dja wãkam akôt me ba djwýnh adjàpênh kôt apumũ. ⁴Djãm me'ô kute me kunĩmã amiraxo amirĩt prãmkam kute mebê amijo bipdjur prãm got? Aje mrãmri mýjja pumũnh kêt nhípêx jabej goja pyka kunĩkôt me kunĩmã amijo amirĩt, ane. ⁵Be, nãm ar te Jejumẽ axikôt apôx ne amim mar kêt. Kam ne ar ã kum ane.

⁶Nhym Jeju arým arkum,

—Je djām kraxje me kute ijo tỹm djā nhõ akati iwỳr bõx kêtjakam gar kam imã arẽ? Kati. Ar gajbit akati kunikõt ar adjumar mex rã'ã. ⁷Nhỹnh ne pykakam me axwe 'õ kum akurêmã? Arkati. Nhym be, ba, me kum ikurêkumrêx. Ije me axwe'ã memã idjujarênh ar ibakam me kum ikurêkumrêx. ⁸Ar gajbit dja gar Djeruxarêkam me krãpti kute aben pydji djà'ỳr mō. Inhõ akati iwỳr bõx kêt rã'akam 'ỳr itēm prām kêt. ⁹Nām arkum anen arek Garrêjakam ar ba.

¹⁰Nhym kam kamy ar arỹm tẽ. Nhym ar ba:n kam amipdjun arỹm me kute aben pydji djà'ỳr tẽ. 'Ỳr tẽ:n arỹm 'ỳr bõx. ¹¹Nhym arỹm 'ã me kute aben pydji djā nhõ akati bõx nhym mebê idjaer rũnh arỹm abej ne memã kum, “Nhỹnh ne Jeju dja”? ane. Nhym me “Kon”, ane.

¹²Nhym me me kàxã abenmã Jeju jarênh kumex. Me kwỳ ne me abenmã kum, “Kati. Jeju mexkumrêx”, ane.

Nhym me kwỳ arĩk abenmã kum,

—Kati. Nām Jeju amijo 'êx ne me noo biknoro ba, ane. ¹³Nhym be, nãm me me ipõkri memã Jeju'ã ujarênh amirĩt kêt ne. Mebê idjaer rũnh pymaje ne me me ipõkri 'ã ujarênh amirĩt kêt ne.

¹⁴Nhym kam arỹm me kute aben pydji djā nhõ akati nhõkre djā kõt Jeju arỹm Metĩndjwỹnh nhõ kikreti'ỳr tẽn wadjàn kam arỹm memã kukràdjā jarênh dja. ¹⁵Nhym kam mebê idjaer rũnh te kute Jeju marmã kam no tyn kumex ne abenmã kum,

—Je tô djām tāmwã kute mekõt pi'òk jarênh tũm got ã me kukràdjā jarênh mexo ane?

¹⁶Nhym Jeju memã kum,

—Djām ba ikukràdjā ne ba me amã arênh iba? Kati. Kute ijanor djwỹnh kukràdjā ne ba me amã arênh iba. ¹⁷Gêdja ga me ajõ ga aje kukràdjā kõt amijo aba prām jabej arỹm ama. Me'õ kute ikukràdjā jarênhmo krax djwỹnhja dja ga me ama. Djām ba ne ba ije me amã ikukràdjā jarênhmo krax djwỹnh? Kati. Kàjkwakam Metĩndjwỹnh ne kute arênhmo krax ba kam kõt me amã arẽ. Ja dja ga me ama. Me aje kukràdjā kõt amijo aba prām jabej ama. ¹⁸Ne ga ren me ajõ ga amirax jabej ne ren 'ã memã amijarên memã amijo adjāmra ar aba. Nhym be, kati. Kute ijanor djwỹnh ne ba ije rax jarênh. Ije ajbit rax jarênh ne kam katāt ije ikabên jarênhkumrêx ne ijêxnhĩ kêtumrêx.

¹⁹Me bakukãmāre Mōjdjê kute me amã Metĩndjwỹnh kukràdjā jarênhja djā ne ga me kõt ar amijo aba? Kati. Ga me ajõ aje kukràdjā kõt ar amijo aba kêt. Ne kam aje ibĩnmã ijabej ar aba. Mỳkam? ane.

²⁰Nhym me kum,

—Je tô nhỹnh me'õja ne kute abĩnmã ajabej ar ba? Be, me karõ punu'õ ne ajo ba, ane.

²¹Nhym Jeju arỹm memã kum,

—Be, ba amrêbê me'õ punu pydjio mex ga me te aje mỳjja marmã ikam ano tyn akumex. ²²⁻²³Nã bãm pi'òk rārarkam me'õo mex ga me arĩk ijã abenmã kum,

—Pi'ók ràràrkam ne apê. Axwekumrêx, anhÿro aban arÿm ikam angryk ne. Djãm bajbit ne ba kam idjápênh iba ga me bajbit imã ijaxwe jarê? Kati. Me gadjwÿ ne ga me pi'ók ràràrkam adjápênh aba. Môjdjê ne me amã me my nhinhu kà rênh jarê. Djãm ta ne kumrêx arê? Kati. Me bakukãmãre Abraão ar kumrêx ne ar arê. Ga me kam aje katàt Môjdjê kukràdjà kôt amijo aba kadjy pi'ók ràràrkam adjápênh ne me my kà rênho aba. Mÿkam ne ga me bajbit imã ijaxwe jarê? Ije kam prïne me'õ punuo mexkam imã ijaxwe jarê. Ga me ren imã ijaxwe jarênh kêt. ²⁴Kwãrik wãnh ga me arik me axwe kêt'ã axwe janhôr kêt. Dja ga me mrãmri me axwekumrêxkôt memã ajapôxkumrêx ne kam arÿm katàt memã axwe jarênhkumrêx. Nãm ã Jeju memã ane.

Mebê idjaer kum kurê.

²⁵Nhym kam Djeruxarêkam me ar ba tũm kwÿ Jeju jabej aben kukij ne abenmã kum,

—Je, djãm mrãmri me kute tãmwã bĩnmã ar abej ba? ²⁶Nhym kam kum me uma kêt ne memã kabên ne. Nhym me arÿm kutã kute kum mÿjja'õ jarênh prãm kêtumrêx. Bãrãm me rũnh arÿm kute tãmwã'ã amim, “Jejubê ne me banhô Bẽnjadjwÿrbê kumkatibê Kritu”, anhÿrkam ne me anhikrên kabên maro dja. ²⁷Tô nhÿnh? Be, kati. Djãm me kute kraxkôt Bẽnjadjwÿrbê kumkatibê Kritu mar got? Kati. Me kute kraxkôt mar kêtumrêx. Nhym be, bãm kute Jeju djir ne gu me baje arÿm omũnh. Kôt ne gu me arÿm Jeju 'êxnĩmã bakato. Nãm me kwÿ ã Jeju'ã abenmã ane.

²⁸Nhym kam Jeju kute Metĩndjwÿnh nhô kikretikam memã kukràdjà jarênhom ãmkam kàj bê memã kum,

—Be, mrãmri ne ga me aje imar. Nhÿnhja kurũm ne ba itẽm ne ibôx ja ne ga me arÿm aje mar. Djãm ba ne ba amikabên kôt amrê tẽ? Kati. Me'õ kute ijanor djwÿnh ne mrãmri. Tãmwã ne ga me aje mar kêt. ²⁹Nhym be, ba ne ba ije omũnh tũm. Tãm ne ijano ba amrê kurũm tẽn bôx, ane.

³⁰Nhym kam me bit kute o tÿm ne pa 'amÿnhmã. Ne te: o ane. Me kute o tÿm'ã myt bôx kêt rã'ãkam ne me te: o ane. ³¹Nhym me kwÿ krãptĩ arÿm tu amim markumrêx ne abenmã kum,

—Me baje raxmã bakator kadjy ne Jeju arÿm mÿjja pumũnh kêt krãptĩ nhipêx ne. Me punu krãptĩ mex. Djãm me'õdjwÿ bôx ne kute apênh mexo kute akrenh got? Kati. Be, mrãmri tãmwãbê ne me banhô Bẽnjadjwÿrbê kumkatibê Kritukumrêx, ane.

³²Me rũnh kàxã ne me ã abenmã anhÿro ku'ê nhym mebê pardjêumẽ me kadjy Metĩndjwÿnh mar djwÿnh nhô bẽnjadjwÿr arÿm me kuma. Me kuman arÿm Jeju'ÿr me krãkamngôn kwÿ jano. Me kute pa 'amÿnhmã ne me me ano.

³³Nhym kam Jeju arÿm memã kum,

—Be, me aro'ã ar iba ne arÿm 'ã akati ngrêre. Dja ba kam arÿm kute ijanor djwÿnh'ÿr tẽ. ³⁴Ga me kam arÿm te ijabej. Te ijabej ne imã akator kêt. Ne kam ikrĩ djã'ÿr te abôx prãmje, ane.

35Nhym mebê idjaer rûnh abenmã kum,

—Je tô, jãm dja tẽ gu me kum bakator kêt. Djãm apÿnh me bajtem ba djàkam me bimành tũm'ÿr ne tẽmmã? Djãm kam kute me bajtemmã kukràdjà jarẽnhmã? 36Kute me bamã, “Dja ba tẽ ga me arÿm te ijabej. Te ijabej ne imã akator kêt. Ne kam ikrĩ djà'ÿr te abôx prãmje”, anhÿr. Mÿj gêdja kam nê? ane.

37Nhym kam me kute amikukràdjà kôt amijo môr ne kute 'ã aminhinomã amimẽnh nhõ akati arÿm bôx. Akati raxja bôx. Me kukãmãre kukràdjà kôt me kute bô mjÿrkam kr'ã aminhinomã amimẽnh kadjy akati ne arÿm bôx. Nhym Jeju arÿm kàjmã djan memã kum,

—Me ajô ar amã kôr jabej amrê iwÿr tẽn ikô. 38Me kute tu amim imarkumrêxja gêdja ï me kadjwÿnhbê ngô kute meo tĩnja mã mekam apôx. Me bakukãmãre kute pi'ôkkam memã arẽnh kôt ne ba ar amã arê.

39Nãm Jeju Metĩndjwÿnh Karô'ã ã memã ane. Dja me tu amim Jeju markumrêx nhym Metĩndjwÿnh Karô arÿm me'ÿr bôx ne meo ba. Djãm arÿm ne meo ba? Kati. Metĩndjwÿnh kute memã Karô janor djwÿnhrà m ne Jeju memã ane. Dja Metĩndjwÿnh amiwÿr Jejuo wabin akubyn o rax. Ne kambit arÿm memã Karô jano nhym bôx ne meo ba.

40Jeju memã ane nhym me krãptĩ kute kabẽnja markam 'ã abenmã kum,

—Be, mrãmri ne tãmwãbê Metĩndjwÿnh kukwakam kabẽ jarẽnh djwÿnh. Me bakukãmãre ne me amrêbê: arê, ane.

41Nhym me kwÿ Jeju'ã abenmã kum,

—Be, tãmwã ne mrãmri kubê Kritukumrêx. Mrãmri kubê me banhõ Bẽnjadjwÿrbê kumkatibê Kritukumrêx, ane.

Nhym me kwÿ arĩk 'ã abenmã kum,

—Be kati. Jejubê ne Bẽnjadjwÿrbê kumkatibê Kritu kêt. Abatàn djà ne pykabê Garrêja. 42Nhym be, me banhõ Bẽnjadjwÿrbê kumkatibê Kritukumrêx krĩbê Berêkam abatàn. Kubê ne me bakukãmãre Dawi tãmdjwÿ. Bẽnjadjwÿr rax Dawi jabatàn djàkam ne Kritu abatàn djà. Amrêbê: ne me bakukãmãre pi'ôkkam arê. Nhym be, kati. Djãm Jejubê Bẽnjadjwÿrbê kumkatibê Kritu got? Jeju ate Garrêjakam abatàn, ane. 43Me kute ã abenmã anhÿrkam me kute Jeju'ã axikôt kabẽn jadjwÿr kêt. 44Nhym me ja kwÿ bit kute o tÿm ne pa 'amÿnhmã. Ne kam te: kute o anhÿrmã.

45Nhym kam me krãkamngônĩ kikreti nêje ku'êja me rûnh'ÿr akêx ne me'ÿr bôx. Metĩndjwÿnh mar djwÿnh nhõ bẽnjadjwÿrmê mebê pardjêu'ÿr bôx. Nhym kam me rûnh me krãkamngônĩmã kum,

—Je tô mÿkam ne ga me Jejuo abôx kêt? ane.

46Nhym me krãkamngônĩ memã kum,

—Djãm me'ô pykakam kabẽn mexo kute tãmwã pyrãk? Kati. Nãm prĩne kabẽn mexo kute katàt me kunĩ jakrenh. Ba me kam te ije o itÿm ne pa 'amÿnhmã, ane.

47Nhym mebê pardjêu memã kum,

—Je tô djãm arÿm ne me gadjwÿ me anoo akno? 48Ê, ba me amã arê. Djãm me irax'ô, nàr me ibê pardjêu'ô ije amim tãmwã mar got? Kati.

⁴⁹Be, djãm me kàtãmwã kute Môjdjê kukràdjà mar got? Me kute me bakukãmãre kukràdjà mar kêt kam dja Metĩndjwýnh arým me kanga, ane.

⁵⁰Nhym Nikodemu. Tãm ne akamãtkam Jeju'ýr tẽ. Kubê ne mebê pardjêu'õ. Nãm arým memã kum,

⁵¹—Je gêdja gwãm kraxje me baje axwe jabej me kukjêr kêt kam memã axwe jarê? Kati. Be, Jeju kute kraxje me bamã amijarênh kêt kam gu me arým 'ã axwe nhôro nhỹ, me bakukràdjà kupa'ã ne gu me 'ã nhôro nhỹ, ane.

⁵²Nhym me arík kum,

—Djãm gadjwý pykabê Garrêjakam ajabatãnh djà ne ga nêje akabêno dja? Be, pi'ôkkam ne Metĩndjwýnh kukwakam kabên jarênh djwýnh'õ Garrêjakam abatãnh kêt kumrêx. Dja ga amim pi'ôk jarên arým kôt ikabênkumrêxmã akato. Jejubê Bẽnjadjwýrbê kumkati kêt. Tãm dja ga pi'ôk jarên ama, ane.

⁵³Nhym kam me kunĩ ajmãn aminhûrkwãmã apêx.

Me'õ nire kute me'õbê mjêno àkĩnh.

8 ¹Jeju arým krãnhbê Oriwêre 'ýr tẽ. Tẽ:n arým 'ýr bôx nhym 'ã akamãt nhym nõ. Nõ: nhym arým ôkrên'ãnh kã. ²Nhym kam Metĩndjwýnh nhõ kikreti'ýr tẽn kam bôx. Nhym kam me kunĩ ajte 'ýr bôx nhym arým nhỹ. Nhỹn arým memã kukràdjà jarênh nhỹ. ³Nhym kam me arým Jeju'ýr me 'õ nireo bôx ne me ipôkri kudja. Arým ne mjên ne kam ajte me'õbê mjêno àkĩn ar ro'ã nõ. Nhym me arým omũn o tým ne pa 'amýn Jeju'ýr o bôx. ⁴Ne kum,

—Ê, ujarênh djwýnh. Be, me'õ nire ja arým mjên ne arým me'õ myo àkĩn ar ro'ã nõ. Ba me ar nõrkôt ar omũn aro tým ne arým awýr o bôx.

⁵Be, me ja jaxwe pãnh ne Môjdjê arým memã arê. Kute me bakukràdjà jarênhkam Môjdjê arým 'ã memã kum,

—Ga me axwe pãnh kẽn titik ne abĩ gẽ ty, ane. Be, gadjwý ar imã axwe pãnh'õ jarê bar kuma. Mýj gêdja bar on? Nãm me ã Jejumã ane.

⁶Mýj kadjy ne me kum ane? Bir, godja kukràdjà kupa'ã mýjja jarênh jabej nhym me arým kôt kum axwe jarê. Ja kadjy ne me kum ane.

Nhym Jeju ate idjao nhỹn arek ikrao pyka no'ôko nhỹ. ⁷Nhym me mã kum tãmja jarê nhym arek pyka no'ôko nhỹ. Nhym kam kãmã djan memã kum,

—Goja me ajõ apydji ajaxwe kêt kumrêx jabej ga akumrêx kên'õ byn o titik ne abĩ, ane. ⁸Nãm anen ajte nhỹ, pyka no'ôko nhỹ.

⁹Nhym me arým amima:ro djan amijaxwedjwý ma. Ne kam arým pijãm ne mã apôxo dja. Me abatãnhja kumrêx ne me kato. Nhym mekôt me abatãnh nydjwý apôxo dja. Nhym ajbir abatãnh nyre meo ino ren kato. Arým ne me kunĩ apêx. Nhym kam Jeju arým ate nhỹ nhym niredjwý arým ate dja. ¹⁰Nhym kãmã djan nire ate ãmkôt omũn kum,

—Me'õ nire, nhỹnh ne me kute amã ajaxwe jarênhja ku'ê? Djãm me'õ kute ajaxwe pãnh kẽn atitik prãm kêt kumrêx? ane. ¹¹Nhym kum,

—Ã bẽnjadjwýr. Me'õ kute pãnh ititik prãm kêt, ane.

Nhym kum,

—Badjwỳ. Ajaxwe pãnh ije kěno atitik prãm kêt. Aj mã. Kwãrĩk wãnh ga ajte ajaxwe kêt, ane.

Kute katàt memã amijarěnh.

Dju r 1.4; Rô 13.12; Ep 5.8; Tex k 5.5

¹²Nhym kam Jeju ajte memã kum,

—Be, apỹnh me ba djã kunĩkôt me axwe kunĩ katàt kute amijo ba kadjy ne ije mrãmri ne memã pry kurwỳ djã pyrãk. Ga, me kurwỳ djã kute akamàtkam memã pry kurwỳ nhym me kute akamàtkam mỳjja kunĩ pumũnh ne katàt baja pumũ. Badjwỳ dja me tu amim imarkumrěx ne arỹm katàt amijo ba. Ga, akamàt kô tykkam me kute mỳjja pumũnh kêt ne ba punuja pumũ. Me axwedjwỳ ne me kute mỳjja mar kêt ne amijo ba punu. Djãm me kute tu amim imarkam axwe ne amijo ba punu? Kati. Ba ije mrãmri ne memã pry kurwỳ djã pyrãk. Dja me tu amim imarkumrěx ne arỹm katàt amijo ban kam arỹm ikôt tĩn ne ar ba rã'ã: rã'ã ne, ane.

¹³Nhym mebê pardjêu kum,

—Je, djã nãm me'ô akôt kaběn dji? Kati. Ga apydji aje memã amijarěnh aba nhym me'ô kute akôt kaběn djir kêt. Ba me kam arỹm amã akaběn kajgo jarê. Akaběn kajgo nhym me kute amar kêt, ane.

¹⁴Nhym memã kum,

—Kati. Ipydji ije memã amijarěnhkam ije memã amijarěnh kajgo kêt. Kàjkwakam Metĩndjwỹnh ne ijano ba amrê kaběn kôt tẽ. Be, 'yr dja ba akubyn tẽ. Ja ne ije markumrěx. Kam ikaběn kajgo kêt. Nhym be, me ga ne ga me aje imar kêt. Nhỹnhja kurũm ne ba itẽmja ne ga me aje mar kêt. Nhĩ'ãm itẽmdjwỳ ga me aje mar kêt.

¹⁵Me ga ne ga me aje amidjwỹnh kĩnh prãm ne aje memã axwe jarěnh aba. Djãm ba ne ba ije amidjwỹnh kĩnh prãm ne memã axwe jarěnh got? Kati. ¹⁶Godja ba memã axwe jarěnh jabej arỹm katàt memã arěnhkumrěx. Djãm ipydji dja ba arê? Kati. Ibãm kute ijanor djwỹnhmẽ dja bar axikôt ikaběn ne memã axwe jarê. Kam ne ije katàt memã axwe jarěnhkumrěx.

¹⁷Nhym be, amrêbê: me bakukãmãre kute me akukràdjã'ã pi'ôk no'ôkdjwỳ. Me akukràdjã kôt ba ije Ibãmmẽ axikôt memã amijarěnh iba. Me akukràdjã jakam me'ô ar amãnhkrut ne kute me omũnhkôt kute axikôt me arěnh nhym me kunĩ kute mar ne kute memã kum, “Mrãmri katàt ar kute me arěnhkumrěx”, anhỹrmã. Ja ne ga me arỹm aje mar.

¹⁸Be, ja kôt ne ba Ibãmmẽ ã me amã amijarěnh ane. Ba ije me amã amijarěnh. Nhym Ibãm kute ijanor djwỹnh ikôt kute me amã ijarěnh. Ba Ibãmmẽ ar ije axikôt me amã amijarěnhkam ne ga me ren me akukràdjã kôt ijã, “Mrãmri ne katàt kute memã amijarěnhkumrěx”, ane. Ba Ibãmmẽ ar ije axikôt me amã amijarěnhkam dja ga me ar ikaběn katàtjamã akaton ama. Me akukràdjã'ã pi'ôk no'ôk kôt dja ga me ima, ane.

¹⁹Nãm ã Jeju memã ane nhym me arỹm kum,

—Tô nhỹnh ne abãmja? ane.

Nhym memã kum,

—Me aje imar kêt ne aje Ibãmdjwỳ mar kêt. Ne ga me ren iman ren Ibãmdjwỳ ma. Nhym be, kati. Aje mar kêt, ane. ²⁰Be, Metĩndjwỳnh nhõ kikretikam me kute Metĩndjwỳnhmã pi'òk kaprĩo atom djakam ne Jeju ã memã ane. Nhym me'õ kute o tỳm ne pa 'amỳnh kêt kumrêx. Pa 'amỳnh'ã myt bõx kêt rã'akam.

²¹Nhym kam ajte memã kum,

—Dja ba ĩ mã tẽ ga me arỳm te ijabej. Te ijabej ne kam arỳm ty. Nhym kam Metĩndjwỳnh me amã ajaxwe jarênh rã'ã. Mũm itẽmmã 'ỳr ikràja dja ga me te ikõt 'ỳr atẽm ne 'ỳr abõx prãmje, ane.

²²Nhym mebê idjaer rũnh abenmã kum,

—Je tũ mỳj dja nẽ? Birãm, dja amibĩ. Nãm me ã abenmã ane. Kute memã kum,

—Dja ba ĩ mã tẽ ga me arỳm te ijabej, anhỳrkam ne me ã abenmã ane.

²³Nhym memã kum,

—Be, me ga ne ga me pykakam ajapõx ne ar aba. Nhym be, ba ne ba kỳjrũm kàjkwakam ar iba tũm. Me ga ne ga me aje pykakam mỳjjabit mar. Ba ne ba ije kàjkwakam mỳjja mar. ²⁴Me aje pykakam mỳjjabit markam ne ba me amã, “Dja ga me ty nhym Metĩndjwỳnh amã ajaxwe jarênh rã'ã”, ane. Ne me amã, “E kum ba. Ba ne ba arỳm bõx”, ane. Dja ga me kam amim imar kêt rã'ã jabej arỳm ty nhym Metĩndjwỳnh me amã ajaxwe jarênh rã'ã, ane.

²⁵Nhym me kum,

—Bir, mỳj me ajõ ga nã? Gop me imã amijarênhkumrêx, ba me ama, ane.

Nhym Jeju memã kum,

—Be, amrêbê ne ba me amã amijarênhõ iba. Nã bãm me amã, ²⁶“Be, ije me ajaxwe kumex markam ba ren memã me ajaxwe jarênh ajte me amã pãnh jarê. Be, ijanor djwỳnh kute katõt kabên jarênhkõt ne ba me kunĩmã arênhõ iba.” Nãm bãm ã me amã ane, ane.

²⁷Kute memã kum, “Kute ijanor djwỳnh”, anhỳrkam me kute mar kêt. Kute memã Bãm jarênhja me kute mar kêt.

²⁸Nhym kam Jeju memã kum,

—Ba ije amijo inhĩ ne ibõxja dja ga me kỳjrũm inhõ. Kam dja ga me arỳm ima. Ba ije amikabênkõt amijo iba kêt kumrêx. Ibãm kute imã kabên jarênh kõt ne ba memã arênhõ iba. Ja dja ga me aje kỳjrũm inhõrkam ama. ²⁹Kute ijanor djwỳnh ne imẽ amijo kajkep. Djã nãm imã kàx ba ate ar iba? Kati. Be, mỳkam ne imã kàx kêt? Bir, ije o kĩnh kadjy ne ba kum idjapênh mex rã'ã. Kam imã kàx kêt. Nãm ã Jeju memã ane. ³⁰Kute memã ja jarênhkam ne me kumex arỳm tu amim markumrêx.

Abraão tàmdjwỳ'ã ujarênh.

³¹Nhym kam mebê idjaer kute tu amim markumrêxja Jeju memã kum,

—Dja ga me mã ikabên kõt ar amijo aban 'ã adjukanga kêt ne arỳm me abê ikõt aba djwỳnhkumrêx. ³²Ne kam arỳm mrãmri ikabênkumrêxmã akaton ijã amim, “Be, mrãmri ne kabên katõt kumrêx”, anhỹro aba. Ne kam ikabên

katàtkumrêxmã akato ba kam arým me apytà. Me'ôja kute me apa 'amýnh ga me kum adjàpênh kajgoo abaja ba kubê me apytà. Ga me kam ikôt adjumar mexkumrêx ne ar aba. Nãm ã Jeju me axwe nhõ bënjadjwýr'ã memã ane.

³³Nhym ajte me kwý kum,

—Tô nhýnh ne kam me'ô kute me ipa 'amýnh ba me kum idjapênh kajgoo ibaja? Kati. Me ba ne ba me ibê me bakukãmäre Abraão tàmdjwý. Nhym kam me'ô kute me ipa 'amýnh kêtumrêx. Mýkam ne ga,

—Ba me'ôbê me apytà? ane.

³⁴Nhym Jeju memã kum,

—Mrãmri me ajaxwe prãmkam ne me ajo ba djwýnhja arým kute me apa 'amýnh ga me arým kum adjapênh kajgokumrêx. ³⁵Ba me amã arê ga me ama. Djãm me'ô nhõ kikrekam ô àpênh djwýnh djãm kubê ô àpênhkam kum àpênh rã'ãmã? Kati. Gêdja ĩ atemã me'ômã apê. Nhym be, kam me'ô krakumrêxja dja kam kra rã'ã ne. ³⁶Ba ibê Metĩndjwýnh Kra rã'akam ibê me apytàr djwýnh. Me apa 'amýnh djwýnhbê me apytàr djwýnh. Dja ba me apa 'amýnh djwýnhbê me apytà ga me kam mrãmri adjumar mexkumrêx ne ar aba.

³⁷We me abê Abraão tàmdjwý, ba ije kôt me amar. Ga we me te abê Abraão tàmdjwý ne me aje ibĩnmã. Me amã ikabên kĩnh kêtumrêxkam ne ga me aje ibĩnmã. ³⁸Be, Ibãmmê ro'ã ar ibari ije mýjja pumũnh ne mar. Tãm ne ba me amã arê. Me ga ne ga me anhingêt kute amã arênh kôt ar amijo aba.

³⁹Nhym me kum,

—Be, mrãmri me inhingêtbê Abraão kumrêx, ane.

Nhym memã kum,

—Ga ren me abê Abraão tàmdjwýkumrêx ne ren Abraão djapênh kôt adjapênh ar aba. ⁴⁰Nhym be, kati. Ga me jakam aje ibĩnmã. Kàjkwakam Metĩndjwýnh kute imã kabên katàt jarênh kôt ije katàt me amã arênhkumrêxkam ne ga me aje ibĩnmã. Djãm ã Abraão meo ane? Kati.

⁴¹Ne ren Abraão bê me anhingêtkumrêx ga ren me adjapênh mex. Nhym be, kati. Atemã me anhingêt djapênh kôt ne ga me atemã adjapênh ar aba.

Nhym me kum,

—Djãm krô'ã me'ô kute akudjwa me ijadjwýr? Kati. Be, me Ibãm djwýnh pydji. Kàjkwakam Metĩndjwýnh, ane.

Kute memã Xatanaj tàmdjwý jarênh.

⁴²Nhym Jeju memã kum,

—Ne ga me ren mrãmri kàjkwakam Metĩndjwýnh Abãm ne ren amã ĩjabê. Be, mýkam? Bir, kàjkwakam Metĩndjwýnh kurũm ne ba tẽn bõx. Be, djãm ba ne ba tẽn? Kati. Tãm ne ĩjano ba amrê tẽn. Kam ga me ren amã ĩjabê. ⁴³Be, mýkam ne ga me aje ikabên mar kêt? Bir, me ajamakkre kêt prãmkam. ⁴⁴Be, me anhingêtbê Xatanaj ne ar me ajo ba. Me anhingêt kum axwe prãm kôt ne ga me amã ajaxwe prãm. Kute amikrax totokbê kubê me par djwýnh. Ta kabên katàt kêtam kute Metĩndjwýnh kabên katàt 'amýnh tỳx kêt ne kôt kute amijo ba kêt. Ta 'êxnĩ kôt

memã 'êx ba. Mrãmri 'êxnĥikumrêxkam kubê me 'êxnhĩ ngingêt. ⁴⁵Kubê me 'êxnhĩ ngingêtka ba te me amã katàt ikabên jarênhkumrêx ga me aje amim imar kêt. ⁴⁶Be, mỳj me ajô ga ne ga me aje mrãmri ijaxwe'ômã akatorcumrêx? Kati. Ga me te: aje ijaxwe'ômã akator prãmje. Ijaxwe'ô kêtka mỳka ne ga me aje imar kêt? Ba te ije me amã katàt Metĩndjwỳnh kabên jarênhkumrêx ga me aje imar kêt. Be, mỳka? ⁴⁷Bir, ne ga ren me abê Metĩndjwỳnh kra ne ren amim kabên markumrêx. Nhy m be, kati. Me abê Metĩndjwỳnh kra kêtka ne ga me aje amim kabên mar kêt. Nãm ã mebê idjaer rũnhmã ane.

Kute mebê idjaer rũnhmã amijarênh.

⁴⁸Nhy m mebê idjaer rũnh arĩk kum,

—Be, abê pykabê Xamarijka me kra'ô ba me arỳm ama. Me karô punu ne ari ajo ba, ane.

⁴⁹Nhy m Jeju memã kum,

—Kati. Me karô punu kute ijo ba kêt. Ba ne ba Ibãm rax jarênh iba. Ga me ka imã ikajgo jarênh aba. ⁵⁰Be, djãm ba ne ba amirax jabej? Kati. Atemã 'ô kute irax jabej ne kute me ajaxwe mar. ⁵¹Mrãmri dja me ikabên man kôt ar amijo ban arỳm tykkumrêx'y'r bôx prãm kêt. Mrãmri ne ba me amã ja jarênhkumrêx. Nãm ã Jeju memã ane.

⁵²Nhy m mebê idjaer rũnh kum,

—Tô nhỹnh? Be, me bakukãmãre Abraão arỳm ty. Metĩndjwỳnh kukwakam kabên jarênh djwỳnhdjwỳ ne me arỳm aben kukãm ty. Tô nhỹnh dja me akabên man kôt ar amijo ban tyk kêt? Akabên jakôt ba me arỳm amã ikaton amarkumrêx. Mrãmri ne me karô punu ajo ba. ⁵³Djãm aje araxo me bakukãmãre Abraão jakrenh ne ga aje, “Dja me ikabên man kôt ar amijo ban tyk kêt”, anhỹr? Abraão arỳm ty. Metĩndjwỳnh kukwakam kabên jarênh djwỳnh ar arỳm ty. Mỳj me'ô rax ne ga arĩk o amiptàrn 'ã amimênh dja? ane.

⁵⁴Nhy m Jeju memã kum,

—Ne ba ren arĩk amijã me'ô rax mên ren mrãmri ikajgo. Nhy m be, kati. Ibãm ne kute ijã irax mênhkumrêx. 'A ne ga me aje abenmã, “Me Batĩndjwỳnh”, anhỹr kajgo aban ⁵⁵aje mar kêtumrêx. Nhy m be, bajbit ije markumrêx. Ne ren ijêxnhĩ ne ren me amã, “Ije mar kêt”, ane. Ne ka ren me akudjwa memã ijêx iba. Nhy m be, kati. Mrãmri ije markumrêx ne kabên kôt ar amijo iban ijêxnhĩ kêt. ⁵⁶Be, me angingêt Abraão arỳm amikukãm iman arỳm ikam kĩnhkumrêx, ane.

⁵⁷Nhy m mebê idjaer rũnh kum,

—Je tô, djãm kraxje ajã amex krãptĩbê 50 apêx kêtjakam djãm ga ne ga arỳm me bakukãmãre Abraão pumũ got? ane.

⁵⁸Nhy m Jeju memã kum,

—Be, me akukãmãre Abraão amirĩt kêttri ne ba ar iba tũm, ane.

⁵⁹Nhy m me arỳm kên kwỳ jamỳ, kute o titik ne bĩn kadjy. Nhy m Jeju arỳm amijo apdjun mã tẽ. Metĩndjwỳnh nhõ kikreti kurũm katon mã tẽ.

Kute me'ô adjàkamã no rãjao mex.

9 ¹Tê: nhym arým me'ô no rã nhỹ. Adjàkamã ne me'ô no rã. Nãm nhỹ nhym arým omũ. ²Nhym kôt ba djwýnhdjwý omũn Jeju kukij ne kum, —Ujarênh djwýnh, mykam ne me'ôja adjàkamã no rã? Djãm ta axwe pãnh ne adjàkamã no rã? Nār nãmẽ bãm ar axwe djô'ã ne no rã? Mýj ne kam kute? ane.

³Nhym arkum,

—Kati. Ta axwe pãnh no rã kêt. Ne nãmẽ bãm ar axwe djô'ã no rã kêt. Be, Metĩndjwýnh kute no rãkam àpênh nhym me kute kôt raxmã kator kadjy ne no rã.

⁴Be, jakam imexri idjápênh prãm kumrêx kute mrãmri ne a'uri me àpênh prãm pyræk. Kute ijanor djwýnh kute idjápênh'ã imã karô kôt idjápênh prãm kumrêx. Adjým, dja me ĩ ijo bikênh tẽn ibĩ ba te idjápênh prãmje. Kute mrãmri ne me akamât kô tykkam te àpênh prãm pyræk. ⁵Pykakam me axwemẽ ro'ã ar ibari ba ije mrãmri memã pry kurwý djà pyræk. Ga, me kute akamâtkam memã pry kurwý nhym me katât baja pumũ. Badjwý ne ba memã Metĩndjwýnh kabên jarê nhym me arým kôt katât ar amijo ba. Ne tu amim kabên markumrêx ne arým katât ar amijo ba.

⁶Nãm anen arým pykakam aptôn kam o ajrên arým o me'ô no rãja no djy. Ne kam kum,

⁷—'Yr tẽn ngô nhidjibê Xirôwekam amino ku'ô, ane. Me bakabênkam ne me ren ngômã, kute anor jarê. Nãm kum ane nhym arým 'yr tẽn kam amino ku'ô. Ku'ôn arým no mex ne. No mex ne kam ũrkwã'yr tẽn arým 'yr bôx.

⁸Nhym ũrkwã bu'ã me krĩ kute me'ô no rã pumũnh tũm abenmã kum, —Djãm tãmwã ne amijo à'wýro krĩ? ane.

⁹Nhym me kwý memã kum, “Nà, tãm”, ane. Nhym me kwý memã kum, —Kon, kute tãmwã pyræk, ane.

Nhym ta memã kum, “Nà, ba”, ane.

¹⁰Nhym me kum,

—Tô mýj me'ô ne amã ano mex jadjà? ane.

¹¹Nhym memã kum,

—Be, me'ôbê Jeju ne pykakam aptôn kam o ajrên arým o ino djy. Ino djyn arým imã, “'Yr tẽn ngôbê Xirôwekam amino ku'ô”, ane. Ba kam 'yr tẽn amino ku'ôn arým ino mex ne irĩt mexkumrêx, ane.

¹²Nhym me kum, “Nhỹnh ne dja”? ane.

Nhym memã kum, “Kon”, ane.

¹³Nhym kam me arým mebê pardjêu'yr o bôx. Me'yr me'ô no rãn arým no mexjao bôx. ¹⁴Be, me tyk djà kêt djà nhô akatikam, pi'ôk rārarkam ne Jeju pykakam aptôn o ajrên o me'ô no djyn o noo mex. ¹⁵Nãm me mebê pardjêu'yr o bôx nhym me ajte kukij ne kum,

—Mýj ne ga arĩt mex kadjy nẽ? ane.

Nhym memã kum,

—Nãm pykakam aptôn o ajrên o ino djiy ba ku'ôn arým ino mex ne irît mexkumrêx, ane.

¹⁶Nhym mebê pardjêu kwỳ abenmã kum,

—Djãm Metĩndjwỳnh ne tãmwã jano got? Be, me bakukràdjà pãnh ne pi'òk ràràrkam ari àpênh ba. Axwekumrêx, ane.

Nhym me kwỳ 'ã abenmã kum,

—Nhym bê ne me'ô jaxwe kute ã mỳjja pumũnh kêt nhipêxo anhỹr. Kute ã me'ô no rão mexo anhỹr. Nãm me ã Jeju'ã kabêno aben japanho ane. ¹⁷Ne kam me'ô no rãn arým no mexjamã kum,

—Kute amã anoo mexkam 'ã akabên'ô jarê ba me ama, ane.

Nhym memã kum,

—Be, kubê Metĩndjwỳnh kukwakam kabên jarênh djwỳnh'ô, ane.

¹⁸Nhym mebê idjaer rũnh amim mar kêt ne. Nãm me amim,

—Je tô djãm mrãmri ne me'ôja adjakamã no rã? Be, kati, ane. Ne kam arým bãmme nã ar'ỳr me ano. Nhym me ar'ỳr tẽn arým aro bôx.

¹⁹Nhym me arkum,

—Be, gar memã kum, “Ikra adjakamã no rã”, anhỹro aba. Djãm tãm ne ja? Mỳj ne rît mex kadjy nê? ane.

²⁰Nhym ar memã kum,

—Be, mrãmri ar ikrakumrêx ne ja. Mrãmri ne adjakamã no rākumrêx.

²¹Ne kam mỳj ne arým no mex on, ar ije mar kêt. Mỳj me'ô ne kum noo mex nhym rît mex, ar ije mar kêt. Be, ta ne arým abatãnh ne. Dja ga me kukja nhym arým me amã amijarê, ane. ²²Be, mỳkam ne ar kute memã kum,

—Jeju ne ar ikra noo mex, anhỹr kêt? Bir, arkum mebê idjaer rũnh pymakam. Nãm me arým abenmã Jeju'ã kabên djin abenmã kum,

—Dja me'ô memã kum, “Be, mrãmri ne Jejubê me banhô Bẽnjadjwỳrbê kumkatibê Kritukumrêx”, ane gwaj kôt me nêje kanga gê ajte me bikprõnh djakam me baro'ã krĩ kêt, ane. ²³Kam ne me kute ar kanga pymaje ar memã,

—Be, ta ne arým abatãnh. Dja ga me tãmwã kukja, ane.

²⁴Nhym kam me ajte amiwỳr me'ô no rãn arým no mexja 'uw nhym arým 'ỳr bôx. 'Ỳr bôx nhym kum,

—Be, me ba ne ba me ije Jeju jaxwekôt mar. Kwārĩk wãnh ga mex jarênh kêt. Kàjkwakam Metĩndjwỳnh ta ne anoo mex. Tãm dja ga kum mex jarê, ane.

²⁵Nhym memã kum,

—Be, mỳj Jeju axwe nã? Ije mar kêt. Mrãmri ne arým ino rākumrêx. Ne arým jakam ba mrãmri irît mexkumrêx. Jabit ne ba mrãmri ije markumrêx, ane.

²⁶Nhym kam me ajte kum,

—Mỳj ne ajo, ga arým ano mex ne arît mex ne? ane.

²⁷Nhym memã kum,

—Je, arým ne ba me amã arê. Djãm me aje imar kêt got ga me ajte: ikukij? Be, mỳj kadjy dja ba ajte me amã arê ga me ajte ama. Djãm me aje me kudjwa mã kôt abikamênhmã got ga me ikukjêro dja? ane.

²⁸Nhym me arým kum kurên kum,

—Be, kati. Ga ne ga arým kôt aba djwýnh. Me ba ne ba me atemã. Me bakukãmãre Mõjdjekôt ne ba me amijo iba. ²⁹Be, Metĩndjwýnh mrãmri me bakukãmãre Mõjdjemã kabênkumrêx. Ja ne ba me ije markumrêx. Nhym be, tãmwã. Djãm me kute kator djã mar got? ane.

³⁰Nhym amipãnh memã kum,

—Be, Jeju ne imã irĩt mex jadjà ga me aje kator djã mar kêtja pumũ. Djãm me ano mex got? ³¹Ba me amã arẽ ga me ama. Djãm me axwe ne Metĩndjwýnh kute me mar ne kôt àpênh? Kati. Ja ne gu me arým baje mar. Nhym be, me kute mrãmri Metĩndjwýnhmã rax jarênh ne kute kabên mar ne kôt kute amijo bakumrêxja Metĩndjwýnh arým kute me mar ne me kôt àpênhkumrêx. ³²Be, djãm Metĩndjwýnh Jeju kôt àpênh ngri got ga me 'ã akabên ne? Mỳj me'õ ne adjakamã no rã nhym me arým kute kum rĩt mex jadjàr ga me amrêbê aje mar? Kati. Me bakukãmãre kute arênh kêt. Me kuni kute arênh kêtumrêx. Jejubit ne ajbir bajbit ijo mex ga me arým aje ipumũnh. ³³Metĩndjwýnh ren kute anor kêt nhym ren kabênkôt àpênh kêt ba ren ino mex kêt ne. Nhym be, kati. Mrãmri Metĩndjwýnh kute anorkumrêx.

³⁴Nhym me kum,

—Be, djãm akudjwa adjakamã me ijaxwe? Djãm ajaxwekam aje me ijakre got? ane. Nãm me kum anen kangan arým me nêje bõm kumẽ.

³⁵Nhym kam Jeju me kute bõm mênhkôt arým kuman 'ỳr tẽn kum katon kum,

—Djãm arým ga tu amim Metĩndjwýnh Kra markumrêx? ane.

³⁶Nhym kum,

—Bẽnjadjwỳr, dja ga imã Metĩndjwýnh Kra jakre ba tu amim markumrêx, ane.

³⁷Nhym kum,

—Arým ga ipumũ. Ba. Ba ne ba amã ikabẽno dja, ane.

³⁸Nhym kum,

—Nã, Bẽnjadjwỳr djwýnh, arým ne ba tu amim amarkumrêx, ane. Ne arým kute Metĩndjwýnh Kramã katorkam amikajgo man parbê ibôn nhỹ.

³⁹Nhym Jeju memã kum,

—Be, mỳj kadjy ne ba pykakam bõx ne ar iba? Bir, dja ba me kukijn me axwemã ikaton arým memã pãnh jarẽ. Be, me kwỳ kute amijo àmran arĩk amim, “Djãm ije Metĩndjwýnh kabên mar ngri got”? anhỳrja dja ba te memã kukràdjã jarẽ nhym me arým mar kêt ne arým amakkre kêt mex ne ar ba. Me kute mrãmri ne me rĩt mex arým no rãn ba pyrãk. Nhym be, me kwỳ kute kukràdjã mar kêt ne mar prãm dja ba memã arẽ nhym me arým tu amim markumrêx. Tu amim markumrêx ne arým kôt kute amijo ba mexumrêx. Me kute mrãmri ne me no rã arým rĩt mex ne katàt ba pyrãk. Ja kadjy ne ba pykakam bõx ne ar iba, ane.

⁴⁰Nhym mebê pardjêu bu'ã ku'êja arým kabên man kum,

—Je, djãm me badjwỳ ne ba me ije me no rã pyrãk? Kati. Djãm me ije Metĩndjwýnh kukràdjã mar ngri got? ane.

⁴¹Nhym memã kum,

—Ne ga ren me aje Metĩndjwỳnh kukràdjà mar prãm ne ren aje mrãmri ne me no rã rĩt mex prãm pyræk. Ne kam ren ajaxwe kêt ne. Nhym be, kati. Me aje, “Me badjwỳ djãm me ije Metĩndjwỳnh kukràdjà mar ngri got”? anhỳrkam me ajaxwe rã'ã. Nãm ã Jeju memã ane.

Mrykĩ'átomtio ba djwỳnh'ã ujarēnh.

Idja 13.20; Ped k 5.4

10 ¹Ne kam mrykĩ'átomtĩ'ã memã ajarēn ò me ja'ã mrykĩ'átomtĩ jakren memã kum,


—Be, ò kôkayrkam mrykĩ'átomtĩ ar bakam nhym me ngjêx prãmcam me kwỳ ajkwa krekrekôt ngjêx kêt ne ate kôkayr nhĩbũm kôt wangij. Be, me ja ne me mryo àkĩnh prãm nhym me me'ã memã kum, “Me àkĩnhĩ”, ane nàr, “Mebê mỳjjao prôt djwỳnh”, ane. Mrãmri ne ba me amã ja jarēnhkumrêx. ²Nhym be, me kute katàt ajkwa krekrekôt ngjêxjabê ne ò mryo ba djwỳnhkumrêx.

³Nhym 'ã ijê djà nêje ku'ê djwỳnh arỳm o ba djwỳnhmã 'ã ijê djà'ã kurê nhym arỳm wangij. Ne kam mrymã kabēn nhym arỳm amim kabēn ma. Kute apỳnh mrymã idji jarēnh djari aben totokmã mrymã arê nhym arỳm kute apỳnh aminhidji jarēnh mar kôt bôm rôrôk. Bôm rôrôk nhym o ba djwỳnh arỳm kapôtmã mryo apôx. ⁴Mryo apôx ne arỳm mry kukãm mrã nhym mry arỳm kôt ba. Kute amim o ba djwỳnh kabēn markam kôt ba. Nãm mry ã o ba djwỳnh kôt ane. ⁵Nhym be, atemã me bajtem mry'ỳr bôx ne te mrymã kabēn nhym kôt ba kêt ne tu mã kubê prôt ne. Kute amim me bajtem kabēn mar kêtcam amijã no tỳx ne tu mã kubê prôt ne. Mrãmri ne ba me amã ja jarēnhkumrêx, ane.

⁶Be, mrykĩ'átomtĩ'ã ujarēnhja ne Jeju kute amikabēn kukràdjà'ã akre nhym me mrybit man kukràdjà mar kêt. Nãm me te: kute mỳj'ã ujarēnh kute amijakre marmãn te: kute kukràdjà marmã.

⁷⁻⁹Nhym ajte memã kum,

—Mrãmri ije mrykĩ'átomtĩ nhô kôkayrkôt ajkwa krekre pydji pyræk. Ga, mryo ba djwỳnh kute ajkwa krekrekôt mryo ngjêxja pumũ. Nhym kôkayr tỳx



(Djoão rax 10.1-18)

arým kute mýjja djàkrêbê mry pytâr nhym umar mexja pumũ. Badjwý ije ajkwa krekre pydjimãñ prãbê dja me tu amim imarkumrêx ba arým axwebê me utã. Nhym kam me arým ikôt tĩn ne ar ba rã'ã: rã'ã ne. Atemã me'òkôt ne me tĩn kêtumrêx. Dja me tu amim bajbit imarkumrêx ba arým me utã.

Ga, mryo ba djwýnh kute kôkayr kurũm mryo apôxja pumũ. Nhym mry àkur ban ajte akubyn ngjêxja pumũ. Badjwý dja ba me utãro iba nhym me ikôt umar mex ne ar ba.

Nhym be, amrêbê ibôx kêttri ne me kwý Metĩndjwýnh'ã 'êx ne memã kum, “Metĩndjwýnh ne imã arê ba kukwakam amã kabên jarênhô iba”, ane. Me Metĩndjwýnh'ã 'êxja kunĩ ne me àkĩnhĩ. Me kute amiwýr inhô me jao akêxmãn te meo ane nhym me kute me kabên mar kêt. ¹⁰Be, me àkĩnhĩ ne me kute mryo àkĩnh ne par kadjy bôx. Nhym be, kati. Ba ne ba atemã. Me tĩnkumrêx ne umar mexkumrêx kadjy ne ba bôx.

¹¹Ije me kute mrykĩ'átomtio ba djwýnh mex pyrãk. Dja ba me kadjy ty. Ije me utãr kadjy ty. ¹²Nhym be, me mrykam àpênh djwýnh ne me atemã. Gêdja rop'ô mry'ýr bôx nhym arým tĩn prãmje tu mry kangan prôt ne. Kubê ô mry djwýnh kêtka me tu mry kangan mã prôt ne. Nhym rop arým mryo rôrôk nhym mry abenbê ajmã. ¹³Me mrykam àpênh djwýnh kute pi'òk kaprĩbit markam ne me kum mry jabê kêt. Nhym kam rop bôx nhym kum mry jabê kêtka me arým mry kangan prôt ne.

¹⁴⁻¹⁵Ba ije me kute mryo ba djwýnh mex pyrãk. Ibãm kute imarkumrêx. Badjwý ije Ibãm markumrêx. Inhô me jadjwý ije ã me maro ane. Nhym inhô me jadjwý kute imar. Ba dja ba me kadjy ty. Ije me utãr kadjy ty. ¹⁶Djãm kôkayr jakambit inhô krit? Kati. Onĩj inhô krit rã'ã. Me wãdjwý dja me amim ikabên ma. Dja ba inhô me jamê me wãdjwý aben pydji. Kam arým inhô me kunĩo iba. ¹⁷Be, mýkam ne Ibãm kum ijabê? Bir, ije kabên kôt amijo ibakam. Kam ne kum ijabê. Ba dja ba ty. Akubyn itĩn kadjy dja ba ty. ¹⁸Djãm me ta dja me ibĩ? Kati. Ba dja ba amikabênkôt tyn kam amikabênkôt akubyn itĩn ne. Ibãm ta ne ityk ne akubyn itĩn'ã imã karô, ane.

¹⁹Nãm Jeju memã ane nhym kam mebê idjaer rũnh ajte kabêno aben japanho dja. ²⁰Me krãptĩ ja ne me arĩk memã kum,

—Be, me karô punu ne o ba. Ga, kute kukwakam kabên kajgo krãptĩ jarênhja pumũ. Mýkam ne ga me kabên maro dja? ane.

²¹Nhym me kwý ja ne memã kum,

—Nhym bê ne me karô punu kute o ba nhym ã kabên kute anhýr. Be, kati. Kabên mexkumrêx. Djãm me karô punu kute me no rã noo mex mar got? ane.

Mebê idjaer rũnh kum kurê'ã ujareñh.

Dju r 5.18, 8.59, 12.32

²²Be, krĩraxbê Djeruxarêkam, me krãptĩ kute aben pydji djã nhô akatikam, arým na nhô mytyrwýkam, Jeju me'ýr tẽn bôx ne arým Metĩndjwýnh nhô

kikretikam ar mrã. Me kute aben kajmã'ã me bakukãmãre kute amrêbê:
Metĩndjwỹnhmã kikreti ny nhipêx mar kadjy ne me krãptĩ akati jakam aben pydji.

²³Jeju kikreti bu'ã kikre kre kênhkam ar mrã. Kikre kre kênhjamã
ne me kum, “Xaromão nhõ”, ane. ²⁴Nãm kam ar mrã nhym mebê idjaer
rũnh arỹm omũn kam kum ipôk ne kum,

—Aje. Ga mrãmri abê me inhõ Bẽnjadjwỹrbê kumkatibê Kritukumrêx jabej
tu me imã amijarêno amirĩtkumrêx. Mỹkam ne ga me ibê amipdju? ane.

²⁵Nhym Jeju memã kum,

—E kum arỹm ne ba me amã amijo amirĩt ga me aje amim imar kêt. Ibãm
kukwakam ije apỹnh mỹjja pumũnh kêt nhipêx djãri. Tãm ne kute me amã
ijo amirĩt mexkumrêx ga me aje amim imar kêt. ²⁶Be, me abê inhõ krit
kêtkam ne ga me aje amim imar kêt. Arỹm ba me amã ja jarê ga me arỹm
ama. ²⁷Inhõ krit ar kute amim ikabên mar. Badjwỹ ije inhõ krit ar mar nhym
ar mã ikôt ar amijo ba. ²⁸Dja ba memã tĩn jadã nhym me Metĩndjwỹnhkôt
tĩn ne ar ba rã'ã: rã'ã ne. Ne me biknor tokry djãkam biknor kêtkumrêx. Ba
mã meo iba nhym me'õ kute ibê me pa 'amỹnh ne ibê me ikô rênh prãm kêt.

²⁹Ibãm kute ikôt me kamênha ne tỹxo kute me kunĩ jakrenh. Tãm ne
mã meo ba nhym me'õ kute kubê me pa 'amỹnh ne kubê me ikô rênh
prãm kêt. ³⁰Ibãmmê ro'ã ne bar itipdjĩn ar iba. Nãm ã memã ane.

³¹Nhym mebê idjaer rũnh ajte kadjy kên jamỹ. Kute o titik ne bĩnmã
kên jamỹ. ³²Nhym memã kum,

—Ibãm kukwakam ne ba mỹjja mex krãptĩ nhipêx ne me amã o amirĩt
ga me omũ. Nhỹnh idjãpênh mexja pãnh dja ga me kên o ititik ne ibĩ? ane.

³³Nhym me kum,

—Djãm adjãpênh mex pãnh ne ba me ije kên o atitik ne abĩnmã?
Kati. Metĩndjwỹnh ne ga arỹm aprỹ. Abê pykakam me'õkam ne ga ga
amijo ajêx ne amijo Metĩndjwỹnh Kra ne amijo Metĩndjwỹnh pyrãk. Aje
Metĩndjwỹnh raxo amiptarkam ne ba me arỹm Metĩndjwỹnh ingryk ne
ije abĩnmã, ane. ³⁴Nhym amipãnh memã kum,

—Tô nhỹnh ne ba aprỹ? Be, kukwakam kabên jarênh djwỹnh ne me
bakukãmãremã Metĩndjwỹnh kabên jarên memã kum,

“Nã bãm memã kum, ‘Me abê metĩndjwỹnh’, ane.”

Nãm ã me bakukãmãremã anen arỹm 'ã pi'ók no'ók ne. ³⁵Metĩndjwỹnh kabên
ne ga me te akabêno aje o adjãpanhmã. Ga, Metĩndjwỹnh ta kute memã kum,
“Me abê metĩndjwỹnh”, anhỹrja pumũ. ³⁶Metĩndjwỹnh ta ne imã idjãpênh djã
jarên pykamã ijano ba kabên kôt amrê tên bôx. Djori kam ibê Metĩndjwỹnh
Kra kêt? Kati, ibê Metĩndjwỹnh Krakumrêx. Djori kam ba aprỹ. Arkati.

³⁷Ne ba ren Ibãm djãpênh o idjãpênh kêt ga ren me aje katãt imã ikajgo
jarênhkumrêx. ³⁸Nhym be, kati. Mrãmri Ibãm djãpênh o idjãpênhkumrêx.
Kam ga me ren amim idjãpênhbit ma. Aje amim ba imar kêtkam ga ren
idjãpênhbit man ren Ibãm djãpênh o idjãpênha man ren arỹm kam ima.

Ibãmmẽ ne bar itipdjín ar iba ga me ren kam arým ama, ane. ³⁹Nãm memã ane nhym me arým kute pa 'amýnhmã te o ane nhym mã mebê katon tẽ.

⁴⁰Ne kam arým mã ngô raxbê Djodão nhijukri tẽ. Tẽ:n arým Djuão kute ngômã me angjênhmo krax djâkam bôx ne arek kam ar ba. ⁴¹Ar ba nhym me krãptĩ 'ýr bôx ne abenmã kum,

—Be, Djuão ne me kute raxmã kator kadjy kute mýjja pumũnh kêt'ô nhípêx kêt. Kute me punuo mex kêt. Ne kam mrãmri katàt me'ôja kukãm 'ã ujarênhkumrêx. Nhym kam arým kute kukãm 'ã ujarênh kôt prĩne kôt amijo bakumrêx, ane. ⁴²Nhym kam me krãptĩ pyka jakam tu amim Jeju markumrêx.

Kute akubyn Radjaruo tĩn.

11 ¹Be, me'ô nhidjibê Radjaru ne arým kanê bĩno mō. Kanikwýnh ne ar amãnhkrut. Ar idjibê ne Marijmẽ Mata ar. Ne ar kunĩ krĩbê Betanhakam ũrkwã. ²Marij ja kute Bẽnjadjwýr djwýnh par'a me kudjý djâ kangô kapĩ. 'Ã me tyk kadjy kudjý djâ kangô kapĩn kam kute amikĩo 'ã kangô ngrã tãm. ³Nãm kamy Radjaru arým kanê bĩno mō: nhym kanikwýnh ar arým Bẽnjadjwýr djwýnh'ýr me'ô jano. Oni:j. Nhym arým 'ýr tẽ:n 'ýr bôx ne arým kum arên kum, —Bẽnjadjwýr djwýnh, onij amã anhōbikwa jabêja arým kanê: nhym kanikwýnh ar amã arê, ane.

⁴Nhym Jeju arým kuman kum,

—Djãm tu tyk rã'ã kadjy ne kanêja? Kati. Dja me kãjkwakam Metĩndjwýnh raxmã katon ba ibê Metĩndjwýnh Kra iraxmã kato. Ja kadjy ne kanê raxja, ane. ⁵Be, Matamẽ kanikwýnhmẽ Radjarumẽ ne Jeju kum ar abê. ⁶Nãm Jeju kabên man kam tu arek ýr djâkam nhý nhym 'ã akati amãnhkrut apêx.

⁷Nhym kam kôt ba djwýnhmã kum,

—Gwaj on pykabê Djudêjamã tẽ, ane.

⁸Nhym ar kum,

—E kum, ujarênh djwýnh, wãkam ajbir mebê idjaer rũnh kute kēno atitik ne abĩnmã ga ajte 'ýr atēmmã, ane.

⁹Nhym Jeju arkum,

—Djãm arngro pydjikam kãxdjâkênh pa ipôkbê 12bit. Nã tãm. Djãm ori me arngrokam mrã nhym mýjja'ô me par tok? Kati. Arngrokam ne mýjja amirĩt nhym me omũn aã'ã mrã. ¹⁰Nhym be, akamãtkambit ne me ba punu, arĩk rôrôk ba, me nokrekam irã kêtgam, ane. Me kute o tým ne bĩn kêtĩr tēmbê kute àpēnh inomã mēnhmã ne amijã arngro jakreo tēn me kute o tým ne bĩn'ã akamãt jakre.

¹¹Nãm arkum anen kam arkum,

—Be, gwaj banhōbikwa Radjaru arým ôto nō. Arým ba ije tokmã ne ba 'ýr tẽ, ane.

¹²Nhym ar kum,

—Dja ôto nōrkam akubyn mex, ane. ¹³Be, djãm mrãmri ôtkumrêx'ã ne arkum ane? Be, kati. Arým tyk'ã ne arkum ane. Nhym ar arĩk amim,

—Be, ôtkam tyk djâ kêt'a ne ã ar imã ane, ane.

14Nhym kam arkum arēnho amirĩtkumrēx ne arkum,

—Be, Radjaru ne arỳm ty. 15Wākam idjām kêt nhym arỳm ty. Kam idjām kêt kam ar akady ikĩnh. Jakam dja gwaj wākam tēn bōx gar arỳm mỳjja pumũn arỳm tu amim imarkumrēx. Ar akady ne ikĩnh. Aj gwaj on 'ỳr, ane.

16Nhym kam Jejukôt ba djwỳnh 'õ nhidjibê Tôme Djidjimuja kôt ba djwỳnh 'õdjwỳmā kum,

—Gwaj on badjwỳ kôt ty, ane.

17Nhym kam Jeju ar arỳm 'ỳr tē. 'Ỳr tē:n arỳm 'ỳr bōx.

Nhym me arỳm kum arēn kum,

—Be, arỳm ne ty ba me adjā. Nhym arỳm 'ā akati amānhkrut ne amānhkrut apēx ga bōx, ane. 18Be, krĩbê Betanhamē krĩraxbê Djeruxarēmē ne aben jatāri. Abenwỳr pry'ā akrebê kiometu amānhkrut ne ikjêkêtbit. 19Kam ne mebê idjaer krāptĩ Matamē Marij ar'ỳr bōx. Ar kamy arỳm tykkam me kute ar kaprĩ, ar mỳr, ar amakbê arkum kabēnmā ar'ỳr bōx. 20Nhym Jeju ar bōx 'ỳr nhym me'õ arỳm Matamā arē. Nhym kāj mā djan ate kutā tē. Nhym be, Marij arek nhỹ.

21Mata Jeju kutā tēn arỳm kajpan kum,

—Bēnjadjwỳr djwỳnh, ga ren pyka jakam arek ar aba nhym ren ikamy tyk kêt kumrēx. 22Gēdja ga mỳjja'õo Metĩndjwỳnhmā a'uw nhym arỳm akabēn man prĩne akabēn kôt ipēx ne. Tām ne arỳm ije mar, ane.

Nhym kum,

23—Dja atō akubyn tĩn, ane.

Nhym kum,

24—Nā, me kunĩ kute aminhinomā amimēnh djā nhō akatikam dja me tyk akubyn tĩn. Nhym mekôt dja ikamy akubyn tĩn. Tām ne arỳm ije mar, ane.

Nhym kum,

25—E kum, ba ne ba ibê akubyn me tyko tĩn djwỳnh ne ije memā tĩn jangjēnh djwỳnh. Me kute tu amim ikamnhĩxkumrēx dja me tĩn ne. Dja te tyn Metĩndjwỳnhkôt tĩn ne ar ba rā'ā: rā'ā ne. 26Nhym me tĩn ne ar ba kute tu amim ikamnhĩxkumrēx dja me Metĩndjwỳnhkôt tĩn ne tyk kêt kumrēx. Djā ne ga tu amim ikabēnja markumrēx? ane.

Nhym kum,

27—Nā, Bēnjadjwỳr djwỳnh, abê Kritukumrēx. Mrāmri ne Metĩndjwỳnh ajā me inhō Bēnjadjwỳrbê kumkati mēnhkumrēx. Me bakukāmāre kute amrēbē: memā kum, “Gēdja ĩ Metĩndjwỳnh Kra pykamā bōx”, anhyr kôt ga arỳm bōx ne kam abê Metĩndjwỳnh Krakumrēx. Tām ne ba tu amim markumrēx.

28Nām ā kum anen kam akubyn kanikwỳnh'ỳr tē. 'Ỳr tē:n arỳm 'ỳr bōx ne me kaxā kum,

—Arỳm ne memā ujarēnh djwỳnh bōx ne amā kabēn. 29Nām kum ane nhym kāj mā djan amibēx ne 'ỳr tē. 30Be, kraxje Jeju krĩmā àr kêt. Nām arek Mata kute kajpar djākam arek dja. 31Nhym Marij kāj mā djan amibēx ne tē nhym kikrekam mebê idjaer kute ar kaprĩbê arkum kabēno āmja arỳm abenmā kum,

—Be, ar mỳrmā ne ar kēnkre'ỳr tē, ane. Nām me anen arỳm kôt tē.



(Djoão rax 11.1-44)

³²Nhym be, Marij Jeju'ÿr tẽ nhym arek kam dja nhym arÿm 'ÿr bõx.
Ne omũn arÿm kõnkrão nhÿn kum,

—Bẽnjadwÿr djwÿnh, ga ren pyka jakam ar aba nhym ren ikamy tyk
kêtkumrêx, ane.

³³Nãm mÿro nhÿ nhym kôt mebê idjaer môrja kôt mÿro dja. Nhym Jeju
me omũn arÿm rerekren tik ngyo dja. ³⁴Ne kam memã kum,

—Nhÿnh ne ga me adjà? ane.

Nhym me kum,

—Bẽnjadwÿr djwÿnh, amrẽ ar ikôt tẽn omũ, ane.

³⁵Nhym Jeju arÿm muw.

³⁶Nhym mebê idjaer abenmã kum,

—Be, kum abêkumrêx. Ga, arým mýrja pumũ, ane.

³⁷Nhym me kwý abenmã kum,

—E kum, me no rãmã ne rít mex jangij. Nok ren Radjarudjwýo mex nhym ren tyk kêt ne, ane.

³⁸Nhym kam Jeju 'ýr tik ngy tẽn arým kênkre'ýr bôx. Kênpotio ne me arým kênkre'ã ijê. ³⁹Nãm kênkre'ýr bôx ne memã kum, “Me 'ã kênpoti kaba”, ane.

Nhym tyk kanikwýnh Mataja kum,

—Ô kum arým kro:. Tyk'ã arým akati amãnhkrut ne amãnhkrut apêx, ane.

⁴⁰Nhym Jeju kum,

—Ê, arým ne ba amã, “Dja ga tu amim ikamnhĩxkumrêx ne arým Metĩndjwýnh raxmã akato”, ane.

⁴¹Nhym me arým kênkre'ã jãm kênpoti dja. Nhym Jeju kãmã krãn kàjkwa jabên Bãmã kum,

—Djũnwã. Ga ne ga arým aje ikabên mar. Kam ikĩnhkumrêx. ⁴²Amã ikabên kunikôt ne ga arým aje ikabên mar. Be, me ibu'ã ku'ê ja amã ikabênkôt kute imar kadjy ne ba amã ikabên. Dja me tu amim imarkumrêx ne ijã amim, “Be, mrãmri ne Metĩndjwýnh kute anorkumrêx”, anhýro ba. Ja kadjy ne ba amã ikabên, ane.

⁴³Nãm anen arým kãj bê kabên ne kum, “Radjaru, amrê akato”, ane.

⁴⁴Nhym arým me aêrbê akubyn tĩn ne kato. Arým tu tykkumrêx ne jakam arým akubyn tĩn ne kato. Prĩne kubêkào ikramê par'ã kupu rã'ãn kato. Kubêkào nokre kupu rã'ãn kato.

Nhym Jeju memã kum,

—Me 'ã kubêkà bô gê tẽ, ane.

Me kute bĩn kadjy kute o aben mar.

Mat 12.14; Ruk 6.11

⁴⁵Jeju akubyn Radjaruo tĩn nhym mebê idjaer omũ nhym arým kwý krãptĩ tu amim Jeju markumrêx. Marijkôt me môrja tu amim markumrêx.

⁴⁶Nhym me kwý ja arým amũ mebê pardjêu'ýr môn memã Jeju jarê.

⁴⁷Nhym kam me kadjy Metĩndjwýnh mar djwýnh nhõ bẽnjadjwýrmê mebê pardjêu arým me rũnho akuprô. Nhym kam me abenmã kum,

—Be, mýjja pumũnh kêt kwý rax ne ipêx. Me kute raxmã kator kadjy ne ipêx. Nãm me punu krãptĩo mex ne akubyn me tyko tĩn. Mýj dja gu me nê? ⁴⁸Dja gu me amitô nhym me kunĩ arým tu amim markumrêx ne kôt ar amijo ba. Dja me ane nhym krĩraxbê Rômakam me ô me ja arým me bawýr prôt ne pyka mẽ Metĩndjwýnh nhõ kikretio amrãn aben bê me babê idjaer kunĩ ngrã, ane.

⁴⁹Nhym me kadjy Metĩndjwýnh mar djwýnh nhõ bẽnjadjwýr raxbê Kajbajja ne amexja tãmkam memã nhỹ. Kajbaj memã kum,

—E kum, me aje mýjja mar kêt. ⁵⁰Me'õ pydji dja me babê idjaer kunĩ pãnh ty. Kam dja me abenbê me bangràn kêt gu me arým badjumar mex. Me aje ja mar kêt, ane.

⁵¹Be, djām Kajbaj ta ne amikabēn jarē? Kati. Metīndjwýnh kukwakam ne kabēn jarē. Amexja tāmka ne kubē me kadjy Metīndjwýnh mar djwýnh nhō bēnjadjwýr rax. Bēnjadjwýr rax ne Metīndjwýnh mar djwýnh kunimā nhý. Kunimā ýrkam ne arým memā Metīndjwýnh kabēn jarē. Kute memā Jeju mebē idjaer kunī pānh tyk jarēnhkam ne memā Metīndjwýnh kabēn jarē. ⁵²Be, djām mebē idjaerbit pānh dja ty? Kati. Metīndjwýnh kraja amrēbē abenbē me bimānh. Apýnh me bajtem ba djākam me bimānh. Jeju kute amikôt me jao aben pydjimā. Me jadjwý pānh dja ty. 'Ā ne Kajbaj kute Metīndjwýnh kukwakam kabēn jarēnhja.

⁵³Be, krax ne ja. Me kute Jeju bīn kadjy kute aben kabēn marmo krax djā ne ja. Jeju kute akubyn Radjaruo tīn nhō akati jakam.

⁵⁴Nhym kam Jeju kute ja nhijukri mebē idjaer rūnhmā amijo amirīto ba kêt. Kapôt kukrit nokà'ā ar bamā ne arým tē. Kam ne arým krībē Epraīmā tēn bōx ne kôt ba djwýnhmē ro'ā kam ar ba.

⁵⁵Nhym kam mebē idjaer kute aben pydji djā 'ýr. Me kute me kukāmāre nhirôbē mrānhja mar kadjy arým ō akati 'ýr. Kam ne me krāptī: kadjy krīraxbē Djeruxarē'ýr ābir mō. Me kute Mōjdjē kukradjā kôt Metīndjwýnhmā amijaxwe jarēnhmā ne me mō. ⁵⁶Ne kam arým bōxo dja nhym me rūnh arým Jeju jabej. Ne Metīndjwýnh nhō kikretikam abenmā kum,

—Djām me krāptī kute aben pydji djā nhō akati kadjy mekôt bōxmā? Djā ne ga me ajō ama? ane. ⁵⁷Be, arým me kute Jeju'ā memā karō. Me kadjy Metīndjwýnh mar djwýnh nhō bēnjadjwýrmē mebē pardjēumē ne me arým 'ā memā karōn memā kum,

—Dja ga me ajō Jeju pumūn me imā arē ba me pa 'amý, ane.

Marij kute par'ā kangô pānh rax kapīn.

Mat 26.6; Mak 14.3

12 ¹Me Djeruxarēkam Jeju jabej nhym arým ajte krībē Betanhakam bōx. Betanhakam ne Radjaru ar ba. Amrēbē ne ty nhym Jeju 'ýr bōx ne akubyn ō tīn. Ne jakam Jeju ajte Betanhakam bōx. Nhym amū Djeruxarēkam Metīndjwýnh me irôbē mrānh nhō akati bōx 'ýr. Dja akati amānhkrut ne amānhkrut ne amānhkrut apēx nhym arým akati bōx.

²Nām Jeju Betanhakam bōx nhym arým amykry. Nhym Mata ar arým kum ō kwý krēn djā nhipēx. Ipēx nhym Jeju ar krēno nhý. Mata ne arkum ō kwý krēn djā nhōro dja. Radjarumē ro'ā ne ar àkuro nhý. ³Àkuro nhý nhym Marij arým me kudjý djā kangô ipuja by. Me tyk kadjy ne kudjý djā. Kangô nhidjibē ne nadu. Utī'ā akrekam ne kubē kiru kute ō katē 'ýr ne kam pānh raxkumrēx. Nām ar àkuro nhý nhym Marij arým kangôja byn Jeju par'ā kapī. 'Ā kapī ne amikīo arým par'ā kangô kwý ngrā. Nhym kam arým amū kikre krekôt kudjý prôt ne.

⁴Nhym Djuda Ikadji. Ximāo kute ir ja. Jejukôt ba djwýnhja. Tāmja dja kurē djwýnhmā Jeju kanga. ⁵Marij Jeju par'ā kangô kapī nhym Djuda arkum,

—Je tô, mýkam ne arým kangô mexjao akno? Ne ga ren ar memā kangô ngān ren pānh pi'ók kapī kumex ne aby. Ne ren pānh'ā akrekam denarju kubē

300 ne ren abyn kam ren me ò mỳjja kêt mã angrà, ane. ⁶Be, djãm Djuda kum me bikênh kaprĩkam ne ã arkum ane? Kati. Àkĩnhĩkam. Kubê ar ò pi'òk kaprĩo ba djwỳnhkam. Ne kam ta amim kwỳo àkĩnho ba. Kam ne ã arkum ane.

⁷Nhym Jeju arkum,

—Kwārĩk wānh rā'ā. Mỳj kadjy ne amim kangô dji? Bir, dja ba ty nhym me arỳm ijadjà. Kute ijā kangô kapĩnkam dja ba ikudjy nhym me ijadjà. Ja kadjy ne amim kangô dji. ⁸Ar aje memā mỳjja nhõrmā wānh ne me ò mỳjja kêt ar abu'ā ar ba rā'ā. Dja gar anen arỳm memā mỳjja ngā. Badjwỳ. Djãm arek gwaj baro'ā ar baba rā'āmā? Kati. Nām ã Jeju arkum ane.

⁹Jeju Betanhakam ar ba: nhym kam mebê idjaer krāptĩ arỳm kuman 'ỳr bõx. Djãm me kute Jejubit pumũnhmā ne me 'ỳr bõx? Kati. Radjarudjwỳ. Jeju kute Radjaru tyk akubyn o tĩnkam ne me kute adjwỳnhdjwỳ pumũnhmā 'ỳr bõx. ¹⁰Nhym be, me kadjy Metĩndjwỳnh mar djwỳnh nhõ bẽnjadjwỳr ne ar atemā. Nām ar bit kute Radjaru bĩnmā 'ā aben maro nhỹ. ¹¹Be, mỳkam? Bir, Jeju kute akubyn Radjaruo tĩnkôt mebê idjaer krāptĩ arỳm omũn tu amim Jeju markumrẽx. Nhym kam me kute omũnh kêt kadjy ar kute Radjarudjwỳ bĩnmā. Nhym Jeju Betanhakam ar ba nhym kam 'ā akati. 'Ā akati nhym Jeju amũ Djeruxarê'ỳr tẽ.

Jeju rax ne Djeruxarēmā àr.
Mat 21.1; Mak 11.1; Ruk 19.28

¹²Nhym kam me Djeruxarẽkam kukām abenmā kum,

—Arỳm Jeju bõx 'ỳr. Arỳm Jeju bõx 'ỳr, ane. Me krāptĩ kute aben pydji djā nhõ akati kadjy bõxja ne me ã abenmā ane. ¹³Ne kam mõn bõ kwỳ nhikẽ. Me kute o Jeju kajpar kadjy ne me arỳm kutā mō. Ne kàj bẽ abenmā Jeju mexo àkjêr mõn mã memā kum,

—Jejubê ne me banhõ bẽnjadjwỳr rax. Ām mexkumrẽx. Kam me bakĩ:nhkumrẽx. Gê on me bapytā. Gê Bẽnjadjwỳr djwỳnh o kĩnh rax. Kukwakam ne arỳm me bakadjy bõx. Ām mexkumrẽx. Me babê idjaer nhõ bẽnjadjwỳr rax ne arỳm bõx, ane.

¹⁴Me kute o anhyr kêtĩ ne Jeju mry'ā nhỹ. Nām mry'ā krĩ jabatàn nyremā katon 'ā nhỹ. Amrêbê: ne me Metĩndjwỳnh kukwakam me bakukāmāremā ja jarên memā kum,

¹⁵“Ē krĩrāxbê Xijāokam me ja, kwārĩk wānh me atĩn prām kêt.

Ota, me anhõ bẽnjadjwỳr rax bõxmā. Dja mry'ā krĩ jabatàn nyre'ā nhỹn me awỳr bõx.”

Nām me ã me bakukāmāremā anen arỳm 'ā pi'òk no'òk ne.

Nhym me aben djô'ā arênho mō:n arênho mōr tām tã tũ:mràm me bakamingrānyrekam arỳm 'ỳr o bõx. Jeju mry'ā nhỹn arỳm Djeruxarê'ỳr bõxmā tẽmkumrẽx. Djeruxarê nhidji nhikjêbê ne Xijão.

¹⁶Nām 'ỳr tẽ nhym me o àkjêr mō. Nhym kôt ba djwỳnh ar kute omũnh totokbê amim,

—Je tô, mỳj'ã ne me kute Jejuo àkjêrja? anen mar kêt ne. Arỳm Jeju àbir ne ra:xkambit dja ar akubyn pi'òk kôt amijo tẽn arỳm kuma. Be, pi'òkkam me kute Jejuo anhỳrmã kôt ne me arỳm jakam ã Jejuo ane. Ja dja ar kuma.

¹⁷Be, Jeju kutã me môrja ne me amrêbê Jeju kute akubyn Radjaruo tĩnkôt omũ. Kute kum kabẽn nhym kẽnkre kurũm katorkôt ne me omũ. Ne kam amũ memã 'ã ajarê. ¹⁸Nhym me krãptĩ arỳm kute akubyn o tĩnja man kam arỳm adjwỳnhdjwỳ mekôt Jeju kutã mון kajpa. ¹⁹Me krãptĩ: Jeju kutã mון kajpa. Nhym kam mebê pardjêu arỳm abenmã kum,

—Be ga, pyka kunĩkôt me kunĩ arỳm kute 'ỳr amijo akějja pumũ. Me baje te: mebê Jeju pyma nhym me mã kum kĩnhja pumũ, ane.

Amikukãm amityk'ã ujarênh.

Mak 8.34

²⁰Nhym kam me bajtembê kreguja kwỳ ne me me krãptĩ kôt ar ba. Me kute mekôt me kute aben pydji djã nhô akatikam Metĩndjwỳnhmã rax jarênh kadjy ne me bôx ne mekôt ar ba. ²¹Ne kam arỳm Piri'pĩ'ỳr bôx ne kum, “Ba me Jeju pumũ”, ane. Piri'pĩ ne pykabê Garrêjakam krĩraxbê Bexadakam abatãnh djã. ²²Me kum ane nhym amũ Ængre'ỳr bôx ne kum arê. Nhym kam ar ro'ã Jeju'ỳr tẽn kum arê.

²³Nhym Jeju arkum,

—Be, arỳm ityk'ã akati bôx 'ỳr. Dja ba me kadjy tyn akubyn itĩn. Ne kam arỳm ira:xkumrêx ne ipyma:. ²⁴Ga, me kute bãygogo 'y krekam arỳm tyk pyrãk. Djãm mrãmri ne arỳm ty? Kati. Ga, 'y ingrôt ne abatãnh nhym arỳm 'ã ô kumexja pumũ. Ne ren me 'y kre kêt nhym ren 'y kajgo rã'ãn àptãr kêtumrêx. Ba ije bãygogo 'y pyrãk. Badjwỳ dja ba ty nhym me arỳm ijadjã. Nhym kam ityk djô'ã arỳm me krãptĩ tĩn. Mrãmri ne ba ar amã ja jarênhkumrêx.

²⁵Be, me arek pykabêbit ar ba kadjy kute amimarja dja me arỳm tyn akuno. Nãr me kadjy kute amimar kêtja, arek pykabêbit ar ba kadjy kute amimar kêtja dja Metĩndjwỳnh me utã nhym me arỳm kôt tĩn ne ar ba rã'ã: rã'ã ne. ²⁶Be, me imã àpênhja gê me mã ikôt amijo bakumrêx. Kam dja ba nhĩ'ãm ar iba nhym inhô àpênh arek ikôt ar ba. Dja imã apê nhym Ibãm arỳm kãjmã kum rax kamê, ane.

²⁷Ne ajte arkum,

—Be, arỳm idjumar punu iwỳr bôx. Be, mỳj dja ba nê? Djãm ije kum, “Djũnwã, arỳm itokry'ã myt bôx 'ỳr. Itokrybê ipytã”, anhỳrmã? Kati. Ije itokry ja markumrêx kadjy ne ba arỳm tẽn bôx. Nãm ã arkum ane. ²⁸Ne ajte Bãmãmã kum,

—Djũnwã, jakam dja ga memã amiraxo amirĩt gê me araxmã kato, ane. Nhym ar arỳm kàjkwa kurũm Bãm kabẽn ma nhym kum,

—Arỳm ne ba memã iraxo amirĩt. Dja ba ajte memã iraxo amirĩt, ane.

²⁹Nhym ar bu'ã me ku'ê kwỳ arĩk abenmã kum,

—E kum, na ne krikrit, ane.

Nhym me kwỳ arĩk abenmã kum,

—Metĩndjwỳnh kadjy mrãnh djwỳnh'ô ne kum kabẽn, ane.

³⁰Nhym Jeju memã kum,

—Djãm ba ije kabẽn mar kadjy ne kabẽn kato? Kati. Me ga aje kabẽn mar kadjy. ³¹Be, jakam dja Metĩndjwỳnh me kunĩ axwemã kato. Me ĩ pỳnhkõt me axwe djàri kum kato. Jakam dja ba pykakam me axwe nhõ bẽnjadjwỳro apan kujaten kumẽ. ³²Dja me kỳjrũm inhõ ba arỳm amiwỳr me kunõ akẽx, ane. ³³Pĩte'y'ã jêt'ã ne ã memã ane.

³⁴Nhym me kum,

—Nhym bê ne me kute me inhõ Bẽnjadjwỳrbê kumkatibê Kritukumrẽx bĩnmã. Kritu ne tyk kêtukumrẽxmã nhym me me imã arẽ, Mõjdjê kukràdjà'ã pi'òk no'òk kõt ne me imã arẽ ba me kuma. Be, ga ne ga atemã. Aje me imã, “Ba ije amijo inhĩa dja me kỳjrũm inhõ”, anhỳr kõt ba me arỳm akajgo ma. Be, we aje amijo anhĩjakam mỳj me ajõ ga nã? ane.

³⁵Nhym Jeju memã kum,

—Ga, akamãt kô tykkam me ba punuja pumũ. Me kute amikukãm mỳjja pumũnh kêt kam ne me ba punure. Ba ije memã pry kurwỳ djà pyràk ne memã Metĩndjwỳnh kabẽn jarẽn nhym me arỳm tu amim markumrẽx ne ba mexkumrẽx. Arek me aro'ã ar ibari dja ga me tu amim imarkumrẽx ne ikabẽn kõt ar amijo aba. Nok ga ren kõt amijo aba kêt ne ren me axwe kõt ajaxwen arỳm aje ajte me akamãt kô tykkam ba punu pyràk. ³⁶Arek me aro'ã ar ibari dja ga me tu amim imarkumrẽx. Ne kam arỳm aje mrãmri ne pry kurwỳ djàkõt me ba mex pyràk, ane. Nãm Jeju memã anen arỳm mã tẽn mebê amijo apdju.

Me kute amim Jeju mar kêt.

³⁷Kute amijo bipdjur kêttri ne me nokrekam mỳjja krãptĩ nhipêx. Nãm te me punu krãptĩ mex nhym me kute amim mar kêtukumrẽx. ³⁸Be, amrêbê: Metĩndjwỳnh kukwakam kabẽn jarẽn djwỳnhbê Idjaij kute me bakukãmãremã arẽn kõt ne me kute amim mar kêt. Nãm memã kum,

“Bẽnjadjwỳr djwỳnh, mỳj me'õ ne kute amim ar ikabẽn mar got?

Mỳj me'õ ne kute Bẽnjadjwỳr djwỳnh djàpẽn pumũnhkam amim mar got?” Nãm ã me bakukãmãremã ane. Nhym me arỳm aben djô'ã arẽnho mō:n arẽnho mōr tãmtã arỳm tũ:mrãm me bakamingrãnyrekam arỳm 'ỳr o bõx. Jeju te me punu krãptĩ mex nhym me me omũn amim Jeju mar kêtukumrẽx.

³⁹Idjaij kute me bakukãmãremã arẽn kõt ne me me omũn amim Jeju mar kêt. Be, djãm me ta ne me kute tu amim markumrẽxmã? Kati. Me ta ne me te: kute amim marmã. Be, mỳkam? Bir, Metĩndjwỳnh ta kute me nomẽ me amako bimràkkam. Kõt ne Idjaij ajte me bakukãmãremã kum,

⁴⁰“Metĩndjwỳnh ne mebê nomẽ amako amrà.

Nhym kam me te memã mỳjja jakre nhym me kukràdjà pumũnh kajgon mã omũnhkumrẽx kêt.

Nhym me te memã mỳjja jarẽ nhym me mar kumrẽx kêt ne. Mã kukràdjà'ã mỳjja kute amijakreja mar kêt. Ne kam iwỳr amijo akẽx kêt ba kam memã axwe jarẽn rã'ã ne kam ije meo mex kêt.

Me amakkre kêt prām kam ne ã meo ane”, ane.

⁴¹Idjaij ne Jeju mexo umakôt omũ ne 'ã me bakukãmãremã ujarẽnh ba. Ne kam ã memã ane. Kam me ta te kute amim Jeju marmã.

⁴²⁻⁴³Be, djãm me rũnh kunĩ ne me amakkre kêt prãm? Kati. Me kwỳ kute tu amim markumrẽx. Djãm me kwỳ ja kute memã amijo amirĩt? Djãm me kute memã kum,

—Arỳm ne ba tu amim Jeju markumrẽx, anhỹro amijo amirĩt? Kati. Mebê pardjêu kabẽn pymaje ne me kute memã amijarẽnh kêt. Be, mỳkam? Bir, me amim,

—Dja ba amijarẽnh kêt nhym me imã imex jarẽnh rã'ã. Ba ren Jeju'ã memã amijarẽ nhym ren me arỳm imã ijaxwe jarẽn me nêje bõm imẽ. Ne ren kam ajte me bikprõnh djakam me ro'ã ikrĩ kêt, anhỹro ba. Me kute amim anhỹrkam ne me kute memã amijarẽnh kêt ne. Djã ne Metĩndjwỹnhbit kute memã mex jarẽnhja me kum kĩnh? Kati. Pykakam me axwe kute memã mex jarẽnhja ne me kum kĩnh. Jabit ne me kum kĩnh.

⁴⁴Nhym kam Jeju kàj bẽ memã kum,

—Djãm me aje tu amim imarkumrẽxkam ne ga me aje bajbit imar? Kati. Me aje amim imar o ne ga me aje amim ijanor djwỹnh mar. ⁴⁵Me aje ipumũnh o ne ga me aje ijanor djwỹnhdjwỹ pumũnh. ⁴⁶Ga, me kute akamàt kô tykkam pry kurwỹ nhym pry arỳm amirĩtkumrẽxja pumũ. Nhym me arỳm ba mexkumrẽx. Badjwỹ ne ba memã Metĩndjwỹnh kabẽn jarẽ. Nhym me kwỳ ĩ pỹnhkôt kute tu amim kabẽn markumrẽx ne kôt kute amijo baja ne me arỳm axwe kêt ne kute amijo ba mexkumrẽx. Ne ajte kute akamàt kô tykkam me ba punuja pyrak prãm kêtumrẽx.

⁴⁷Me ajõ aje ikabẽn mar kajgon amim imar kêt kam djãm on ije amã ajaxwe pãnh jarẽnhmã? Me anhĩ pỹnhkôt ajaxwe djari pãnh jarẽnhmã? Djãm on pãnh atokrymã? Kati. Djãm ije memã axwe pãnh jarẽnh nhym me pãnh tokrymã ne ba bõx? Kati. Ije pykakam me kunĩ axwebẽ me utarmã ne ba bõx. ⁴⁸Be, me ajõ aje ikangan amim ikabẽn mar kêt kam me'õ dja amã ajaxwe pãnh jarẽ. Me kunĩ kute aminhinomã amimẽnh djã nhõ akatikam dja kàjkwakam Metĩndjwỹnh amã, “Aje amim Ikra mar kêt kam ajaxwekumrẽx”, ane. Dja amã ane ga arỳm ajaxwe pãnh atokry.

⁴⁹Mỳkam dja ã amã ane? Bir, djãm ba ikabẽn ne ba me amã arẽ? Kati. Ibãm ne ikabẽn'ã imã karõ ba arỳm me amã arẽ. Kam dja Ibãm ta amikabẽno ngryk ne me ajomã ajaxwe pãnh jarẽ. ⁵⁰Ibãm ne imã, “Dja me tu amim amarkumrẽx ne arỳm ikôt tĩn ne ar ba rã'ã: rã'ã ne”, ane. Tãm ne ba ije markumrẽx. Kam Ibãm kute imã kabẽn jarẽnh kôt ne ba memã arẽ. Nãm ã Jeju memã ane.

Kute ar par ku'õnh.

13 ¹Be, arỳm Metĩndjwỹnh me bakukãmãre nhirõbẽ mrãnh nhõ akati 'ỳr. Mebê idjaer kunĩ kute aben kajmã'ã me irõbẽ mrãnh djã mar kadjy aben pydji djã nhõ akati 'ỳr. Jeju arỳm kute pykakam mebẽ àbir 'ỳr.

Bām'ỳr àbir 'ỳr. Ja ne arỳm kute mar. Arỳm ne kum pykakam ò me ja jabê:. Nhyim te me amakkre kêt arỳm kute bìn 'ỳr nhyim kum ò me abê rã'ã.

²Arỳm ar kute ò kwỳ krên parkam nhyim Djuda kute Jeju kanga 'ỳr. Ximão ne Djuda dji. Djuda ja nhidji nhikjêbê ne Ikadji. Nãm kute kurê djwỳnhmã kanga 'ỳr. Xatanaj ne 'ã kum apnê nhyim kute memã kanga 'ỳr. ³Bãm arỳm kute Jejumã ò mỳjja kunĩ kanga nhyim arỳm Bãmbê Metĩndjwỳnh kurũm rwỳk ne kam akubyn 'ỳr àbir 'ỳr. Ja ne Jeju arỳm kute mar. ⁴Nãm kuman kam kàjmã dja. Ar ò kwỳ krên parkam kàjmã djan ò kubêkà krākào pôx ne adjuw. Ne me'ã ngò ngrà djà byn arỳm o amikrax kupu. ⁵Ne kam arỳm ngòngh purortikam ngò run kam arỳm kôt ba djwỳnh par ku'ònghmo krax. Ar par ku'òngho tẽ:n mã me'ã ngò ngrà djào ar par'ã ngò ngrà. O amikrax kupu rã'ãn o ar par'ã ngò ngrà.

⁶Nãm ar par ku'òngho tẽ:n kam arỳm Ximão Pedru'ỳr bôx. Nhyim kum, —Je, djãm ba dja ga ipar ku'ô? ane.

⁷Nhyim Jeju kum,

—Jakam aje idjâpêngh mar kêt. Dja ba ï amã arê ga ama, ane.

⁸Nhyim kum,

—Be kati. Aje ipar ku'òngh prãm kêtumrêx, ane.

Nhyim kum,

—Dja ba apar ku'òngh kêt ga arỳm ikôt aba kêt, ane.

⁹Nhyim kum,

—Bênjadjwỳr djwỳnh. Djãm iparbit? Inhiqramê ikrãdjwỳ dja ga ku'ô, ane.

¹⁰Nhyim kum,

—Be, gar arỳm adjwỳrkam arỳm ar anhi mex ba kam ije ar aparbit ku'ònghmã, ane. Ne kam ar axwe kêt'ã arkum,

—Be, arỳm ar amex. Djãm ar akunĩ ne gar amex? Kati. Ar ajò apydji ne ga amex kêt, ane. ¹¹Arỳm kute amikukãm kurê djwỳnhmã kanga djwỳnh markam ne arkum,

—Djãm ar akunĩ ne gar amex? Kati, ane.

¹²Ne kam arỳm ar par ku'òngh pan kam kà jangijn kam nhỳn arkum,

—Be, mỳkam ne ba ar apar ku'ô? Djã ne gar ama? ¹³Bir, gar imã, “Ujarêngh djwỳnh, Bênjadjwỳr djwỳnh”, anhỹro aba. Be, mrãmri ne gar imã arê. Ibê tãm. ¹⁴Ibê ar anhõ Bênjadjwỳr djwỳnh ne ibê ar anhõ ujarêngh djwỳnhkam ne ba arỳm amijo ingrin amijo ikâtàm ne arỳm ar amã apê. Ar akajgo mex, ar akâtàmmã ne ba apên arỳm ar apar ku'ô. Djãm ar ajò aje, “Be, ba ne ba irax. Ije me kajgomã idjâpêngh prãm kêt”, anhỹrmã? Kati. Ar gadjwỳ aben par ku'ô.

¹⁵Be, mỳj kady ne ba ar apar ku'ô? Bir, dja gar ipumũn ikudjwa arỳm amijo angriren akâtàm ne abenmã apê. Ja kady ne ba ar apar ku'ô.

¹⁶Imã adjâpênghkam djãm aje araxo ijakrenh got? Ije ajanorkam djãm aje araxo ijakrenh got? ¹⁷Ar aje araxo ijakrenh kêtgam dja gar amijã ije ar apar ku'ònghja man ikudjwa amijo angriren amijo akâtàm ne abenmã apê. Dja gar amijo anen arỳm akĩnhkumrêx.

Djuda kute memã Jeju kanga kukãm arkum 'ã ujarênh.

Mat 26.21; Mak 14.18; Ruk 22.21

¹⁸Be, djã ne ba ar akunĩmã ikabên jarê? Kati. Djãm ar akunĩ amex? Kati. Ije ar anhi pñnhkôt amijo ar apytâr ba arým ije ar amar. Nhym be, ar ajô dja ga amã ikurê. Amrêbê: ije amikukãm arênh kôt dja ga amã ikurê. Nã bãm me bakukãmãremã kum,

“Gwaj baro'ã badjàkur'ô dja kum ikurê”, ane.

Nã bãm ã memã ane nhym me arým 'ã pi'ôk no'ôk ne. Nhym me aben djô'ã arênh mō. Arênh mōr tãmtã tũ:mrãm arým iwýr o bôx. Gwaj baro'ã badjàkur'ô dja kum ikurê. ¹⁹Ar ajô amã ikurê kêtri ba arým pi'ôkkam ar amã ikabên jarê.

Be, mýj kadjy? Bir, dja gar ajô amã ikurê kôt arým omũn kam arým akubyn amijo tẽn pi'ôkkam ikabênja ma. Anhýr djwýnhãm ikabên ja ma. Ne kam arým amim, “Mrãmri kôt ne amikukãm arênhkumrêx. Jejubê ne Bẽnjadjwýrbê kumkatibê Kritukumrêx”, ane. Dja gar ã anen tu amim imarkumrêx.

²⁰Be, godja ba amũ me ano nhym me me'ýr bôx nhym me arým amim me kabên man kam arým kôt badjwý amim ima. Ne kam arým kôt amim kute ijanor djwýnhdjwý ma. Mrãmri ne ba ar amã ja jarênhkumrêx, ane.

²¹Jeju arkum anen arým umar punure ne. Ne kam arkum arênh amirĩtkumrêx ne arkum,

—Be, mrãmri dja gar ajô ikurê djwýnhmã ikanga. Mrãmri ne ba ar amã ja jarênhkumrêx, ane.

²²Nhym kôt ba djwýnh te kute marmã abenkam no tyn nhýn amim,

—Je tô, mýj me'ô'ã ne ane? ane. ²³Be, kôt ba djwýnh'ô ne Jeju târi nhý. Jeju kum abêja. ²⁴Nhym Ximão Pedru jãnh nhýn amũ Jeju târi ýrja'ýr akêx ne ar aktã aben pumũ. Ne kam kute ar 'ô jabej Jeju kukjêrmã Pedru kum inhuo Jeju jakre.

²⁵Nhym arým Jeju'ýr ajkamẽn kum,

—Bẽnjadjwýr djwýnh, nhym nã? Ar imã arê bar kuma, ane.

²⁶Nhym kum,

—Dja ba ômrômã djwý jadjàn amũ kum kungã ga arým ar 'ô pumũ, ane. Ne kam arým kum adjàn amũ Djudamã kungã. Djuda nhidji 'ôdjwýbê ne Ikadji. Ximão 'ôdjwý ne Djuda dji. ²⁷Nãm kum kungã nhym Xatanaj arým Djudamã wadjàn 'amýnh týt ne. Nhym kam Jeju arým kum, “Ajrã, amibêx”, ane.

²⁸Nhym kôt ba djwýnh kute kabên mar kajgon mýjja'ã Jeju kute kum kabên jarênhja ar kute mar kê. ²⁹Djudabê ne ar ô pi'ôk kaprĩo ba djwýnh. Ne kam ar kwý arĩk amim,

—Bãrãm kute gwaj banhô kwý krên djã'ô byrmã ne ano. Me krãptĩ kute aben pydji djã nhô akati kadjy kute mýjja byrmã ne ano. Nãr, kute me ô mýjja kêtãm mýjja kwý nhõrmã ne ano, ane. ³⁰Nãm Jeju kum djwý ngã nhym arým kubyn mã kadjy katon tẽ. Arým akamãtkam ne tẽ.

Pedru 'ëxnhĩ kukām kute kum arēnh.

Mat 26.31; Mak 14.26; Ruk 22.31

³¹Djuda kato nhym Jeju arým kôt ba djwýnhmã kum,

—Ije amijo inhĩ ne ar ibaja dja me jakam arým iraxmã kato ba memã irax. Nhym kam me arým ikôt kâjkwakam Metĩndjwýnh raxmã kato.

³²Nhym kam arým memã ra:x ne uma:n kam arým amiraxo badjwý ijo rax. On dja ijo ra:x ba ipyma:.

³³Akmere ar, gwaj baro'ã ar babaja arým kêt 'ÿr. Dja gar ijabej ar aban te idjãm djà'ÿr abôx prãmje. Nã bãm ã mebê idjaer rûnhmãdjwý ane. Ar gadjwý ba arým ã ar amã ane.

³⁴Be, ba ar amã 'ã karõ. Ikabên ny ne ba ije ar amã arēnhmã. Dja gar aman mã kôt amijo aba mex ne amã aben jabê. Kute imã ar ajabê pyrãk ã ar amã aben jabêo ane. ³⁵Nhym kam me kâtãm kunĩ arým ar ajã abenmã kum, “Be, Jejukôt ba djwýnhkumrêx ne wã. Ga, arkum aben jabêwã pumũ.” Dja me ã ar ajã abenmã ane. Nãm ã Jeju arkum ane.

³⁶Nhym Ximão Pedru kum,

—Bênjadjwýr djwýnh, jãm ne ga atēmmã? ane.

Nhym kum,

—Bir, dja ba tẽ ga arým te on idjãm djà'ÿr ikôt atēm prãmje. Kam dja ga tũmrãm arým ikôt tẽ, ane.

³⁷Nhym Pedru arĩk kum,

—Bênjadjwýr djwýnh, mýkam dja ba te on adjãm djà'ÿr akôt itēm prãmje? Dja me kum abĩn prãm ne ikumrêx ibĩn kam abĩ, ane.

³⁸Nhym kum,

—Djãm me kute akumrêx abĩn ne kam ibĩnmã got? Be, dja me ijo mō, ga ôkrên'ãnh kâr kêttri amijã maje ajêxo amãnhkrut ne ikjêkêt ne ijã memã kum, “Kati. Ije me'ôwã pumũnh kêtikumrêx”, ane. Nhym arým ajã ôkrên'ãnh kâ. Mrãmri ne ba amã ja jarēnhkumrêx. Nãm ã kum ane.

Kute kôt ba djwýnhmã tỳx jadjâr.

14 ¹Ne kam ajte arkum,
—Kwãrĩk wãnh ba ar akadjy tẽ gar axwe amikam adjumar kêt. Dja gar tu amim Metĩndjwýnh markumrêx. Badjwý dja gar tu amim imarkumrêx. ²Onĩ Ibãm nhõ kikretikam me ùrkwã krãptĩ. Djã ne ren kêt ba ren arým ar amã, “Kati, kêt”, ane. Nhym be, kati. Mrãmri ne Ibãm nhõ kikretikam me ùrkwã krãptĩkumrêx. Ba arým 'ÿr itēmmã. Dja ba 'ÿr tẽn 'ÿr bôx ne arým ar akutêp ar amã anhũrkwão mex. ³Dja ba ar anhũrkwão mex kadjy tẽ:n kam akubyn ajte ar awýr bôx. Ne kam arým mã amikôt ar adjan ar ajo tẽ. Be, mýj kadjy? Bir gwaj arek baro'ã ar baba kadjy. ⁴Be, idjãm djà gar arým ama. 'ÿr ipry gar arým ama. Kwãrĩk wãnh axwe amikam adjumar kêt, ane.

Memã pry'ã ujarênh.*Kar 4.12*

⁵Nhym Tôme arým kum,

—Jãm atêmmã ja ar ije mar kêt ne ar ije apry kraxdjwý omũnh kêt.
Mýj dja bar nẽn kum ikato? ane.

⁶Nhym Jeju kum,

—Bir, ba mrãmri ije 'ýr me pry pyræk. Dja me tu amim imarkumrêx ba arým Ibãm'ýr meo bõx. Bajbit ije memã katàt ikabẽn jarênhkumrêx ne ije memã tĩn jangjênh nhym me Ibãm kôt tĩn ne ar ba rã'ã: rã'ã ne. Djãm Ibãm'ýr me o bõx kadjy me'õdjwý? Kati. Bajbit ne ba 'ýr meo bõx. ⁷Ne ga ren ar aje imarkumrêx ne ren arým Ibãmdjwý ma. Be, arým ba ar amã arê gar arým aman omũ, ane.

⁸Nhym Piripi kum,

—Bẽnjadjwýr djwýnh, ar imã Abãm jakre bar omũ. Ne kam arým ikĩnh ne, ane.

⁹Nhym Jeju kum,

—E kum Piripi, djãm gormã ne ga ikôt ar aban aje imarn ipumũnhja kêt? Be, me kute ipumũnh o ne me arým Ibãmdjwý pumũ. Mýkam ne ga imã, “Ar imã Abãm jakre bar omũ”? ane. ¹⁰Be, Ibãmmê ne bar itipdjĩn ar iba. Djãm aje amim imar kêt? Ije ar amã ikabẽn jarênhja ba ba ije arênh kêt. Djãm ba ne ba idjãpênh ar iba? Kati. Ibãm ne ar ijo ban ãpênh ar ba. ¹¹Be, Ibãmmê ne bar abenã itypdjĩn ar iba. Ja dja gar aman tu amim imarkumrêx. Nãr idjãpênhkôt imã akaton tu amim imarkumrêx.

¹²Me kute tu amim ikamnhĩxkumrêx gêdja me idjãpênh o apê. Gêdja me ãpênh o ijakre. Be, mýkam? Bir, arým Ibãm'ýr itêmkam dja me ãpênh o ijakrenh mex ne. Mrãmri ne ba ar amã ja jarênhkumrêx. ¹³Dja gar amijo Metĩndjwýnhmã a'wý. Tu amim imarkumrêx ne kum amijo a'wý ba kam ar aje kum arênh kôt ã ar amã o ane. Be, mýj kadjy? Bir, dja ba kôt memã Ibãm ra:xo amirĩt. Ja kadjy dja ba ar aje kum arênh kôt ã ar amã o ane. ¹⁴Ikukwakam dja gar kum mýjja kunĩo a'wý ba kam ar aje kum arênh kôt ã ar amã o ane.

Arkum Metĩndjwýnh Karõ'ã ujarênh.*Kar 2.2*

¹⁵Gar mrãmri amã ijabê jabej mã ikabẽn man kôt ar amijo aba. Ije amrãnh mex'ã ar amã karõ kôt dja gar amijo aba. ¹⁶Dja ba kam arým ar ajo Ibãmmã a'uw nhym arým ar amã ajo kĩnh djwýnh 'õdjwý jano. Nhym kam arým arek ar aro'ã ar ba rã'ã: rã'ã ne. ¹⁷Karõ dja ar amã ano. Karõ kute katàt memã ikabẽn jarênhkumrêx. Me kum Metĩndjwýnh kĩnh kêtjamã dja Karõ janor kêt. Be, mýkam? Bir, mebê Karõ bipdjur nhym me kute mar kêt kam dja memã anor kêt. Ar ga ne gar atemã. Arým aje mar. Karõ arek ar aro'ã ar bakam aje mar. Dja arek ar aro'ã ar ba rã'ã.

¹⁸Djãm ije ar amã inhirer gar aje me 'uwtĩ pyræk ne akaprĩn ar abamã? Kati. Ba dja ba mrãmri ar awýr ibõxkumrêx.

¹⁹Dja ijã akati ngrêre ba arÿm me kum ikĩnh kêtjabê amijo apdju. Ar gajbit dja ba ar abê amijo ibipdjur kêt. Itĩnkôt dja gar gadjwÿ atĩnkumrêx.

²⁰Kam dja gar amim, “Be, mrãmri ne Jeju Bãmmê tipdjin ar ba. Badjwÿ ne ba Jejumê itipdjin ar iba. Jejudjwÿ ne imê tipdjin ar ba.” Djã gãm ar ã amim ane. ²¹Mÿj me'ô ne mrãmri kum ijabêkumrêx? Bir, ba ne ba me kute katât amijo ba'ã memã karô. Dja me kam amim ikabên man kôt ar amijo ba. Me ja ne me mrãmri kum ijabêkumrêx. Dja me mrãmri kum ijabêkumrêx nhym Ibãmdjwÿ arÿm kum me abê. Badjwÿ dja ba imã me abên arÿm ikabêno memã amijo amirĩt nhym me arÿm mrãmri imarkumrêx, ane.

²²Nhym Djuda 'ôdjwÿ. Djãm Djuda Ikadji? Kati. Djuda 'ôdjwÿ Jejumã kum, —Be, mÿkam dja ga ar bajbit ar imã amijo amirĩt? Mÿkam dja ga me kunĩmã amijo amirĩt kêt? ane.

²³Nhym Jeju kum,

—Bir, me kum ijabê dja me ikabên man kôt ar amijo ba. Nhym kam Ibãm arÿm kum me abê bar kam arÿm me'ÿr bôx ne ar meo iba. ²⁴Nhym be, me kum ijabê kêtja dja me ikabên mar kêt ne kôt amijo ba kêt ne tu ate krãn amidjwÿnhbit ma. Be, ije ar amã ikabên jarênh gar aje marja djãm ba ikabên? Kati. Ibãm kute ijanor djwÿnh kabên ne ja.

²⁵Gwaj baro'ã ar babari ne ba ar amã ikabên ja jarê. ²⁶Dja ba mã tẽ nhym ar ajo kĩnh djwÿnh arÿm ar amã ikabên jarê. Metĩndjwÿnh Karôja tãm dja arÿm ar amã arê. Ije amrêbê ar amã ikabên jarênh ja kunĩkôt dja ar amã arê. Kàjkwakam Ibãm dja ar amã Karô jano nhym arÿm bôx ne ar amã ikabên jarê. ²⁷Itêm tekrekam dja gar ikabênkôt adjumar mex. Idjumar mex kôt adjumar mex. Djãm me kum ikĩnh kêtja kabênkôt adjumar mexmã? Kati. Tãm ne kajgo. Ba ikabên kôt dja gar adjumar mex ne mrãmri adjumar mexkumrêx. Kwãrik wãnh amikukãm axwe adjumar ne atĩn prãm kêt.

²⁸Ôbê ne ba arÿm ar amã, “Dja ba mã tẽn kam akubyn ajte ar awÿr tẽn bôx”, ane. Ga ren ar mrãmri amã ijabêkumrêx ne ren akĩnhkumrêx. Ije ar amã Ibãm'ÿr idjàbir jarênh ar aje markam ne gar ren akĩnhkumrêx. Be, mÿkam? Bir, kàjkwakam Ibãm kute raxo ijakrenhkam. ²⁹Be, jakam ba arÿm ar amã arê. Idjàbir kêttri ba ar amã arê. Dja ba wabi gar kam ikabênja man arÿm tu amim imarkumrêx.

³⁰Jakam dja ba arÿm ar amã ikabên jarênh kwÿ ngri. Be, mÿkam? Bir, arÿm Xatanaj bôx 'ÿr. Me kum ikĩnh kêtja nhô bẽnjadjwÿr iwÿr bôx 'ÿr. Djãm iwÿr bôxkam kute ijo bamã? Arkati. ³¹Dja ba Ibãm kabên kôt ar amijo iba. Ibãm kute imã 'ã karô kôt ar amijo iba nhym kam me kum ikĩnh kêtja arÿm ima. Dja me amim, “Mrãmri kum Bãm jabêkumrêx”, ane. Tãm dja me kuma. Kàjmã ar dja. Gwaj on 'ÿr. Nãm Jeju ã kôt ba djwÿnhmã ane.

Kute amikukràdjà'ã akrô jakren 'ã ujarênh.


15 ¹Ne kam apýnh akrô kukràdjà'ã ajarên arkum,
—Be ga, atemã akrô djôja pumû. Ba ne ba ije akrô bàri pyrâk.
Ibãm ne kute akrôo djuw mex djwýnh pyrâk. Ar ga ne gar aje akrô
bàrikam apýnh pa pyrâk.

²Ga, akrôo djuw mex djwýnh kute akrô pa kajgo rênha pumû. Pakam ô kêt kam
ne kurê. Ibãmdjwý kum me kute imar kajgo kînh kêt ne wãnh me kanga. Mýkam?
Bir, me kute imar kajgo ne ukaprí kêt ne axwe ar ba. Kute mrãmri ne akrô pakam
ô kêt pyrâk. Kam ne wãnh me kanga. Ga, akrô pa kwýkam ôja pumû. Nhym o
djuw mex djwýnh kute 'ã ingrà kajgodjwý rênh. Akrô pakam ôbit krãpti kadjy ne
kurê. Ibãmdjwý kum me kute tu amim imarkumrêxa kînh. Ne kam arým mebê
mýjja kajgo kuní kurê. Mýj kadjy? Bir, dja me amim imar 'ãno djan mýjja kajgo
mar kêt. Ne kam arým ukaprí:n katàt ar amijo ba. Ne kam mexkumrêx kute akrô
pakam ô kumexkam mexkumrêx pyrâk. Ja kadjy ne mebê mýjja kajgo kuní kurê.

³Be, ar aje akrô bàrikam apýnh pa pyrâk. Arým ar amex. Ije ar amã
ikabên jarênhkôt arým ar amex. ⁴Dja gar arek ijamýnh týxkumrêx ne tu
amim imar týxkumrêx ne ijã adjukanga kêt kumrêx. Badjwý dja ba arek
ar ajamýnh týxkumrêx. Djãm akrô pa arek akrô bàri 'amýnh kêt kam ô
got? Arkati. Ar gadjwý dja gar ijamýnh kêt ne ijã adjukanga djãm kam
amex? Kati. Te amex prãmje kute akrô pakam ô kêt kam mex kêt pyrâk.

⁵Ba ije akrô bàri pyrâk. Ar ga ne gar aje bàrikam apýnh pa pyrâk.
Dja gar arek ijamýnh týx ne tu amim imar týxkumrêx ne ijã adjukanga
kêt kumrêx. Ba badjwý dja ba arek ar ajamýnh týx. Kam dja gar katàt
ar amijo aban adjukaprin amexkumrêx kute akrô pakam ô mexkumrêx
ne kumexja pyrâk. Djãm aje amim imar kêt kam amex prãm got? Dja ga
ijã adjukangan arým te amex prãmje. ⁶Dja me amim imar rerekren ijã
ukanga nhym Metindjwýnh arým wãnh me kanga. Ga, akrô pa ate bàri'ã
arij nhym o djuw mex djwýnh kute rênh ne wãnh rênh nhym arým ngràja
pumû. Nhym kam me kute o atom ne kuwykam rênh nhym xêtja pumû.

⁷Gêdja gar arek ijamýnh
týx ne tu amim imarkumrêx
ne ijã adjukanga kêt ne tu
amim ikabên mar týxkumrêx
nhym kam Ibãm arým
akabênkôt ã amã o ane.
Dja gar amã mýjja kînh ne
kum o a'uw nhym arým
akabênkôt ã amã o ane. ⁸Dja
gar amexkumrêx ne katàt ar
amijo aban adjukaprí kute
akrô pakam ô mexkumrêx ne



(Djuão rax 15.1-10)

kumexja pyræk. Nhym me amex ja pumũn arým Ibãm raxmã kato. Dja gar ã amijo anen arým abê ikôt aba djwýnhkumrêx.

⁹Imã ar ajabê kute mrãmri ne Ibãm kum ijabê pyræk. Dja gar tu imã ar ajabêja markumrêx ne ar amã ijabê'ã adjukanga kêt. ¹⁰Gêdja gar mã ikabênja man kôt ar amijo aba. Ije ar amã katàt aje amijo aba'ã karôkam ikabênja man kôt ar amijo aba. Ne kam arým ar amã ijabê'ã adjukanga kêt. Ga, ije Ibãm kabên kôt amijo ibaja pumũ. Ba kam imã Ibãm jabê'ã idjukanga kêt.

¹¹Be, mỳj kadjy ne ba ar amã ikabên ja jarê? Bir, dja gar ikabên man arým ikĩnh akĩnh. Akĩnh ne akĩnh rã'ãn akĩhtire. ¹²Be, ar amã aben jabêmã ne ba abenã ar amã karô. Amã aben jabê kute mrãmri ne imã ar ajabê pyræk. ¹³Djãm ije inhôbikwa kadjy itykkam imã inhôbikwa jabê ngri got? Imã abêo katàt me kunĩ jakre. ¹⁴Dja ba ar amã katàt aje amijo aba'ã karô gar ikabên man kunĩkôt ar amijo aba ba arým ar ajo inhôbikwakumrêx.

¹⁵Djãm jakam ije ar amã, “Inhô àpênh”, anhỹrmã? Kati. Ne ga ren ar abê inhô àpênhbit ba ren ar amã adjàpênh djàbit jarê gar ren jabit man ren kam aje ikabên kunĩ mar kêt. Nhym be, kati. Ibãm kute imã kabên jarênh ja ba arým ar amã kunĩ jarê. Ije ar amã Ibãm kabên kunĩ jarênhkam arým ije jakam ar amã, “Inhôbikwa”, anhỹrmã.

¹⁶Djãm ar ga ne gar amijo ipytã? Kati. Ba ne ba amijo ar apytàn arým ar adjàpênh djà'ã ar amã karô. Be, mỳj kadjy? Bir, dja gar katàt ar amijo aban adjukaprikumrêx ne memã ijã adjujarênh mō. Ne kam arým Metĩndjwýnhmã amexkumrêx rã'ã. Kum amexkumrêx rã'ã ne arým aje mrãmri ne akrô pakam ô mexkumrêx ne kumexja pyræk. Ja kadjy ne ba adjàpênh djà'ã ar amã karô. Mỳj kadjy dja gar ã amexo ane? Bir, dja gar ikukwakam mỳjja'ã Ibãmmã a'uw nhym arým ã ar amã o ane. Ar aje kum arênh kôt ã ar amã o ane. Ja kadjy dja gar ã kum amexo ane. ¹⁷Ar amã aben jabêmã ne ba abenã ar amã karô.

Me kum Metĩndjwýnh kĩnh kêtja'ã ujarênh.

Mat 10.16,22; Dju r 7.7; Pir 1.29; A Xim 3.12; Dju k 3.13

¹⁸Be, dja me kum Metĩndjwýnh kĩnh kêtja kum ar akurê jabej. Ikumrêx ne me ã kum ikurêo ane. Ja dja gar ama. ¹⁹Ne ga ren ar me kum ikĩnh kêtja jaxwe kôt ajaxwe nhym ren me kum ar ajabê ne. Nhym be, kati. Me axwe kôt ajaxwe kêt. Ba ne ba amijo ar apytàn mebê amikôt ar apumjuw. Kam ne me kum ikĩnh kêtja kum ar akurê.

²⁰Ba arým ar amã, “Ar abê inhô àpênhkam djãm aje araxo ijakrenh got”? ane. Djãm ar aje araxo ijakrenh got gar amim, “Kati. Dja me ijo bikênh kêt”, anhỹro aba? Kati. Ikôt dja me ar ajo bikênhkumrêx. Nhym be, me kwý kute amim ikabên mar kôt dja me amim ar akabëndjwý ma. ²¹Be, mỳkam dja me ar ajo ajkê? Bir, ikôt ar abakam. Me kute ijanor djwýnh mar kêtka dja me ar ajo ajkê. ²²Ne ba ren me'yr ibôx kêt ne ren memã ikabên jarênh kêt nhym Metĩndjwýnh ren memã axwe jarênh kêt. Nhym be, kati. Arým ne ba me'yr bôx ne memã ikabên

jarẽ nhym me kute amim imar kêt. Kam dja mrãmri memã axwe jarẽnhkumrẽx. Jakam dja me te Metĩndjwýnhmã kum, “Kati. Ijaxwe kêt”, anhỹrmã.

²³Be, me kum ikurêja kum Ibãmdjwý kurê. ²⁴Ne ba ren ije me nokrekam mýjja pumũnh kêt kwý nhípêx kêt nhym ren me omũnh kêt nhym Metĩndjwýnh ren memã axwe jarẽnh kêt. Nhym be, kati. Arým me kute omũnhkam ne me kum ikurên kum Ibãmdjwý kurê.

²⁵Me kum ikurêja'ã ne me bakukãmãre amrêbê: pi'òk no'òk ne. Ba ne ba kam amikukãm memã kum,

“Ajmã ije meo kêtka me me kum ikurê.”

Nã bãm ã memã ane nhym me arým kukràdjàkam 'ã pi'òk no'òk ne. Nhym kam me aben djò'ã arênho mō:n arênho mōr tãmtã arým iwýr o bõx. Tũ:mrãm iwýr o bõx. Nhym me kamingrãnyre arým kum ikurê. Ajmã ije meo kêtka me kum ikurê.

²⁶Be, dja ba Ibãm 'ýr wabin 'ýr bõx ne arým ar amã ar ajo kĩnh djwýnh jano, ar amã Metĩndjwýnh Karõ jano. Ta dja katàt memã kabên jarẽnhkumrẽx. Ibãm kurúm dja tẽ. Dja ba ar amã ano nhym bõx. Ne kam kute ipumũnh kôt arým ar amã ijã ajarê. ²⁷Ar gadjwý gêdja gar ijã memã adjujarênh aba. Idjãpênh kraxkôt iro'ã ar abakam aje ipumũnh kôt memã ijã adjujarênh aba.

16 ¹Ar aje ibê amijo akêx kêt kadjy ne ba ar amã ikabên jarê. ²Me bikprõnh djàkam dja me ar akangan me nêje bõm ar amê. Ne arik ar ajã amim, “Dja ba ar kupa nhym kôt Metĩndjwýnh arým kum ikĩnhkumrẽx”, anen arým ar abĩ. ³Me kute Ibãmmê ar imar kêtka me ã ar ajo ane.

⁴Djãm amrêbê ne ba ar amã ikabên ja jarênh tẽ? Kati. Gwaj baro'ã ar babari ne ije ar amã arênh kêt. Ajbir ne ba ar abê idjãbir kutã ar amã arê. Dja ba wabi nhym me arým ar ajo bikênho ba. Kam dja gar akubyn ije ar amã ikabên jarênh ja'ýr amijo bõx ne arým aman amim, “Be, mrãmri kute imã arênh kôt ne me arým jakam ã ijo bikênho bao ane”, ane.

Metĩndjwýnh Karõ kute õ me jao bamã.

⁵Jakam ba arým kute ijanor djwýnh'ýr idjãbirmã. Kam ne gar aje imã, “Jãm dja ga tẽ”? anhỹr kêt. ⁶Be, mýkam? Bir, ba ije ar amã idjãbir jarênh gar akaprĩ raxkam ne gar aje ikukjêr kêt. ⁷Kwãrik wãnh ar akaprĩ kêt. Dja ba wabin arým ar amã ajo kĩnh djwýnh 'òdjwý jano. Metĩndjwýnh Karõ jano nhym ar awýr bõx gar adjumar mexkumrẽx. Ba ren idjãbir kêt nhym ren Karõ ar awýr bõx kêt. Nhym be, kati. Dja ba idjãbirkumrẽx ne ar awýr anorkumrẽx. Mrãmri ne ba ar amã ja jarẽnhkumrẽx.

⁸⁻¹¹Mrãmri dja Metĩndjwýnh Karõ pykakam bõxkumrẽx. Ne kam ta arým mã pykakam me axwemã kum, “Mrãmri ajaxwekumrẽx”, anhỹro ba. Nhym kam me arým kôt amijaxwe maro ba. Be, mýkam? Bir, me kute amim imar kêtka me me axwe. Dja Metĩndjwýnh Karõ ta arým mã memã kum, “Jeju katàt kute amijo bakumrẽx”, anhỹro ba. Nhym kam me arým kôt ikatàtkumrẽx maro ba.

Be, mỳkam? Bir, Ibām'ỳr idjābir gar aje ipumũnh kêt kam dja me mrāmri ikatāt kumrêx maro ba. Dja Metĩndjwỹnh Karō ta arỹm mã memã kum, “Dja ga ajaxwe pānh atokry”, ane. Nhym kam me arỹm kôt amimaro ba. Be, mỳkam? Bir, dja me kum ikĩnh kêtja nhō bēnjadjwỹrbē Xatanaj tokry. Axwe pānh tokry. Dja me ja man arỹm amimaro ba, amijaxwekam pānh tokry mã maro ba.

¹²Be, ba te ije ar amã ikukrādjà kumex jarēnh prāmje. Ar aje ikukrādjà kumex mar kadjy ne gar ajamak mex kêt rā'ā. ¹³Kwārĩk wānh rā'ā. Dja ĩ Metĩndjwỹnh Karō bōx. Kute memã katāt kabēn jarēnhkumrêxja bōx. Ne kam arỹm ar ajo ba gar ikabēn katāt kunĩ ma. Djām ta ne kute amikabēn jarēnhmã? Kati. Ba dja ba kum arē nhym arỹm ar amã kute ikabēn marja jarē gar arỹm ama. Dja ar akukām apỹnh mỳjja apōx djwỹnh rām ar amã arē gar arỹm ama. ¹⁴Ba dja ba kum ikabēn jarē nhym kuman arỹm ar amã arē. Kute ar amã ikabēn jarēnhkam dja ijo rax gar arỹm ira:xmã akaton ama. ¹⁵Be, ba Ibām kabēn o ikabēnkam ne ba ar amã, “Ba dja ba Karōmã ikabēn jarē nhym kuman arỹm ar amã arē”, ane.

¹⁶Arỹm itēm 'ỳr. Dja ba tē gar arỹm ipumũnh kêt. Nhym kam ijā akati ngrēre gar ajte ipumũ. Ibām'ỳr idjābir 'ỳr. Kam dja gar ajte ipumũ. Nām ā Jeju kôt ba djwỹnhmã ane.

Ar'ỳr ar kĩnh djā bōx kadjy kute arkum arēnh.

¹⁷Nhym kôt ba djwỹnh kwỹ ar abenmã kum,

—Nām gwaj bamã, “Arỹm itēm 'ỳr. Dja ba tē gar arỹm ipumũnh kêt. Nhym kam ijā akati ngrēre gar arỹm ajte ipumũ”, ane. Ne, “Ibām'ỳr idjābir 'ỳr. Kam dja gar ajte ipumũ”, ane. Be, mỳj'ā ne gwaj bamã ja jarē? ane. ¹⁸Ne kam,

—Kute gwaj bamã, “Akati ngrēre”, anhỹrkam mỳj'ā ne kute gwaj bamã ja jarē? Gwaj te baje mar prāmje, ane.

¹⁹Be, ar kute kukjēr prām kôt ne Jeju arỹm ar kuma. Ne kam arkum,

—Djā ne gar bit aje ikukjērmã? Ije ar amã, “Arỹm itēm 'ỳr. Dja ba tē gar arỹm ipumũnh kêt. Kam dja ijā akati ngrēre gar arỹm ajte ipumũ”, anhỹr. Ije ar amã anhỹrkam djā ne gar aje bit abej ikukjērmã?

²⁰Ba ar amã arē gar ama. Dja gar muw ne akaprĩ rax. Nhym be, me kum ikĩnh kêtja dja me kĩnh. Dja gar akaprĩ tēn kam ĩ arỹm akĩnhkumrêx. Mrāmri ne ba ar amã ja jarēnhkumrêx.

²¹Be, me nire kra àkam kaprĩre. Me kra bixadjwỹr 'ỳr nhym me kaprĩre. Ne kam me kra bixadjwỹrkam arỹm kaprĩo aknon mar kêt ne. Me kĩnhkam ne me arỹm kaprĩo akno. ²²Dja gar ā akaprĩn ajte akĩho ane. Jakam gar akaprĩ. Kwārĩk wānh rā'ā. Dja gwaj ajte aben pumũ gar akĩnhkumrêx. Nhym kam me arỹm te kute ar amã akaprĩ jadjār prāmje.

²³Gwaj baje ajte aben pumũnhkam dja gar imã adjā'wỹr prām kêt. Ne kam ikukwakam Ibām tamã mỳjjao a'uw nhym arỹm ā ar amã o ane. Mỳjja kunĩo ikukwakam kum adjā'wỹrja dja ā ar amã o ane. Mrāmri ne ba ar amã ja jarēnhkumrêx. ²⁴Kraxje ar aje ikukwakam Ibāmmã adjā'wỹr kêt rā'ā. Ikukwakam kum a'wỹ nhym arỹm ā ar amã o ane. Ar akĩhtire kadjy dja ā ar amã o ane.

²⁵Be, Ibām kukràdjà'ā ne ba pykakam apŷnh mỳjja jakren ar amā arẽ nhym kukràdjà kwỳ ar abê bipdjur. Adjỹm, dja ba ĩ ar amā ā arẽho anhỹr kêt. Dja ba ar amā Ibām kukràdjà jarẽ nhym ar amā amirĩtkumrẽx ne ar abê bipdjur kêt. ²⁶Amrẽ akati mōrjakam ije ar ajo Ibāmmā idjà'wỳr prām kêt. Ar ga dja gar ikukwakam kum a'uw nhym arỳm ar ama.

²⁷Be, mỳkam? Bir, ta kum ar ajabêkam. Ar amā ĩjabêkam ne ta kum ar ajabê. Ije ar amā, “Ta ne ĩjano ba tẽ”, anhỹr gar aje tu amim ikabẽn markumrẽxkam ne ta kum ar ajabê. Dja gar kum a'uw nhym ta arỳm ar ama. ²⁸Ibām kurũm ne ba amrẽ tẽn pykamā bõx. Dja ba jakam pyka kurũm Ibām'ỳr tẽn arỳm 'ỳr bõx, ane.

²⁹Nhym kôt ba djwỳnh kum,

—Be, jakam ne ga arỳm imā akabẽn jarẽho amirĩtkumrẽx. Aje akukràdjà'ā pykakam mỳjja'ā adjujarẽnhja jakre kêt. Ga tu akukràdjà jarẽho amirĩtkumrẽx. ³⁰Jakam bar arỳm amim ama. Mrāmri ne aje mỳjja kunĩ markumrẽx. Jakam ar ije ajte akabẽn jabej akukjêr prām kêtumrẽx. Be, mrāmri ne ga kàjkwakam Metĩndjwỳnh kurũm tẽn abõxkumrẽx, ane.

³¹Nhym Jeju arkum,

—Djām jakam ne gar mrāmri tu amim imar tỳxkumrẽx? Kati.

³²Adjỹm, dja gar amidjwỳnhbit man ĩ ibê ajmā. Me umaje ibê ajmā ba arỳm ate dja. Be, djām mrāmri ba ate idjāmmā? Kati. Ibām kute imẽ amijo kajkepkam dja ba ate idjām kêt.

³³Be, mỳj kadjy ne ba ā ar amā ane? Bir, dja gar ĩ ije ar amā ikabẽn jarẽnhja man arỳm tu amim markumrẽx. Ne kam arỳm ikanàrràm adjumar mex ne ar aba. Be, me kum ikĩnh kêtja kôt dja gar arek ar aba nhym me ar ajo bikẽnho ba. Kwārĩk wānh kam ar akaprĩ kêt. Ba ne ba itỳxo ije me kum ikĩnh kêtja jakrenh mex ne. Nām ā Jeju kôt ba djwỳnhmā ane.

Jeju Metĩndjwỳnhmā amijo à'wỳr.

17 ¹Nām arkum anen kam kàjmā òkren kàjkwa jabẽn Bāmmā kum, —Djünwā, arỳm itokry'ā myt bõx. Dja ga memā iraxo amirĩt gẽ me iraxmā kato. Dja me iraxmā kato ba arỳm memā araxo amirĩt nhym me gadjwỳ araxmā kato. ²Be, mỳjkôt dja me gu baraxmā kato. Bir, aje me kadjy ĩjā Běnjadjwỳr djwỳnh mēnhkôt. Apŷnh pyka djàri kunĩkôt dja ba me kunĩmā nhỹ. Ne kam arỳm me kwỳmā tĩn jadjà. Aje mā ikôt me kamēnhja kunĩmā tĩn jadjà nhym me arỳm gu bakôt tĩn ne ar ba rā'ā: rā'ā ne. Ja kadjy ne ga ĩjā Běnjadjwỳr djwỳnh mẽ. Kôt dja me kum gu bakĩnhkumrẽx.

³Be, mỳj ne me kute marmān arỳm gu bakôt tĩn ne ar ba rā'ā: rā'ā ne? Bir, dja me amim, “Kàjkwakam Metĩndjwỳnh pydji. Mrāmri ne kubê Metĩndjwỳnhkumrẽx. Mrāmri ne kute pykamā Jeju janorkumrẽx”, anhỹro ba. Ja ne me kute marmā. Me kute mar ne tu amim gu bamarkumrẽxmā. Dja me tu amim gu bamarkumrẽx ne arỳm gu bakôt tĩn ne ar ba rā'ā: rā'ā ne.

⁴Pykakam ar ibari ba arỳm memā araxo amirĩt nhym me kwỳ arỳm kum akĩnhkumrẽx. Aje adjàpēnh djà'ā imā karō kôt ba apēn arỳm 'ā

aminhinomã amimẽ. ⁵Jakam badjwỳ dja ga memã iraxo amirĩt gê me ira:xmã kato. Adjàkam mỳjja kunĩ kator kêttri gu ar baba. Kam gu bara:x. Amrêbê: gu baraxja kôt dja ga jakam ijo rax.

Kute Bämmã kôt ba djwỳnho à'wỳr.

⁶Ga ne ga arỳm mebê anhô me kwỳo akêx. Me kum akĩnh kêtja bê anhô me kwỳo akêx ne mã ikôt me kamẽ. Ba kam arỳm memã ajo amirĩtkumrêx ne. Nhyam kam me arỳm akabên man kôt ar amijo ba. ⁷Arỳm me kute imarn arỳm ijã amim, “Jeju ne Metĩndjwỳnh kukwakambit àpênh ne kabên jarênho ba”, anhỹro ba. Ja ne me kute mar. ⁸Aje akabên'ã imã karô kôt ba memã arê nhyam me arỳm tu amim markumrêx ne mã kôt ar amijo ba. Ne mã ijã amim, “Mrãmri kàjkwakam Metĩndjwỳnh kurũm ne tẽn bôx. Mrãmri ta ne kute anorkumrêx nhyam arỳm tẽn bôx”, ane.

⁹Djãm pykakam me kum akĩnh kêtjao ne ba amã a'uw? Kati. Aje ikôt me kamênhjao ne ba amã a'uw. ¹⁰Ga ne ga arỳm inhô me kunĩo anhô. Badjwỳ ne ba arỳm anhô me kunĩo inhô. Gu baro'ã arỳm meo banhô. Nhyam me arỳm memã iraxo amirĩt. ¹¹Djũnwã, amexti:ren akatàtkumrêx. Jakam dja ba arỳm awỳr tẽn arỳm pykakam me kum akĩnh kêtjamẽ ro'ã ar iba kêt. Nhyam be, gu banhô me ne me pykakam me kum akĩnh kêtjamẽ ro'ã ar ba rã'ã.

Djũnwã, prĩne amexkam dja ga amim gu banhô me utàn meo aba. Ga ne ga ikôt me kamẽ. Me kum aben jabên axikôt kabên kadjy dja ga me utàn meo aba. Gu bamã aben jabên baje axikôt bakabên pyræk gê me ã kum aben jabên ã axikôt kabêno ane. ¹²Pykakam me kum akĩnh kêtjamẽ ro'ã ar ibari ne ba akukwakam me utàn ar meo iba. Aje ikôt me kamênhja ne ba me utàn ar meo iba nhyam 'õ biknor kêtumrêx. Ikôt ba djwỳnhbê Djuda pydji ne axwekumrêx. Pydjibit dja arỳm akuno. Amrêbê me ikukãmãre kute 'ã pi'ók no'ók kôt dja akuno.

¹³Be, jakam ne ba arỳm awỳr idjãbir 'ỳr. Pykakam ar ibari ba amã ikabên ja jarê. Me kute amã ikabênja mar kadjy ba amã arê. Dja me kuman arỳm mrãmri ikĩnh kĩnhkumrêx. ¹⁴Arỳm me kum akĩnh kêtja kum gu banhô me kurê. Be, mỳkam? Bir, nã bãm memã akabên jarê nhyam me arỳm tu amim markumrêx. Ne kam arỳm ate mebê amijo ba. Me kum akĩnh kêtjabê amijo ba. Ije ate mebê amijo iba kôt ne me ate mebê amijo ba. Kam ne me kum akĩnh kêtja kum gu banhô me kurê.

¹⁵Djãm ije amã, “Me kum akĩnh kêtja bê dja ga amim gu banhô meo wabi”, anhỹrmã? Kati. Dja me arek me ro'ã ar ba. Dja ga mã me utàn ar meo aba gê gu banhô me ja me axwe kôt axwe kêt. ¹⁶Me arỳm mebê amijo ba. Me kum akĩnh kêtja bê amijo ba. Ate ije mebê amijo iba kôt ne me ate mebê amijo ba.

¹⁷Mrãmri akabên katàtkumrêx. Aje memã akabên katat jarênhkôt dja ga amimexo meo mex gê me katat ar amijo ba. ¹⁸Ga ne ga arỳm idjãpênh djã'ã imã karôn arỳm pykakam me kum akĩnh kêtja'ỳr ijano ba tẽ. Badjwỳ ne ba akudjwa arỳm me àpênh djã'ã gu banhô me jamã karôn arỳm me kum akĩnh kêtja'ỳr me

ano. ¹⁹Imã me abêkam ne ba itykmã. Dja ba akabênkôt me kadjy ty nhym me arým amexo mex. Dja me tu amim ikabên katât markumrêx ne arým amexo mex.

Kute Bämmã me kute mar kunĩ ò'wỳr.

²⁰Djãm me jabit ne ba amã meo a'uw? Kati. Dja me ĩ amũ memã ikabên jarê nhym me kwỳ ikabên man tu amim imarkumrêx. Amũ me jaodjwỳ ba amã a'uw.

²¹Be, mỳj kadjy ne ba amã meo a'uw? Bir, dja ga ikabên man arým memã amak bô nhym me arým akabênkôt kum aben jabên axikôt kabên. Dja me axikôt kabên kute gu bamã aben jabên axikôt bakabên pyræk. Be, mỳj kadjy dja me kum aben jabên axikôt kabên? Bir, gêdja amũ me kum akĩnh kêtja me omũn arým kum gu bakĩnh ne arým tu amim imarkumrêx. Ne kam ijã amim, “Be, mrãmri ne Metĩndjwỳnh Jeju jano nhym arým pykakam bôx ne ar ba”, ane. Ja kadjy dja me kum aben jabê.

²²Ga ne ga ijo rax ba arým gu banhô meo rax. Nã bãm memã gu bakukràdjã jarê nhym me arým tu amim markumrêx ar o ba. Ar o ba:n arým rax ne. Be, mỳj kadjy ne ba meo rax? Bir, dja me kum aben jabên axikôt kabên kute gu bamã aben jabên axikôt bakabên pyræk. Ja kadjy ne ba meo rax. ²³Bamê gu banhô me jamê ne me itipdjĩn ar iba. Gu badjwỳ batipdjĩn ar baba. Gora gê me prĩne kum aben jabên axikôt kabên. Nhym kam me kum akĩnh kêtja me omũn arým amim, “Mrãmri ne Metĩndjwỳnh Jeju jano nhym arým pykakam bôx ne ar ba. Ga, Metĩndjwỳnh kum me abêja pumũ. Kum me abê kute kum Jeju jabê pyræk”, ane. Dja me kum akĩnh kêtja me omũn ã amim ane.

²⁴Djũnwã, mỳjja kunĩ kator kêtĩrĩ ne ga amã ĩjabê. Kam dja ba wabi ga arým ijo ra:x ne. Aje mã ikôt me kamênhdjwỳ dja ga o wabi gê me iro'ã ar ba. Dja me iro'ã ar ba:n irax pumũnh ar o ba. Ja ne ba imã kĩnh.

²⁵Djũnwã, ga ne ga akatât ne ajaxwe kêtikumrêx nhym me kum akĩnh kêtja kute amar kêt. Bajbit ije amar nhym me jadjwỳ arým kute amim, “Mrãmri ne Metĩndjwỳnh Jeju jano nhym arým pykakam bôx ne ar ba”, anhyro ba. Tãm ne me kute amim tu markumrêx. ²⁶Ba kam arým memã ajã ajarê. Dja ba memã ajã idjujarênh rã'ã ne. Be, mỳj kadjy dja ba memã ajã idjujarênh rã'ã? Bir, amã me abê kute amã ĩjabê pyræk. Amã me abêja'ã dja ba memã idjujarênh rã'ã nhym me arým mar rã'ãn kam arým kum ajabê. Ba kam arým meo iba. Ja kadjy dja ba memã ajã idjujarênh rã'ã. Nãm ã Jeju Bämmã kabêno ane.

Me kute Jeju pa 'amỳnh ne o mõi.

Mat 26.47; Mak 14.43; Ruk 22.47

18 ¹Jeju Bämmã kabên pan kam arým kôt ba djwỳnhmẽ ro'ã katon mõi. Mõi:n kam arým pakretibê Kedô'ỳr bôx ne 'ã rê. Ne kam mõi pidjôkô'ỳr bôx ne arým 'ỳr wadjàn kam nhỹ.

²Nhym onĩj Djuda dja. Kute Jeju kurê djwỳnhmã kangaja dja. Djuda ne arým kute ar ỳr djã pumũnh. Amrêbê ne Jejumẽ kôt ba djwỳnh ar

pidjôkô'ÿr mrânho ku'ê nhym kam Djuda arÿm kute ar ÿr djà pumũnh.

³Kam ne arÿm me rũnh'ÿr bôx ne memã arê. Nhym me arÿm aminhõ krâkamngônhmẽ aminhõ àpênhmã kum,

—Me Djudakôt môn Jeju pa 'amÿn amrê o môn o bôx. Nãm ã me kadjy Metĩndjwÿnh mar djwÿnh nhõ bẽnjadjwÿrmẽ mebê pardjêumẽ memã ane. Nhym Djuda arÿm kute omũnhkôt katàt Jeju'ÿr meo mō. Nãm me Jeju kadjy ngônhpôkmẽ kuwymẽ àbêr djãmêo mō. Me 'ÿr o mō:n arÿm pidjôkô'ÿr o bôx.

⁴Nhym Jeju ta kàjmã djan me'ÿr kato. Ta ne kute amikukãm mÿjja kunĩ markam amikukãm me krâkamngôn ma. Ta me'ÿr katon memã kum,

—Mÿj me'ô jabej ne ga me mō? ane.

⁵Nhym kam me kum,

—Be, Nadjarekam Jeju jabej ne ba me mō, ane.

Nhym Jeju memã kum, “E kum, ba”, ane. Be, Djuda ne krâkamngônhmẽ ro'ã dja. ⁶Nãm Jeju, “E kum, ba”, ane. Nhym me tu umaje ajkran akubyn ajkamên arÿm tÿm ne nō.

⁷Nhym kam ajte me kukij ne memã kum,

—Mÿj me'ô jabej ne ga me mō? ane.

Nhym me kum,

—Be, Nadjarekam Jeju jabej ne ba me mō, ane.

⁸Nhym memã kum,

—E kum, arÿm ne ba me amã, “Ba”, ane. Kwārĩk wãnh ga me bajbit ijabej gê ar ja mã tẽ, ane. Be, mÿkam ne Jeju ã krâkamngônhmã ane?

⁹Bir, kute ajbir Bãmmã kabẽnkam ar'ã ujarênh kôt. Kute kum,

—Aje ikôt me kamênha ne ba ije 'ôo ibiknor kêt, anhÿr kôtô. Kôt ne Jeju jakam ar nêje me krâkamngônhmã kabên ne arÿm o mebê ar utà.

¹⁰Nhym kam Ximão Pedru, Jejukôt ba djwÿnhja arÿm ô kàxdjwa kajgo. Ne kam arÿm kaban o akabên arÿm o bẽnjadjwÿr nhõ àpênh jamak ta. Me kadjy Metĩndjwÿnh mar djwÿnh nhõ bẽnjadjwÿr rax nhõ àpênhja jamak ta. Bẽnjadjwÿr rax nhõ àpênh nhidjibê ne Maku.

¹¹Nãm bẽnjadjwÿr rax nhõ àpênh jamak ta nhym Jeju arÿm Pedrumã kum,

—Kwārĩk wãnh. Akubyn àkam anhõ kàx jadjà. Djãm itokry kêt mã ne ga inêje me tak ne? Ibãm kute itokry'ã imã karõ kôt dja ba itokry, ane.

¹²Nhym kam me arÿm Jeju pa 'amÿn uwpre. Me krâkamngônhmẽ me ò bẽnjadjwÿr ar pa 'amÿ. Mebê idjaer rũnh nhõ àpênhdjwÿ pa 'amÿ.

Me kute bẽnjadjwÿr Ananh'ÿr o bôx.

¹³Nãm me uwpre kam arÿm bẽnjadjwÿr rax Ananh kumrêx'ÿr o mō. Bẽnjadjwÿr rax Kajbaj ne Ananho umrengêt. Kajbaj ne amex tãm kam kubê me kadjy Metĩndjwÿnh mar djwÿnh nhõ bẽnjadjwÿr rax. ¹⁴Amrêbê ne Jeju'ã memã kabên jarên memã kum,

—Me'õ pydji dja me babê idjaer kunĩ pãnh ty. Kam dja gu me arỳm badjumar mex, ane. Be, me krākamngõnh bẽnjadjwỳr rax Ananh kumrẽx'ỳr Jejuo mỗ. O mỗn arỳm ỗ kikreti'ỳr o wadjà.

Pedru kute aminêje memã 'êx.

Mat 26.69; Mak 14.66; Ruk 22.55

¹⁵Nhym Ximão Pedru kôt tẽ. Jejukôt ba djwỳnh 'òdjwỳmẽ ro'ã ne ar Jeju kôt tẽ. Kôt tẽ:n arỳm kre tă dja. Nhym Pedru nhikjêja memã kum,

—Ba wadjà. Bẽnjadjwỳr kute ipumũnh tũmũ, ane. Ne kam arỳm Jeju kôt wadjà. Bẽnjadjwỳr nhõ kikreti nhipôkri ne kênh ngrire. Kam ne wadjàn dja. ¹⁶Nhym Pedru bôm kre tă arek dja. Nhym Pedru nhikjêja akubyn 'ỳr akẽx ne. Ne kam bẽnjadjwỳr nhõ àpênh nire kre tă ku'ê djwỳnhjamã Pedru jarẽ. Ne kam amikôt Pedruo wadjà.

¹⁷Nhym kam bẽnjadjwỳr nhõ àpênh nija tẽn Pedrumã kabên ne kum, —Djãm ga ne ga abê Jejukôt aba djwỳnh 'ỏ? ane.

Nhym kum, “Kati”, ane.

¹⁸Nhym wãnh me ànhũnho kumex. Bẽnjadjwỳr nhõ àpênhmẽ ỗ me krākamngõnh ànhũnho kumex. Me arek kryje pĩ prào amim kuton ànhũnho kumex. Nhym Pedru me'ỳr tẽn mekôt ànhũnho dja.

Bẽnjadjwỳr rax kute axwe'ỏ jabej kukjêr.

Mat 26.59; Mak 14.55; Ruk 22.66

¹⁹Nhym kam me arỳm bẽnjadjwỳr rax'ỳr Jejuo bỗx. Me kadjy Metĩndjwỳnh mar djwỳnh nhõ bẽnjadjwỳr rax'ỳr ne o bỗx nhym arỳm kabem dja. Nhym kam arỳm kukij ne kum,

—Imã akôt me ba djwỳnh'a ajarẽ. Mỳj akukràdjà ne ga memã arênho aba? ane.

²⁰Nhym kum,

—Djãm me kàxã ne ba memã ikukràdjà jarẽ? Kati. Arỳm ne ba me kunĩmã ikukràdjà jarênho amirĩt ne. Ne apỳnh me bikprõnh djãmẽ Metĩndjwỳnh nhõ kikretikam arẽ. Kikretikam ne mebê idjaer kunĩ bikprõnh djà. Ba arỳm kunikôt memã ikukràdjà jarênho amirĩt ne. ²¹Mỳj kadjy ne ga ba ikukij? Me wã dja ga me kukja nhym me arỳm kute ikabên mar kôt arỳm amã arẽ, ane.

²²Jeju bẽnjadjwỳrmã ane nhym krākamngõnh'ỏ, kuri âmja ikra poo Jeju kurwan kum,

—Djãm me ã bẽnjadjwỳr raxmã kabên kute anhỳr? Me kadjy Metĩndjwỳnh mar djwỳnh nhõ bẽnjadjwỳr raxmã ne ga akabên ne, ane.

²³Nhym Jeju kum,

—Ikabên punu kêt ne ga ikurwa. Ne ba ren ikabên punu ga ren aje mỳj ikabên punu'ỏ markôt ren memã ijarênho amirĩt ne kôt ren arỳm ikurwa. Nhym be, kati. Ikabên katàt ne ba arẽ ga ikurwa, ane. ²⁴Nãm ane nhym Ananh amũ Metĩndjwỳnh mar djwỳnh nhõ bẽnjadjwỳr raxbê Kajbajja'ỳr Jeju jano. Uwpre rã'ã ne ano. Nhym me arỳm Kajbaj'ỳr o mỗn o bỗx.

Pedru ajte aminêje 'êx ne ajte aminêje 'êx.

Mat 26.71; Mak 14.69; Ruk 22.58

²⁵Nhym Ximão Pedru wãnh me krâkamngônh kôt ànhũnho dja.

Ànhũnho dja: nhym me arỳm kukij ne kum,

—Djãm gadjwỳ abê Jeju kôt ba djwỳnh'ô? ane.

Nhym memã kum, “Kati”, ane.

²⁶Nhym kam bēnjadjwỳr nhô àpēnh'ô ajte kum kabēn ne kum,

—E kum, amũ pidjôkôkam Jejukôt me'ôja anokre o nokre ba arỳm omũ. Djãm ga? ane. Pedru kute me'ôbê ôbikwa jamak 'yrja ã Pedrumã ane. Nãm, “Djãm ga”? ane. ²⁷Nhym Pedru ajte kum, “Kati”, ane. Nãm kum anhyr totokbê nhym ôkrēn'ãnh arỳm kà.

Me kute Piratu'ỳr o bôx.

Mat 27.1; Mak 15.1; Ruk 23.1

²⁸Nãm ôkrēn'ãnh kà nhym me arỳm Kajbaj kurũm Jejuo mō. O mō:n kam kikreti 'ôdjwỳ'y'r o bôx. Piratu nhô kikreti'ỳr o bôx. Me bajtemkam bēnjadjwỳr nhidjibê Piratu. Kikreti jakam ne Piratu kute memã axwe pãnh jarēnh djà. Nãm me Piratu nhô kikreti'ỳr Jejuo bôx ne amijã maje bôm arek kumex. Nãm me abenmã kum,

—Kwārĩk wãnh gu me Piratu nhô kikretimã badjār kêt. Dja gu me me bajtem nhô kikremã wadjàn arỳm bapunuren te baje mry krēnmã. Me kute Metĩndjwỳnhmã mrykĩ'ãtomti bĩnja te baje krēnmã, ane. Me kute aben bê me bajtem nhô kikre pymakam ne me ã abenmã anen bôm arek kumex. ²⁹Me bôm kumex nhym kam bēnjadjwỳr Piratu arỳm me'ỳr katon dja. Ne kam Jeju'ã memã kum,

—Be, mỳj ne me'ôja axwe kute? Mỳj ne o ajkê? ane.

³⁰Nhym me kum,

—Je, ne ren axwe kêt ba me ren amã arēnh kêtukumrēx. Nhym be, kati. Mrãmri axwekumrēx, ane.

³¹Nhym Piratu memã kum,

—Me ga dja ga me amũ o mōn me akukràdjà kôt mỳj axwe'ômã akaton kam arỳm pãnh ajmã on, ane.

Nhym mebê idjaer rũnh kum,

—Be, kati. Me akukràdjà kôt me ije me axwe pãnh me'ô par kêt. Ga ne ga aje me axwe pãnh me par djwỳnh, ane. ³²Be, amrêbê Jeju kute amikukãm memã, “Dja me pĩte'y'ã inhô ba kỳjrũm wajêt”, anhyr kôt ne me arỳm jakam ã Jeju'ã Piratumã àpnēnho ane. Kute pĩte'y'ã nhôr ne bĩn'ã ne me kum apnê.

³³Nhym kam Piratu arỳm ô kikretimã wadjà. Ne kam amiwỳr Jeju 'uw nhym 'ỳr bôx. Nhym arỳm kukij ne kum,

—Djãm abê mebê idjaer nhô bēnjadjwỳr rax? ane.

³⁴Nhym kum,

—Djãm ga ne ga ima? Nàr kon. Djãm me'õ ne amã ijarẽ ga ikukij? ane.

³⁵Nhym ajte kukij ne kum,

—Djãm ibê me abê idjaer'õ got? Anhõ me wýnhmẽ me kadjy
Metíndjwýnh mar djwýnh nhõ bẽnjadjwýrmẽ ne me imã akanga, ane.

³⁶Nhym kum,

—Be, djãm ibẽnjadjwýr rax kute pykakam me bẽnjadjwýr rax pyræk?
Kati. Ne ba ren amijo ane nhym ren inhõ àpênh arým inêje me'ýr prõt ne.
Kam ren mebê idjaerkam me rûnhbê aptà. Nhym be, kati. Ibẽnjadjwýr
rax kute pykakam me bẽnjadjwýr rax pyræk kêt, ane.

³⁷Ã kute kum anhýrkam Piratu kum,

—Djãm kam mrãmri abê bẽnjadjwýr rax'õ? ane.

Nhym kum,

—Ga ne ga arým imã ibẽnjadjwýr rax jarẽ. Be, mrãmri. Kadjy ne ba pykakam
me'ýr bõx ne inã kurúm ruw. Ije mrãmri katàt memã ikabên jarênh kadjy ne ba
bõx. Nhym me kum ikabên kínhja ne me ikabên man kôt ar amijo ba.

³⁸Nhym kum,

—Tô nhýnh ne me kabên katàt'õ? ane. Nãm kum anen arým ajte mebê
idjaer'ýr katon Jeju'ã memã kum,

—Be, axwe kêtikumrêx ba arým kuma. ³⁹Ba we me abê idjaer nhõ
bẽnjadjwýr raxjamã inhiren ano gê ta arek ar me aro'ã ba. Me irôbê
mrân nhõ akati jakam me akukràdjà kôt dja ba kum inhiren ano. Amex
pýnhkôt ne ba me pýnh ne me'ã kurên bõm me kurê. Metíndjwýnh me
irôbê mrân nhõ akatikam me akukràdjà kôt ne ba bõm me kurê, ane.

⁴⁰Nhym me ajte kàj bê kum kabên ne kum,

—Kati. Kwārik wānh. Be, atemã Baraba dja ga kum anhiren ano, ane. Be,
Baraba ne àkínhĩ, axwe, nèkrêxmẽ pi'òk kaprĩ prãmje kute me paro ba.

Me kute píte'y'ã nhôr'ã Piratumā àpnênh.

Mat 27.27; Mak 15.16

19 ¹Nãm me Piratumā ane nhym kam arým krākamngôn hmã Jeju
jarẽ. Me kute kaprêprêk kadjy memã arê. Nhym me o tẽn arým
mrykà punuo kaprêprêk kumex ne. ²Ne kam mrýnhĩo kajkep ne ikānh
ne o kute bẽnjadjwýr rax krādjê pyræk ne kum kutu. Ne kam inôkà ryti
kamrêk kute me bẽnjadjwýr rax kà pyræk kum adjà. ³Ne kam arík kum
kabêno kute me me rûnhmã kabên pyræk ne kum,

—Be, ga we abê mebê idjaer nhõ bẽnjadjwýr rax. Goja kribêm atĩn 'iry,
ane. Ne ikrao titik ne. Nãm me ã 'ã bẽno bikênho ane.

⁴Nhym kam Piratu ajte me'ýr katon memã kum,

—Be, ije kam axwe'õ mar kêt. Axwe kêt. Kam ba ije ajte me amã o ikatormã.
Dja ba o ikato ga me kam arým ama. Axwe kêtja ma, ane. ⁵Nhym Jeju arým kato.
Mrýnhĩo krādjê mẽ inôkà ryti kamrêk rã'ã ne 'ã kato. Nhym Piratu memã kum,

—Ota, tãm ne ja, ane.

⁶Nhym me kadjy Metĩndjwỳnh mar djwỳnh nhõ bẽnjadjwỳrmẽ mebê idjaerkam me krākamngônhmẽ omũn arỳm kàj bê Piratumã kum,

—Pĩte'y'ã anhô, ane.

Nhym memã kum,

—Kati. Djã ne ba kam axwe'ômã ikato got ba pĩte'y'ã kunhô? Kati. Me ga dja ga me o tẽn pĩte'y'ã anhô, ane.

⁷Nhym mebê idjaer rũnh kum,

—Be, axwekumrẽx. Kute amijo 'êx ne memã kum, “Ibê Metĩndjwỳnh Kra”, anhỹro bakam axwekumrẽx. Nãm Metĩndjwỳnhbê raxo amiptáro ba. Me ikurådjà kôt me axwe ja pãnh ne me kute me par, ane.

⁸Nãm Piratu me kabẽn ja man arỳm tĩn prã:m. ⁹Ne kam akubyn õ kikretimã wadjàn Jeju kukij ne kum,

—Nhỹnh ne akator djà kraxja? ane.

Nhym Jeju tu anhikrê.

¹⁰Nhym kum,

—Je tô, djãm ikajgo ne ga imã amijarẽn kêt? Djãm aje imar kêt? Be, ba ikabẽnkôt nhym me kute pĩte'y'ã anhôr jabej nàr ba ikabẽnkôt nhym me amã irer jabej. Djãm aje imar kêt? ane.

¹¹Nhym Jeju kum,

—Be, Metĩndjwỳnh amybỳm ren kute ajã bẽnjadjwỳr mẽn kêt ga ren akajgon ren akabẽn kêt mex ne. Kam me'õ kute amã ikanga djwỳnh axweo ajakrenh mex ne, ane.

¹²Nãm kum ane nhym Piratu arỳm kam kum irer jabej. Ne ajte me'y'r katon te memã kabẽn nhym mebê idjaer kum,

—E kum be, Jeju ne arĩk Xedjabê bẽnjadjwỳr raxo amiptà. Djãm Xedja akam ngryk kêt mã ne ga aje Jejumã anhirermã? ane. Xedjabê ne me bẽnjadjwỳr rũnh kunĩ nhõ bẽnjadjwỳr.

¹³Nãm me ã Piratumã ane nhym arỳm amijã kuman kam ajte memã Jejuo kato. Ne kam arỳm me axwe pãnh jarẽn djākam nhỹ. Me krĩ djà jamã ne me Kẽnpoti jarẽ. Mebê idjaer kabẽnkam ne me me krĩ djà jamã Gabata jarẽ.

¹⁴Arỳm me irôbê mrãnh nhõ akati nêje akatikam ne me Jejuo kato. Me kute amim mỳjja kupênho kumex djà nhõ akatikam. Kỳjrũm myt nhỹrkam. Nãm me axwe pãnh jarẽn djākam nhỹn kam mebê idjaermã kum,

—Be, ota me anhõ bẽnjadjwỳr rax, ane.

¹⁵Nhym me kàj bê kum,

—Rũm o tẽ. Rũm o tẽn pĩte'y'ã anhô, ane.

Nhym memã kum,

—Djãm me anhõ bẽnjadjwỳr rax ije pĩte'y'ã nhôrmã? ane.

Nhym me kadjy Metĩndjwỳnh mar djwỳnh nhõ bẽnjadjwỳr ar kum,

—Djãm me inhõ bẽnjadjwỳr rax ne wã? Arkati. Atemã. Me inhõ bẽnjadjwỳr raxbê ne Xedja. Pydji. Ajte 'ôdjwỳ kêt kumrẽx, ane.

¹⁶Nhym kam me kute pĩte'y'ã nhôrmã arỳm kadjy õ me jamã arẽ.

Me kute píte'y'ã nhôr.

Mat 27.32; Mak 15.21; Ruk 23.26

Nhym kam me Jeju pa 'amÿn mã o mō. ¹⁷Ne kam me kum ikrei'ã píte'y dji nhym arÿm ta amikadjy kumÿn o mō, krānhre'ÿr o mō. Krānhrebê me krā'i'ÿr ne o mō. Mebê idjaer kabēnkam ne me me krā'imã Gogota jarê. ¹⁸Nām me o mōn arÿm kam o bōx ne arÿm píte'y'ã Jejumã o iten kǎjmã kudja nhym wajêt. Nhym kam me píte'y'ã ar ja amānhkrutmo ite nhym ar aktã Jeju nhijên wajêt.

¹⁹Nhym Piratu mÿj Jeju axweja'ã pi'òk no'òk ne. Nām pi'òkkam memã kum, —Mebê idjaer nhô bēnjadjwÿr rax ne ja. Krīraxbê Nadjarekam Jeju. Nām ã pi'òkkam no'òko ane. Nhym me kunī kute omūnh kadjy me Jeju nhimōkri kunhō. ²⁰Nhym kam mebê idjaer krāpti pi'òk pumūn arê. Krīrax kuri ne me kute píte'y'ã Jeju nhôr djà. Nhym kam me krāpti 'ÿr ban bōx ne pi'òk jarê. Apÿnh me kabēnkam ne no'òk. Mebê idjaer kabēnkam no'òk ne mebê kregu kabēnkam no'òk ne me kabēnbê Raxinakam no'òk. ²¹Nhym kam mebê idjaer kadjy Metīndjwÿnh mar djwÿnh nhô bēnjadjwÿr Piratumã kum,

—Kwārīk wānh pi'òkkam memã kum, “Mebê idjaer nhô Bēnjadjwÿr rax”, anhÿr kêt. Ate gēdja ga pi'òkkam memã kum, “Nām amijo 'êx ne memã kum, 'Ibê mebê idjaer nhô bēnjadjwÿr rax’, anhÿro ba.” Dja ga ã pi'òk no'òkkam memã anen 'ã anhô gē me omū, ane.

²²Nhym Piratu arkum,

—Kati. Arÿm ne ba mrāmri 'ã pi'òk no'òk ne. Kwārīk wānh rã'ã, ane.

²³Nām me krākamngōnh ar píte'ykam Jeju nhô. Ne kam ar kute abenmã ò kubēkà ngrānhmã. Nhym ar 'ò amijo ò kubēkà ja pytà. Nhym ar 'ò amijo ja pytà. Nhym ar 'ò amijo ja pytà. Nhym ar 'ò amijo ja pytà. Ne kam ar inōkàti ja'ÿr bōx. Ne ar kunī kum kīnh. Nhym inōkàti pydji. ²⁴Nhym ar abenmã kum,

—Kwārīk wānh gwaj abenmã kokjêr kêt. Gwaj pykakam kēn kryre rēn kôt kuman bajō amim inōkàti by, ane.

Amrêbê: ne me bakukāmāre ja jarê. Me Metīndjwÿnh Kra kabēn jarēn memã kum,

“Dja me abenmã ikà ngrān ikà ja'ã kēn kryre rēn kôt 'ò amim kuby.” Nām me bakukāmāre ã memã anen arÿm 'ã pi'òk no'òk ne. Nhym me aben djô'ã arēnho mō. Arēnho mōr tāmã arÿm 'ÿr o bōx. Tū:mrām me bakamingrānyrekam ne arÿm 'ÿr o bōx nhym me arÿm ã Jeju nhô kubēkào anhÿrkumrēx.

²⁵Nhym nã kanikwÿnh, nāmē ar axikôt apōxadjwÿ dja. Nhym Marij 'òdjwÿ, mjên nhidjibê Krôpa adjwÿnhdjwÿ dja. Nhym Marij Madarenadjwÿ dja. ²⁶Nhym Jeju arÿm nã, kurūm katorja pumū. Nhym kôt ba djwÿnh, kum abēja nã kuri dja nhym omū. Nhym arÿm kôt ba djwÿnh ja'ã nāmã kum,

—Ê, me'ò nire. Be, tāmwbê ne arÿm akra, ane. ²⁷Ne kam kôt ba djwÿnhmã kum,

—Ê, tāmwbê ne arÿm anã, ane. Nhym kam arÿm ò kikremã o mōn arÿm o djuw mex ar o ba.

Tyk'a ujarênh.*Mat 27.45; Mak 15.33; Ruk 23.44*

²⁸Nhym kam arým kute inomã àpênh djã mênhkam memã kum, “Arým imã kôr”, ane. Amrêbê: ne me bakukãmãre Jeju kabên ja jarên memã kum, “Arým imã kôr.”

Nãm me ã anen arým 'ã pi'ók no'ók ne. Nhym me aben djô'ã arênhô mô:. Arênhô môr tãmtã arým 'ÿr o bôx. Tũ:mrãm me bakamingrãnyrekam ne Jeju arým kum kôrkumrêx ne arým memã kum, “Arým imã kôr”, ane. ²⁹Nhym wãnh pidjô kangô kadjã ngôn'h'ókam ipun dja. Nhym me ngôn'h puror pôn'h djã jakritaja kangômã adjã nhym kam ipu. Nhym me pibê ixôpu idjamã adjàn kam kãjmã kum kungãn ajkwamã adjã. ³⁰Nhym arým kaôn pidjô kangô kadjão ikô. Ne kam memã kum, —Arým ne ba idjapênhô tẽn inomã kumê, ane. Ne kam ta aparmã krãn tu amitĩnmã iren ta arým ty.

³¹Be, pi'ók rãrãr nêje arým akamãt 'ÿr nhym mebê idjaer arým êje ô mÿjja kupênhô kumex. Nhym kam mekam me kwÿ Piratu'ÿr môn kum, —Ê, dja me pite'y'ã ar arijja 'i kukê gê ar on ty. Dja ar on ty nhym me on ar adjã. Ne kam pi'ók rãrãro bikên'h kêt, ane. ³²Nhym arým 'ÿr me krãkamngôn'h jano nhym me 'ÿr môn 'ÿr bôx. 'ÿr bôx ne kumrêx ja te'i kukê ne ajte ja te'i kukê.

³³Nhym ar ipôkri Jeju wajêt nhym me 'ÿr bôx. Nhym amrêbê tyn wajêt nhym me arým omũ. Ne kam kute te'i kukên'h kêt. ³⁴Nhym arým krãkamngôn'h'ô ô kãxo nãnh jarĩn arým o pẽnãt'ãnh kanhuw. Kanhuw nhym kamrômê ngômê akãn arým prôt ne.

³⁵Ba ne ba omũn me amã kôt 'ã ajarê. Mrãmri katãt me amã 'ã idjujarênhkumrêx. Mrãmri ije omũnhkumrêx ne kôt me amã 'ã ajarê. Me ajte tu amim markumrêxmã ne ba me amã arê. ³⁶Amrêbê: ne me bakukãmãre tãmja jarên memã kum,

“Be, 'i'ô dja me kwÿnh kêt kumrêx”, ane.

³⁷Ne kam ajte arên memã kum,

“Dja me kanhuw ne arým omũnhô dja”, ane.

Metĩndjwÿnh kukwakam ne me memã anen arým 'ã pi'ók no'ók ne. Nhym me aben djô'ã arênhô mô:. Arênhô môr tãmtã arým 'ÿr o bôx. Tũ:mrãm me bakamingrãnyrekam ne 'ÿr o bôx. Nãm me te'i kukên'h kêt ne arým kanhuw. Me bakukãmãre kute 'ã pi'ók no'ók kôtô.

Me kute adjãr.*Mat 27.57; Mak 15.42; Ruk 23.50*

³⁸⁻³⁹Nhym kam Jôdje Armatê, kubê ne Jeju kôt ba djwÿnh'ô. Mebê idjaer rũnh pymaje kute memã amijarênh kêt ne. Kubê Jejukôt ba djwÿnh'ã kute memã amijarênh kêt ne. Ne kam arým Piratu'ÿr tẽn kum, —Ba Jeju kaban o rwÿn o tẽn adjã, ane. Nhym Piratu kum, “Ajãrã”, ane. Nhym kam arým amũ tẽ. Amũ Nikodemu'ÿr tẽn 'ÿr bôx. Nikodemu ne amrêbê

akamàtkam Jeju'ÿr bôx nhym ar abenmã kabêno nhÿ. Nikodemu ja'ÿr ne Jôdje bôx nhym ar ro'ã Jeju'ÿr tẽ. 'ÿr tẽm kêtri ne Nikodemu arÿm Jeju kadjy kudjÿ djào atomkumrẽx. Utĩ'a akrekam utĩ: kute 50 kuru pyràk. Miramẽ arômẽ ne abenkam o akã. Nãm kudjÿ djà tun arÿm Jôdjemẽ ro'ã Jeju'ÿr o tẽn 'ÿr o bôx.

⁴⁰Ne kam arÿm pĩte'y kurũm Jeju kaban o ruwn arÿm kudji. Ne kam rinhuo kubẽkào prĩne o kupu. Ar kupu djàkôt me kudjÿ djà jadjuw ne o kupu. Mebê idjaer kukràdjà kôt ne me ã me tyko ane. ⁴¹Nhym wãnh me kute pĩte'y'ã nhôr djà kuri pidjôkô'õ. Ne kam kẽnkre'õ. Kẽnkre ny. Kraxje me kute kam me'õ jadjàr kêt rã'ã. ⁴²Nãm ar Jeju kupun kumÿn o tẽ. O tẽn arÿm kẽnkekam adjà. Arÿm pi'ók rãrãr bôx 'ÿr nhym kam ar amibêx ne me kute nhôr djà kuri kẽnkekam adjà. Kẽnkekam adjà nhym ar'ã akamàt ne. Nhym kam ajte akati. Nhym kam ajte akamàt ne.

Akubyn tĩn ne kator.

Mat 28.1; Mak 16.1; Ruk 24.1

20 ¹Nhym ajte akati 'ÿr, pi'ók kamrêk 'ÿr nhym Marij Madarena arÿm kẽnkre'ÿr tẽn 'ÿr bôx. 'ÿr bôx nhym me kute kẽnpoos kẽnkre'ã ijêja arÿm amijã kutan kre jakàja'ã dja nhym Marij arÿm omũ.

²Ne kam akubyn prôt ne arÿm Ximão Pedru'ÿr bôx ne kôt ba djwÿnh'õ jadjwÿ 'ÿr bôx. Jeju kum abêja 'ÿr bôx ne arkum,

—Arÿm ne me kẽnkre kurũm Bẽnjadjwÿr djwÿnho kato. Nãm me nhÿnh o mון kudji, ane.

³⁻⁴Nãm kum ane nhym kam Pedrumẽ kôt ba djwÿnh 'õdjwÿ ar arÿm tu kẽnkre'ÿr prôt ne. Nhym kam kôt ba djwÿnh 'õja arÿm Pedru ren kumrẽx kẽnkre'ÿr bôx. ⁵'ÿr bôx ne kẽnkre'ã ibôn te kre kamũnho dja. Nhym rinhuo kubẽkàbit nõ nhym omũ. Ne kam kẽnkre'ã àr kêt.

⁶Nhym kam Pedru arÿm kôt bôx ne tu kẽnkre'ã 'ÿr wadjà. Ne kam rinhuo kubẽkà pumũn krã kupu djàja pumũ. ⁷Nhym krã kupu djàja rinhuo kubẽkãmẽ ro'ã nõr kêt. Jeju ne prĩne krã kupu djà krã mex ne kudji nhym ate nõ.

⁸⁻⁹Nhym kam kôt ba djwÿnh kumrẽx bôxja kẽnkre'ã wadjàn arÿm omũ. Omũn arÿm amim,

—E kum, mrãmri ne akubyn tĩn ne, ane. Ne tu amim Jeju markumrẽx. Bir, ar kute omũnh kêtri ne ar amim,

—Mrãmri ne arÿm tyn akubyn tĩn kêt, anhÿro ba. Ne ren mrãmri Metĩndjwÿnh kabên'ã pi'ók no'ók markumrẽx ne ren amim,

—Be, mrãmri dja akubyn tĩn, anhÿro ba. Nhym be, kati. Ar kute pi'ók mar kêt. Kam ne ar kute kupu djà nõrkôt omũnh kêtri amim, “Akubyn tĩn kêt”, anhÿro ba. Ne kam kẽnkre'ã 'ÿr wadjàn arÿm omũn amim,

—E kum, mrãmri ne akubyn tĩn ne, ane. Ne tu amim Jeju markumrẽx.

Kute Marijmã amijo amirĩt.*Mat 28.9; Mak 16.9*

¹⁰Nãm ar kênkre kamũn kam akubyn ar õ kikremã tẽ. ¹¹⁻¹²Nhym Marij ar pãnh kênkre'yr bõx ne bõm arek mýro dja. Nãm mýro djan arým kênkre'ã ibõ. Nhym kênkre kadjwýnhbê Metĩndjwýnh kadjy mrãnh djwýnh amãnhkrut nhỹ. Ar õ kubêkã jaka. Jeju nõi djà'ã ar nhỹ. Nhym ja krã nõi djà'ã nhỹ nhym ja te nõi djà'ã nhỹ. Nhym Marij kênkre'ã ibõn arým ar omũ.

¹³Nhym ar kum,

—Me'õ nire, mýkam ne ga amýro dja? ane.

Nhym arkum,

—Inhõ Bẽnjadjwýr djwýnh ne me'õ kênkre kurũm o katon o mõi nhỹnh kudji. Ije ir djãkõt omũnh kêtka ne ba imýro dja, ane. ¹⁴Nãm arkum anen arým mũm akẽx. Mũm akẽx ne arým Jeju pumũ. Djã ne tu omũ? Kati. Kute omũnh kêt.

¹⁵Nhym kum,

—Mýkam ne ga amýro dja? Mýj me'õ ne ga abej? ane.

Nhym Jejuo kute pidjõkõ pumũnh djwýnh pyrãk ne kum,

—Õ kum, ga aje nhỹnh o amõi ne ir jabej imã akre. Dja ba 'ýr tẽn arým amrẽ o tẽ, ane.

¹⁶Nhym kum, “Marij”, ane.

Nhym kam 'ýr akẽx ne kum, “Rabi”, ane. Be, me bakabẽnkam ne gu me ren kum, “Ujarẽn djwýnh”, ane. Nãm kum, “Rabi”, anen arým o tým.

¹⁷Nhym kum,

—Kwãrĩk wãnh ijo atým kêt. Imã anhire. Kraxje Ibãm'ýr idjãbir kêt ne ga ijo tým. Tẽn ikamyre arkum ikabẽn jarẽn arkum, “Jeju ne ar amã, ‘Arým Ibãm'ýr idjãbirmã. Ibãmbê ne ar Abãm. Arým Itĩndjwýnh'ýr idjãbir ne itẽmmã. Itĩndjwýnhbê ne ar Atĩndjwýnh’, ane. Dja ga tẽn ã ikamy arkum ane.” Nãm ã Jeju Marij Madarenamã ane.

¹⁸Nhym arým kõt ba djwýnh'ýr tẽn ar'ýr bõx. Ne arkum,

—Arým ne ba Bẽnjadjwýr djwýnh pumũ, ane. Ne kam Jeju ajbir kute kum kabẽn jarẽnha kõt arým arkum arẽ.

Kõt ba djwýnhmã kute amijo amirĩt.*Mat 28.16; Mak 16.14; Ruk 24.36*

¹⁹Nhym kam arým pi'õk kamrêkkam akamãt. Nhym kam kõt ba djwýnh ar arým prĩne amijã ijẽn nhỹ. Mebê idjaer rũnh pymaje ne ar ar bikprõnh djãkam amijã ijẽn nhỹ. Nhym kam Jeju bõx ne tu ar aêrbê ar'ýr wadjãn ar ipõkri dja. Djan arým arkum, “On ar adjumar mex”, ane. ²⁰Nãm arkum anen arým arkum ikrakam kãxirãx djwa kre jakren ajte pẽnãt'ãnh kãxdjwa kre jakre. Nhym ar kute mrãmri ar õ Bẽnjadjwýr djwýnh pumũnhkumrêxkam kĩnhkumrêx ne.

²¹Nhym kam ajte arkum,

—On ar adjumar mex. Amrêbê ne Ibãm me'ã imã karõ. Pykakam me kum kînh kêtja'yr itêm'ã ne imã karõ ba amrê tẽ. Dja badjwỳ Ibãm kudjwa jakam me'ã ar amã karõ. Ar aje ikudjwa me'yr atēmãmã ne ba ar amã me'ã karõ, ane. ²²Nãm arkum anen arỳm ar akôn arkum,

—Gê on Metĩndjwỳnh Karõ ar ajo ba. ²³Dja ar ajo ba gar kôt me kwỳ axwe maro akno. Nhym kam Metĩndjwỳnh ar akôt me axwe maro akno. Nàr gar me kwỳ axwe maro abiknor kêt nhym kam Metĩndjwỳnh me axwe maro biknor kêt. Nãm Jeju ã arkum anen arỳm mã tẽ.

Tômemã kute amijo amirĩt.

²⁴Nhym Tôme Djidjimu. Jejukôt ba djwỳnhbê 12'õ. Tôme ne kute ar bikprõnh djakam arkôt ỳr kêt ne kute Jeju pumũnh kêt. Jeju mã tẽ nhym kam ar Tômemã kum,

²⁵—Arỳm ne bar Bẽnjadjwỳr djwỳnh pumũ, ane.

Nhym arkum,

—Tô nhỳnh? Ne ba ren ikrakam kàxiràx djwa kre pumũn ren kôt inhikra'i jadjàn ren pênàt'anh krekôt inhikra jadjà. Be, kambit ne ba ren tu amim markumrêx ne amim, “Mrãmri ne akubyn tĩnkumrêx”, ane. Nhym be, kati. Akubyn tĩn kêt. Nãm ã Tôme arkum ane. ²⁶Nhym kam arỳm ar'ã akatibê 8 apêx nhym kôt ba djwỳnh ar ajte bikprõnh djakam nhỹ. Nhym Tômedjwỳ arỳm ar ikô'ã nhỹ. Nhym ar ajte prĩne mebê kikre'ã ijê. Ar nhỹ nhym kam Jeju ajte tu wadjàn arỳm ar ipôkri djan arkum, “On ar adjumar mex”, ane. ²⁷Ne arỳm Tômemã kum,

—Ajrã. Amrê anhikra 'io goja inhikra kupên omũ. Ne amrê ipênàtkam krekôt goja anhikra jadjà. Kwārĩk wãnh ijã amim, “Kati. Nãm 'êx”, anhyr kêt. On tu amim imarkumrêx, ane.

²⁸Nhym Tôme kum,

—Inhõ Bẽnjadjwỳr djwỳnh, Itĩndjwỳnh, ane.

²⁹Nhym kum,

—Tôme, ga aje ipumũnhkôt ne ga arỳm tu amim imarkumrêx. Nhym be, me kute ipumũnh kêt djwỳ. Djãm me kute ipumũnh kêt ne tu amim imarkumrêxkam kaprĩmã? Kati. Dja me te ipumũnh kêt ne tu amim imarkumrêx ne arỳm kĩnhkumrêx. Ne kĩnho katàt ajakre. Nãm ã Jeju kum ane.

³⁰Be, kôt ba djwỳnh kute omũnh ne kute raxmã kator kadjy ne Jeju kute mỳjja pumũnh kêt krãptĩ nhipêx. Ne me punu krãptĩ mex. Ije ar amã mỳjja kwỳ'ã idjujarênh ne ije 'ã pi'ók no'ók ne ja. Djãm kunĩ'ã ne ba pi'ók no'ók? Kati. Pi'ók jakam ne ba kwỳbit'ã pi'ók no'ók ne. ³¹Be, mỳj kadjy ne ba ar amã pi'ók no'ók ne? Bir, dja gar pi'ók jarênh aman arỳm tu amim Jeju markumrêx ne amim,

—Mrãmri ne Jejubê gwaj banhõ Bẽnjadjwỳrbê kumkatikumrêx. Mrãmri kubê Kritukumrêx. Mrãmri kubê Metĩndjwỳnh Krakumrêx, ane. Ja dja gar pi'ókkam arênh aman tu amim markumrêx. Tu amim markumrêx ne arỳm Jejukôt atĩn ne ar aba rã'ã: rã'ã ne. Ja kadjy ne ba ar amã 'ã pi'ók no'ók ne. Tãm ne ja.

Kôt ba djwýnh kute kabēnkôt tep kumex pynēnh.

21 ¹Nām Jeju ā kôt ba djwýnhmā amijo amirīto ane. Tyk ne akubyn tīnkam ā arkum amijo amirīto ane. Ne kam ajte kute imôtibē Xiberij'ānh kute arkum amijo amirīt kadjy. ²Nhym kôt ba djwýnh kwý imô nokà'ā ar ba. Ximāo Pedrumē Tôme Djidjimūmē Natanajeumē Djebedēu kute ar adjwýrmē kôt ba djwýnh amānhkrut 'ôdjwý ar ba. Natanajeu ne pykabē Garrējakam krībē Kanakam abatānh djā. ³Ar ngô nokà'ā ar ba: nhym Ximāo Pedru arkum,

—Ba on tep kwý pynē, ane.

Nhym ar kum,

—Bar akôt tē, ane. Ne kam tēn kākam nhýn kam nox ne. Ne kam ar kryreti rēnhō ba. Ne ar rēnhō ba: nhym ar'ā akamāt. Nhym ar ar o ba: nhym arým ar'ā akati tē nhym tep kēt mex ne.

⁴Ar'ā akati tē nhym Jeju arým bōx ne akāx'ā dja. Nhym ar kute nokre pumūnh kēt ne.

⁵Jeju akāx'ā dja:n kam amū arkum kabēn ne arkum,

—Akmere ar, djā ne gar tep'ō pynē? ane.

Nhym ar kum, “Kati”, ane.

⁶Nhym arkum,

—Ar kà djubôk'ānh ajte kryreti mēn arým kwý pynē, ane. Nhym kam ar arým kà djubôk'ānh kryreti mē. Nhym arým tep kume:x ne. Nām ar arým tep kumex pynē ne arým te: kute o ābirmā nhym utī: ne.

⁷Nhym kôt ba djwýnhja, Jeju kum abēja, Pedrumā kum,

—E kum be, Bēnjadjwýr djwýnh ne dja, ane. Nhym Pedru kuman amikajgo pumūn arým ō inôkati jadjān kam tu Jeju'ýr nox ne 'ýr bōx. ⁸Nhym kôt ba djwýnh 'ôdjwý ar kà ngrire 'ókam arým akāx'ýr mō. Akāx'ýr tep kamēnhō mō. Amybým ne akāx nhym ar ar tepo ba. Akāx'ýr 'ā akrebē 90 metu. ⁹Nām ar tep kamēnhō mō:n arým akāx'ýr o bōx. 'Ýr o bōx ne arým o wabi. Nhym arým kute tep prā'ā bōr ikwā nhym ar omū. Nhym djwýdjwý kuri ikwā nhym ar omū.

¹⁰Nhym kam Jeju arkum,

—Amrē ar aje tep pynēnh kwýo tē, ane.

¹¹Nhym Pedru arým 'ýr tē. Kryretikam tep rūnh krāptī. 'Ýr ne tē nhym kryretikam tep rā'ā nhym bjēro mō:n akāx'ā arým kumē. Nhym tep'ā akrekam kubē 153. Nām te tep rūnh krāptīn kute kryreti rēnh kēt ne.

¹²Nhym kam Jeju arkum,

—Amrē ar mōn anhō kwý krē, ane. Nhym ar 'ýr mōn arek dja. Ar arým kute amim ō Bēnjadjwýr djwýnhkôt kute markam ar 'ō kute kum, “Bēnjadjwýr djwýnh, djām ga”? anhýr prām kētkumrēx. Nām ar arek umaje dja. ¹³Nhym kam Jeju arým ar'ýr tēn arkum djwýmē tep ngā. Nām ā Jeju arkum amijo amirīto ane. ¹⁴Be, Jeju akubyn tīn nhijukri ne amūja'ā arkum amijo amirīt. Ne ajte arkum amijo amirīt. Ne akati jakam ajte kute arkum amijo amirīt ne ja.

Kute Pedrumã akubyn kum àpênh kadjy kabên jarênh.

¹⁵ Jeju arkum kungã nhym ar arým o nhỹ, ò kwý krêno nhỹ. Ne kam ò kwý krên pa nhym Jeju arým Ximão Pedru kukij. Djônaj kute Ximão djirja. Nãm kukij ne kum,

—Ê Ximão. Djãm amã ijabê? Djãm amã ijabêo aje ar ja kunĩ jakrenh? ane.

Nhym kum,

—Nà Bênjadjwýr djwýnh, imã ajabê. Ga arým ama, ane.

Nhym kum,

—Inhõ me ne me kute mrykĩ'átomti krare pyræk. Dja ga memã ikabên jarênho aba. Dja ga memã ikabên jarênho kute mrãmri ne mrykĩ'átomtio ba djwýnh kute ò krito djuw mexo ba pyræk. ã memã ikabên jarênho ane, ane.

¹⁶ Ne kam ajte kum,

—Ê Ximão, djãm amã ijabê? ane.

Nhym kum,

—Nà Bênjadjwýr djwýnh, imã ajabê ga arým ama, ane.

Nhym kum,

—Inhõ me kute mrykĩ'átomti pyræk dja ga ar meo aba, ane.

¹⁷ Ne kam ajte: kum,

—Ê Ximão, Djônaj kra, djãm amã ijabê? ane.

Nhym arým kaprĩre. Kute kum, “Djãm amã ijabê”? anhyro amãnhkrut ne ikjêkêtkam ne arým kaprĩre ne.

Nãm Jeju kum ane nhym kum,

—Bênjadjwýr djwýnh, ga ne ga aje mýjja kunĩ mar. Imã ajabê ga arým ama, ane.

Nhym Jeju kum,

—Inhõ me kute mrykĩ'átomti pyrækja dja ga memã ikabên jarênho aba. ¹⁸ Be, ajabatàn nykam ne ga amipre djào amipren kam ga aje amim pry'ã karõ kôt mrã. Nhym be, abêngêttekam dja ga me'ômã apa bẽ nhym apren apa 'amýn 'ýr ajo tẽ. Te atêm prãm kêt nhym 'ýr ajo tẽ, ane. ¹⁹ Be, me kute Ximão Pedru bĩn kukãm ne Jeju ã kum ane. Pedru dja me kubĩ nhym arým ty. Dja ã tyko ane nhym me arým kôt Metĩndjwýnh raxmã kato. Nãm kum anen ajte kum,

—Be, dja ga mã ikôt ajkamẽ, ane.

²⁰ Nãm Ximão Pedrumã ane nhym arým akẽx ne kôt ba djwýnh 'õdjwý pumũ. Jeju kum abêja pumũ. Tãm ne amrêbê ar àkuro ýrkam Jeju'ýr ajkamên kum,

—Bênjadjwýr djwýnh, mýj me'õ ne kute akurê djwýnhmã akangamã? ane. ²¹ Nãm Pedru kôt ba djwýnh ja pumũn kam 'ã Jejumã kum,

—Bênjadjwýr djwýnh, mýj dja tãmwãdjwý kam nẽ? ane.

²² Nhym Jeju Pedrumã kum,

—Be, dja ba akubyn bõx nhym tĩn rã'ã jabej. Kwãrĩk wãnh rã'ã. Nhym be, ije adjápênh djã'ã amã karõja dja ga kôtbit ajamak bẽn ne o aba. Ba

dja ga mã ikôt ajkamẽ, ane. ²³Nhym kam Jeju kukwakam me kute abeno kamyja kute Jeju kabẽn mar kêt ne arĩk 'ã abenmã kum,

—Be, dja kôt ba djwỳnh wã tyk kêtikumrẽx, ane. Nhym be, kati. Djã ne kum, “Dja tyk kêt”, ane? Kati. Nãm Pedrumã kum,

—Be, dja ba akubyn bõx nhym tĩn rã'ã jabej. Kwãrĩk wãnh rã'ã. Nhym be, ije adjãpênh djà'ã amã karõ dja ga kôtbit ajamak bẽn ne mã ikôt ajkamẽ, ane. Jabit Jeju Pedrumã arẽ. Tãm ne ja.

²⁴Ba Jeju kôt iba djwỳnh ne ba me amã Jeju djãpênh'ã ajarẽ. Ije àpênh pumũnhkôt ne ba katàt me amã 'ã idjujarẽnhkumrẽx ne arỳm 'ã pi'ôk no'ôk ne. Tãm ne bar ije markumrẽx.

²⁵Djãm ije apỳnh àpênh djà'ã pi'ôk no'ôkja djãm jabit ne Jeju ipêx? Kati. Ije pi'ôk no'ôk kêttri ne ba amim,

—Ne ba ren àpênh kunĩ'ã pi'ôk no'ôk nhym ren arỳm pi'ôk kume:x. Ne ren apỳnh pyka djàri kunĩkôt ren pi'ôk me akrenh mex ne. Nhym be, kati. Jeju djãpênh jabit ne ba 'ã pi'ôk no'ôk ne. Tãm ne ja.